

Deuteronomio

Moisés kinnelnamikiltia on israelitas itlajtolmakalis toTEKO

1 ¹In yejua on tlajtoltin yejuan Moisés okinmijlij on israelitas ijkuak nemiyaj ipan on xalpatlajkan, kampaka ikisayan tonaltsintli de on río Jordán. Yejuamej chantiyaj ipan on ixtlauatl yejuan itoka Arabá, nisiu ixpan on kalpan Suf. Iyeualkan on kalpan onkatkaj on kalpanmej Parán, Tofel, Labán, Hazerot niman Dizahab. ²Tla yakaj komelauaskia ipan on ojtli yejuan yau on tepetl Seir, san nonekiskia matlaktli uan se tonajli para nejnemiskia de Sinaí hasta Cades Barnea. ³Ipan on achtoj tonajli de on majtlaktli uan se metstli ipan on xipan 40, Moisés okinmijlij on israelitas nochi in tlajtlamach* yejuan toTEKO okinauatij para yejuamej ma kichiuakan. ⁴In onochiu, sakin* ijkuak Moisés yokitlan Sehón, inrey on amorreos yejuan chantiyaj ipan on tlajli Hesbón, niman Og, irey Basán yejuan chantiya ipan on tlajli Astarot nisiu Edrei. ⁵Ijkuak nemiyaj kampaka ikisayan tonaltsintli de on río Jordán ipan on país Moab, Moisés opeu kinmaka on israelitas in tlanauatiltin: ⁶“ToTEKO Dios ijkin otechijlij itech on tepetl Sinaí: ‘Nemejuamej sanoyej yonenueskajkej nikan itech in tepetl. ⁷Xkuiteuakan nochi tlen nenkipiyaj niman xuiyan impan intepeuan on amorreos, niman impan nochimej on regiones yejuan onokej nisiu: ipan on tlajli Arabá, ipan on región kampa tepeyoj, ipan on ixtlauatl, ipan on tlajli Néguev itempan on mar, ipan impaís on cananeos, niman ipan on tlajli Líbano, hasta itech on ueyi río Éufrates. ⁸Xkitakan, nejua yonemechmaktlij on tlajli. Xuiyan niman xmoyaxkatikan nochi on tlajli yejuan nejua, nemoTEKO, oninotlajtolmakak ika nikinmakas nemoachtojtajuan Abraham, Isaac niman Jacob niman inuejkakoneuan.’

Moisés okintlalij jueces

(Ex 18.13-27)

⁹Ipan on tonajli nejua onemechijlij: ‘Noselti xuelis nemechyekanas nemochimej*.’ ¹⁰ToTEKO Dios sanoyej

yomechmiyekilij, niman aman sanoyej nenmiyekej ken on sitlalimej yejuan onokej ipan cielo.’¹¹No onemechijlij: ‘¡ToTEKO Dios yejuan nemouejkatajuan okixmatkej, ma mechmiyekili okse se mil ichkich más xken aman nennemij, niman ma mechtiochiua ken yomechprometerouilij!’¹²Nejua noselti xniuelis nemechpaleuis nochi ika on nemopajsolouilis, niman nemotlauijsokilis. ¹³Yejua ika, xkintlapejpenikan on tlakamej de cada tribu* yejuan tlamatkej*, tlakasikamatkej, niman tlaixmatkej, para nejua nikintlalis ken nemotlayekankauan.’

¹⁴’Niman nemejuamej onenkijtojkej: ‘Kuajli on tlen tikijtoua.’

¹⁵’Kemaj onikinkixtij ipan cada se nemotribu* on tlakamej yejuan más tlamatkej* niman ixtlamatkej*, niman onikintlalij para mechyekanaskej. Sekimej onikintlalij para ma kinyekanakan se mil tlakamej, sekimej 100 tlakamej, sekimej 50 tlakamej niman sekimej majtlaktli tlakamej. Niman oksekimej onikintlalij tlayekankej ipan cada nemotribus. ¹⁶No ijki, ijkin onikin nauatij on jueces: ‘Xkakikan iminpajsolouilis on tlakamej, niman xtetlatlakolmakakan melajki sanken* inuan nemochanejkauan niman inuan on yejuan xchanejkej. ¹⁷Maka nenkinchikoitaskej on tlakamej ijkuak nenkichiuaskej tekiauajyotl. Sa no ijki xkintakan on yejuan ricos niman on yejuan mayankej. Maka xmakajsikan yakaj tlakatl, pampa nemotlayekanalís ualeua itech toTEKO Dios. Niman tla onkaj itlaj yejuan más ouijtikaj*, on xnechkauilikan nejua nikchiuas.’

¹⁸’Ipan on tonajli onemechmakak tlajtlamach* tlanauatiltin de nochi yejuan nonekiya nenkichiuaskej.

On majtlaktli uan ome tlakamej oichtakatlajtlachatoj ipan on tlajli Cannán

(Nm 13.11—14.4)

¹⁹’Ijkuak otikiskej itech on tepetl Sinaí^a, otiajkej ipan on tepemej iminyaxkauan on amorreos, ijkon ken toTEKO Dios otechnauatij. Otiknejenkej nochi on xalpatlajkan yejuan sanoyej ueyi niman sanoyej temojtij yejuan nemejuamej onenkitakej, hasta otajsikej ipan on tlajli Cades-barnea. ²⁰Ompa onemechijlij: ‘Yotejkokej ipan imintlal on amorreos yejuan toTEKO Dios techmaka. ²¹Xkitakan, nemoTEKO Dios mechmaktilia in tlajli. Yejua ika, xtlejkokan niman xmoyaxkatikan ken yokijtoj toTEKO, iminDios nemoachtojtajan. Maka xmomojtikan, nion maka xmoyolmajxalokan.’

²²’Pero nemejuamej onennechijlijkej para achtoj ma tikintitlanikan sekimej tlakamej, niman ma ichtakatlajtlachatij

a 1.19 On tepetl Sinaí, no itoka Horeb.

ipan on tlajli, para ijkon techmachistiskej katlejua ojtli tikajsiskej, niman katlejua kalpanmej iminpan tikalakiskej. ²³Nejua onikuelkak on tlen nemejuamej onenkijtojkej, niman kemaj onikintlapejpenij majtlaktli uan ome tlakamej, se tlakatl de cada tribu. ²⁴Yejuamej oyajkej niman otlejkokej ipan on tepemej. Kemaj oajsikej ipan on ixtlauatl itoka Escol. Niman oichtakatlajtlachatoj ipan nochi on región. ²⁵Sakin, okuajkikej keski tlakyotl yejuan onkatka ipan on tlajli, niman otechajkuilijkej. Niman ijkin otechijlijkej: ‘On tlajli yejuan toTEKO Dios techmakas sanoyej kuajli.’ ²⁶Pero nemejuamej xonenkinekej onenyajkej, yej xonenkitlakamatkej on tlanauatijli yejuan toTEKO Dios omechmakak. ²⁷Niman ipan nemochan opeu tlamach nenkijtouaj niman ijkin onenkijtojkej: ‘ToTEKO techtlauelita. Otechkixtij Egipto para techtemaktilis intech on amorreos para ma techmiktikan. ²⁸Niman aman ¿Kanon tiaskej? On yejuan oichtakatlajtlachatoj kijtouaj ika ompa nemij tlakamej más kojtiykej xken tejuamej. Yejuamej sanoyej uejueyitlakamej niman kipiay inkalpanuan sanoyej uejueyimej niman kuajli yeualtsakutokej ikan tepantli yejuan ajsitokej hasta ipan cielo. Niman ompa okintakej iuejkekoneuan Anac, on tlakamej yejuan sanoyej uejueyitlakamej. Nochi ika yejua in xok titoyoleuaj tiaskej.’ ²⁹Kemaj nejua onemechijlij: ‘Maka xmomojtikan niman maka xkinmakajsikan. ³⁰NemoTEKO Dios yas nemoyakapan, niman yejua teuijsokis nemopampa, niman kichiuas tlajtlamach* ken onenkitakej okichiu ipan on tlajli Egipto, ³¹niman ipan on xalpatlajkan. NemoTEKO Dios omechajuikak ipan imauan hasta nikan kampa yonemejkokej, ken sen tajtli yejuan kinapalojtii ikoneu.’ ³²Pero maski ijkon onemechijlij, xonenkineltokakej toTEKO Dios, ³³yejuan mechyekantiaya para kitlapejpenijtiaya kampa nonekiya nemochantiskej. Ipan yeuajli mechyekanaya ikan sen tlimilinajli ipan ojtli yejuan nonekiya nenkitokaskej, niman ipan tonajli mechyekanaya ika sen moxtli mimiltik.

ToTEKO okualan intechkopa on israelitas

(Nm 14.20-35)

³⁴Ijkuak toTEKO okak ken tlamach onenkijtojkej sanoyej okualan niman ijkin onotlajtolmakak ika itokatsin: ³⁵Nion se yejuan xkuakualtin tlakamej yejuan nemiyaj ipan on tonaltin, xuelis kitas on kuajli tlajli yejuan onikimprometerouilij nikinmakas inuejkatajuan. ³⁶San uelis kitas Caleb, ikoneu Jefone. Yejua niman iuejkekoneuan nikinmakas on tlajli kampa okixmatitoy pampa onechtlakamat nejua iTEKO ika nochi iyojlo. ³⁷Niman nemopampa, toTEKO no okualan nouan, niman onechijlij: ‘Tejua no xtikalakis ipan on tlajli. ³⁸Yej, kalakis on

motlapaleuikau Josué, itelpoch Nun. Xyolchikau tej, pampa yejua kinyekanas on israelitas para kalakiskej ipan on tlajli niman kinoyaxkatiskej.’³⁹ Niman maski nemejuamej nenkinemiliayaj ika nemotlauelikniuan mechkuiliskiaj nemokoneuan yejuan pipitikej, yej yejuamej kalakiskej ipan on tlajli. Nikinmakas yejuamej para iminyaxka yes.⁴⁰ Pero aman, nemejuamej xmokuepakan ipan on xalpatlajkan. Xuiyan oksejpa itech on Mar Rojo.

On israelitas okintlankej

(Nm 14.39-45)

⁴¹ ‘Kemaj nemejuamej onennechnankilijkej: ‘Yotitlajtlakojkej ixpan toTEKO. Pero aman tiaskej, tontlauijsokiskej ken toTEKO Dios yotechnauatij.’ Niman nemejuamej onenkuikej nemotepos. Nenkinemiliayaj xouij nentlejkoskiaj ipan on tepetl niman nenkalakiskiaj ipan imintlajli on amorreos.⁴² Pero toTEKO onechijlij para ma nemechijli: ‘Maka xtlauijsokitij. Maka xmoteyokolikan para ma mechtlanikan nemotlauelikniuan, pampa nejua xnias nemouan niman nemotlauelikniuan mechtlaniskej.’⁴³ Nejua onemechijlij tlinon nemopan nochiuaskia, pero nemejuamej xonenkinekkej onennechkakkej. Xonenkitlakamatkej itlanauatil toTEKO, niman ika nemoueyimatilis onentlejkokej ipan on tepemej.⁴⁴ Kemaj on amorreos, yejuan chantiyaj ipan on tepemej, omechixnamikikoj. Yejuamej omechixnamikikoj ken chilpamej, omechtlankej niman omechajtotokakej, desde Seir hasta Horma.⁴⁵ Ijkuak nemejuamej onenuajmokuapatoj, onenchokakej ixpan toTEKO, pero yejua xokak nemochokilis niman xomechpaleuij.⁴⁶ Yejua ika, nemejuamej sanoyej ouejkau onenchantikej ipan on región de Cades.

On israelitas nejnentinemiyaj miyek xipan ipan on xalpatlajkan

2 ¹ ‘Kemaj otitokuepkej, niman otiajkej ipan on xalpatlajkan ipan on ojtli yejuan yau kampaka onkaj on Mar Rojo, ijkon ken toTEKO onechnauatij. Niman miyek tonaltin tikyeualojtinemiyaj on tepemej de Seir.

² ‘Kemaj toTEKO onechijlij: ³ ‘Sanoyej youejkau nenkiyeualojtinemij in tepemej. Aman xuiyan norte ika,⁴ niman xkinmaka in tlanauatijli on israelitas: Nemejuamej nenpanoskej ipan imintlal iuejkakoneuan Esaú yejuan chantij ipan on tlajli Seir. Niman yejuamej nemouejkafamilias. Yejuamej mechmakajsiskej. Yejua ika, noneki san kuajlotika xpanokan.⁵ Maka nenkinuijsokiskej pampa nejua xnemechmakas nion pitetsin imintlal. Xnemechmakas pampa on tepemej de Seir

inyaxkauan iuejkakoneuan Esaú. Nejua onikinmakak yejuamej. ⁶Nemejuamej nenkintlajtlaniliskej ma mechnamakiltikan tlakuajli niman on atl yejuan nenkoniskej. ⁷NemoTEKO Dios omechtiochiu ipan nochi on tlajtlamach* yejuan onenkichijkej. Omehcuidaroj kampa nenkistinemiyaj ipan on ueyi xalpatlajkan nochi on 40 xipan. Yejua nemiya nemouan, niman xitlaj* omechpoloj.

⁸Otikpanokej imintlal on yejuan ken tikintaj yejuan iuejkakoneuan Esaú yejuan chantij ipan on tlajli Seir. Otikpanokej on ojtli de Arabá de Elat, niman de Ezión-guéber. Kemaj otiajkej ne xalpatlajkan ipan on ojtli yejuan panoua Moab.

⁹Kemaj toTEKO onechijlij: 'Maka xkimpajsolokan, nion maka xkinuijsokikan on Moabitas, pampa yejuamej iuejkakoneuan Lot, niman xnemechmakas nion pitentsin imintlal. Nejua yonikinmakak on tlajli Ar para inyaxka yes.' ¹⁰(Ye uejkau i pan in tlajli chantiyaj on emitas. Yejuamej sanoyej uejueyitlakamej niman sanoyej miyekej katkaj. Yejuamej uejueyimej katkaj ken ikoneuan Anac. ¹¹Yejuamej kinkuitiyaj uejueyi tlakamej niman intoka katka refaitas, pero on moabitas kintokayotiyaj emitas. ¹²Achtoj ipan on tlajli Seir chantiyaj on horeos, pero iuejkakoneuan Esaú okinkixtijkej, ijkon ken on israelitas okinkixtijkej imintlaelikniuan ipan on tlajli yejuan toTEKO yokimaxkatij.)

¹³Kemaj toTEKO okijtoj: 'Xnejnemikan niman xpanokan on atlautli itoka Zered.' Niman kemaj otikpanokej on atlautli.

¹⁴Desde ijkuak otikiskej Cades Barnea hasta on tonajli ijkuak otikpanokej on atlautli Zered, opanok 38 xipan. Ipan on tonaltin yomikaj nochimej on tlakamej yejuan kipiayaj sempoajli xipan para tlakpak yejuan ueliyaj tlauijsokiyaj. Ijkon onochiu ken toTEKO onotlajtolmakaka ika itokatsin. ¹⁵ToTEKO okichiu ikan ipoder para ma mikikan nochimej on tlakamej hasta kaman otlankej.

¹⁶'Ijkuak nochimej yomikej on tlakamej yejuan tlauijsokiyaj, ¹⁷toTEKO onechnots niman onechijlij: ¹⁸'Aman nenkipanoskej on tlajli Moab niman nenyaskej para on tlajli itoka Ar. ¹⁹Pero ijkuak nemajsiskej intech on amonitas yejuan no iuejkakoneuan Lot, maka nenkimpajsoloskej nion maka nenkinuijsokiskej, pampa xnemechmakas nion pitentsin imintlal yejuan yejuamej yonikinyaxkatij.'

²⁰(In tlajli, no kixmatiyaj ken imintlal on uejueyi tlakamej intoka refaitas pampa ye uejkau ompa chantiyaj, pero on amonitas kinkuitiyaj on tlakamej zomzomeos. ²¹In uejueyitlakamej sanoyej miyekej katkaj niman kojtikey katkaj ken iuejkakoneuan on ueyi tlakatl Anac. Pero toTEKO okintlamij

intechkopa on amonitas, niman kemaj yejuamej onochantijkej ipan on tlajli. ²²ToTEKO sano ijki okichiu ken okichiu iuan iuejkakoneuan Esaú yejuan chantiyaj ipan on tlajli Seir. Intechkopa okinkixtijkej on horeos, niman iuejkakoneuan Esaú ompa onochantijkej hasta aman. ²³No ijki, impan onochiu on heveos yejuan chantiyaj ipan on kalpanmej hasta Gaza. Oualajkej on caftoreos de on tlajli Caftor niman okinkixtikey para sakin* yejuamej ompa onokajkej niman onochantijkej.)

²⁴ToTEKO okijtoj: 'Xuiyan niman xpanokan on río Arnón. Nejua nemechmaktilis on amorreo Sehón yejuan rey de Hesbón, niman ipaís. Xkalakikan ipan itlal, xkuijsokikan niman peua xmoyaxkatikan iueyitlalpan. ²⁵Aman nejua nikchiuas para ma peua mechmakasikan on tlakamej nochiiuyan ipan tlaltikpaktli. Ijkuak on tlakamej san kakiskej mechteneuj hasta kuekuetlakaskej ika innemojtil.'

On israelitas okitlankej on rey Sehón

(Nm 21.21-30)

²⁶Desde ipan on xalpatlajkan Cademot, onikintitlan keskimej tlajtojkej para otlajtotoj san kuajlotika iuan Sehón on rey de Hesbón. Niman ijin okijlitoj: ²⁷Xtechkauili ma tipanokan ipan motlal, san tipanoskej ipan on ueyi ojtli kampa nochimej panouaj. Nion xtikalakiskej ipan motlal yejuan tlayekmakopa nion tlaepochmakopa. ²⁸Nochi tlakuajli yejuan tikuaskej niman atl yejuan tikoniskej tiktlaxtlauaskej ika tomin. San tiknekij xtechkauili ma tipanokan. ²⁹Xchiua ijkon ken otechkaulijkej iuejkakoneuan Esaú yejuan chantij Seir, niman on moabitas yejuan chantij Ar. Ma tiuiyan hasta tikpanoskej on río Jordán niman tajsiskej ipan on kuajli tlajli yejuan toTEKO Dios techmakas.

³⁰Pero Sehón, irey on ueyitlalpan Hesbón, xokinek otechkaulij ma tipanokan ipan itlal pampa toTEKO Dios okiyoltechikau. Ijin okichiu para ijkon ouel okitlalij on rey ipan nemoma ken aman yokichiu.

³¹Kemaj toTEKO onechijlij: Xkitaj, aman niktlalia ipan nemoma on rey Sehón niman nochi ipaís. Xpeuakan xmoyaxkatikan nochi ipaís.

³²On rey Sehón iuan nochi isoldados otechuijsokikoj ne Jahaza, ³³pero toTEKO Dios otechinmaktilij niman otikintlankej yejuamej, itelpochuan niman nochi isoldados. ³⁴Niman nochi on uejueyikalpanmej otikintokitskiltijkej, otikinxoxotonijkej, niman otikinmiktijkej nochimej on tlakamej, siamej niman kokonej. Xakaj otikajkej yoltikaj. ³⁵San otikintoyaxkatijkej on yolkej niman nochi on tlajtlamach* yejuan patioj, on tlen onkatka ipan on uejueyikalpanmej yejuan otikintlankej.

³⁶Desde on ueyikalpan Aroer yejuan nokaua itech on río Arnón, niman on ueyikalpan yejuan onkaj ipan on ixtlauatl hasta Galaad, nion se kalpan xouel otechixnamikej, pampa toTEKO Dios okichiu para nochimej ma tikintlanikan. ³⁷Pero xotiktoyaxkatijkej intlaluan on amonitas, on región yejuan onkaj itempan río Jaboc, on kalpantin yejuan onkaj ipan tepemej niman oksekimej yejuan toTEKO Dios xotechkauilij ma tikinuijsokikan.

On israelitas okitlankej Og, yejuan rey de Basán

(Nm 21.31-35)

3 ¹Kemaj otiajkej ipan okse ojtli, niman otiajkej ipan on ueyitalpan Basán. Pero Og, yejuan rey katka ipan on país Basán, ouajlaj iuan nochimej isoldados para otechuijsokiko ipan on ueyikalpan itoka Edrei.

²Kemaj toTEKO onechijlij: ‘Maka xmakajsi, pampa yejua iuan isoldados niman nochi imimpaís yonemechmaktij. No ijki, xkinchiuilikan ken onenkichiuilijkej on rey Sehón iminrey on amorreos yejuan chantiya ipan on tlajli Hesbón.’

³Ijkon tej, toTEKO Dios otechkauilij ma tiktlanikan on rey Og iuan nochimej isoldados. Niman otikinmiktijkej nochimej. Xakaj otikajkej yoltikaj. ⁴No ijki, otikintoyaxkatijkej 60 uejueyikalpanmej yejuan onkatkaj ipan iueyitalpan Argob, yejuan iyaxka* katka Og irey on ueyitalpan Basán. ⁵Nochi on uejueyikalpanmej kuajli yeualtsakutikatkej ikan tepantli sanoyej tlakpak, niman no kipiayaj uejueyi tsakuilomej niman tepostsastin para tlatsakuayaj. Niman no xteuan otikimpojkej on oksekimej kalpanmej yejuan xyeualtsakutikatkej ikan tepantli. ⁶Otikinchiuilijkej ijkon ken otikchiuilijkej Sehón rey de Hesbón. Otikinxotonijkej nochimej iuejueyikalpanuan, niman otikinmiktijkej nochimej on tlakamej, siamej niman kokonej. ⁷San otikintoyaxkatijkej iminyolkauan, niman nochi on tlajtlamach* yejuan patioj de totlueliknluan.

⁸Ijkon tej, ipan on tonaltin otikintoyaxkatijkej nochi on uejueyitalpantin de on omemej reyes amorreos yejuan chantiyaj itech on río Jordán, kampaka ikisayan tonaltsintli. Otikintoyaxkatijkej on uejueyitalpantin desde itech on río Arnón hasta on tepetl Hermón. ⁹(On tepetl Hermón, on sidonios kitokayotiaya Sirión, niman on amorreos kitokayotiayaj Senir.) ¹⁰Otikintoyaxkatijkej nochi on uejueyikalpanmej ipan on ixtlauatl, on ueyitalpan Galaad niman Basán hasta on uejueyikalpanmej Salca niman Edrei. On uejueyikalpanmej iyaxka* katka on rey Og de Basán.

¹¹On rey Og sa iselti nokauaya de on uejueyi tlakamej yejuan imintoka refaitas. Itepostlapech on rey Og katka nauí metro

uan tlajko ika ueyak niman ome metro ika patlauak. On tepostlapechtli sanken* onkaj ipan on ueyikalpan Rabá, ipan intlalpan on amonitas.

**Ome tribu* uan tlajko onokajkej itech on río Jordán
kampaka ikisiyan tonaltsintli**

(Nm 32.1-42)

¹²Ipan on tonaltin ijkuak ye kuajli yotikttoyaxkatijkej on tlajli, onikmakak itribu* Rubén niman itribu* Gad, on tlajli yejuan ompejtok desde Aroer ipan on río Arnón, hasta tlajkotipan on tepemey de Galaad iuan nochi iuejueyikalpanuan. ¹³On itlajkotribu* Manasés onikmakak on okse tlajkotipan tlajli de on tepemey de Galaad, niman onikmakak nochi on iueyitlalpan Basán kampa tlamandarouaya on rey Og. Niman nochi iueyitlalpan Argob yejuan onkakta ipan on iueyitlalpan Basán, kitokayotiyaj iminueyitlalpan on refaítas. In kijtosneki iminueyitlalpan on uejueyi tlakamej. ¹⁴Jair, iuejkakoneu* Manasés, okinotilanilij nochi on región de Argob hasta kampa iuan nonamiki on tlajli de Gesur niman de Maaca. Niman hasta aman Basán no kitokayotij Havot-jair. ¹⁵On tlajli de Galaad onikmaktij Maquir. ¹⁶Niman on tribus de Rubén niman Gad, onikinmakak on tlajli yejuan peua itech Galaad niman panoua hasta on río Arnón. Kampaka sur, on tlajli tlantoya itlajkotian on ixtlauatl, niman ajsitoya hasta on río Jaboc kampaka norte ika kampa nonamikiyaj iminuan on amonitas. ¹⁷Kampaka ikalakiyan tonaltsintli, imintlal nonamikiya iuan on río Jordán, desde ipeuyan on ananko Cineret kampaka norte ika, hasta itech on mar Arabá yejuan no itoka Mar Muerto kampaka ikisiyan tonaltsintli. Ompa nonamikiya iuan itsintlan on tepetl Pisga.

¹⁸Ipan on tonajli onemechmakak in tlanauatijli: 'ToTEKO Dios mechmaktilia in tlajli yejuan onkaj ikisiyan tonaltsintli on río Jordan para nemoyaxkatiskej. Nochimej yejuan uelij tlauijsokij ma kuikan intepos niman ma kinyekanakan inchanejkauan israelitas. ¹⁹Ipan on uejueyikalpanmej yejuan yonemechmakak san nokauaskej on siamej, on kokonej niman nochi on miyekej yolkej yejuan nejua nikmatstikaj nenkipiyaj. ²⁰Xuelis nemokuepaskej ipan on tlajli yejuan yonemechmakak, hasta ijkuak nemoTEKO Dios yokinmakak nochimej on israelitas kanon noseuiskej, itech on río Jordán kampaka ikalakiyan on tonaltsintli. Kemaj, uelis nemokuepaskej ipan nemotlal yejuan yonenkiselijkej itech on río Jordán kampaka ikisiyan tonaltsintli.

²¹'No ijki, onikijlij Josué: 'Ika mixtololojuan yotikitak nochi on tlen moTEKO Dios okichiu iuan on omemej reyes. Niman no ijki kichiuas iuan nochimej on sekimej reyes kampaka tias.

²²Maka xkinmakajsikan pampa moTEKO Dios, yejua teuijsokis nemopampa.’

ToTEKO xokauilij Moisés ma kalaki Canaán

²³Ipan on tonajli onikyemankatlajtlanilij toTEKO niman onikijlij: ²⁴NoTEKO yejuan tikpiya nochi poder, yotipeu tinechititia moueyilis niman mopoder. Xnemi okse Dios ipan iluikak, nion ipan tlaltikpak yejuan uelis kichiuas on tlajtlamach* milagros* yejuan tejua tikchiua. ²⁵Nimitsiknotlajtlanilia: ‘Xnechkauili ma nikpano on río Jordán para nikitás on kuajli tlajli iuan on kualtsin tepeyoj niman iueyitalpan Líbano.’

²⁶‘Pero san nemopampa, toTEKO okualan nouan, niman maski oniktlajtlanilij, xonechkauilij ma nikalaki ipan on tlajli. Yej onechijlij: ‘¡Ma ijki! Maka sa más xnechijli on. ²⁷Xtlejko hasta ikuapan on tepetl Pisga niman xontlacha kampaka norte, kampaka sur, kampaka ikisayan tonaltsintli niman kampaka ikalakiyan tonaltsintli. Xkonta on kuajli tlajli pampa on río Jordán xuelis tikpanos. ²⁸Xnauati Josué niman xyolchikaua pampa yejua kinyekanas on israelitas para kalakiskej ipan on tlajli. Niman yejua kinmaktilis on kuajli tlajli yejuan tejua tikitas.’

²⁹Niman otitokajkej ipan on ixtlauatl ixpan Bet-peor.

Moisés kinnauatia on israelitas ma tetlakamatikan

4 ¹‘Kemaj Moisés okinmijlij on israelitas: ‘Aman tej, israelitas, nemochimej* xkakikan on leyes niman on tlanauatiltin yejuan nemechititia, niman xkintlakamatikan. Ijkon xchiuakan para nenkipiyaskej nemilistli niman ijkon uelis nenkalakiskej ipan on kuajli tlajli yejuan mechmakas iminTEKO Dios nemoachtojtajuan. ²Maka xtlalilikan okseki tlanauatijli nion maka xkixtilikan itlaj tlanauatijli yejuan nemechmaka. Yej xkintlakamatikan itlanauatiltin toTEKO Dios, yejuan nejua nemechnauatia. ³Nemejuamej yonenkitakej kenijki nemoTEKO okinmiktij on israelitas yejuan okimauistilijkej on dios Baal ipan on tepetl Baal-peor. ⁴Pero nemejuamej yejuan xonenkitlalkauijkej toTEKO Dios sanken* nennemij hasta aman.

⁵‘Xkitakan, nejua yonemechmachtij ika on leyes niman ika on tlanauatiltin yejuan noTEKO Dios onechnauatij ma nemechmaka para nemejuamej xchiuakan ipan on tlajli yejuan aman nenkiseliskej para nemoyaxka* yes. ⁶Xkejeuakan niman xchiuakan tlen mechnauatia, para ijkon kitaskej on tlakamej de oksekimej naciones ika nentlamatkej* niman kuajli nentlamachilisyeykej. Niman ijkuak yejumej kakiskej in tlanauatiltin, ijkin kijtoskej: ‘Sa ye melauak, in sen ueyi nación

yejuan tlamatki* niman kuajli tlanemilia.⁷ ⁷Niman on melauak pampa ¿katlejua nación sanoyej ueyixtikaj yejuan imindios sanoyej nisiu iminuan nemi, ijkon ken tejuamej touan nemi toDios niman technankilia nochipa ijkuak tiknotsaj? ⁸Niman, ¿katlejua nación sanoyej ueyixtikaj yejuan kipiya leyes niman tlanauatiltin yejuan sanoyej melajki ken in yejuan aman nikan nemechmakatikaj?

⁹Yejua ika tej, xmejeuakan, niman maka kaman nenkelkauaskej on tlajtlamach* yejuan yonenkitakej. Ma nokaua ipan nemoyojlo niman ipan nemotlamachilis nochi tonaltin hasta nenmikiskej. Niman xkintlajtlajtouilkan nemokoneuan niman nemoxuiuan.

ToTEKO tlajtoua ipan on tepetl Sinaí

¹⁰Ipan on tonajli ijkuak nemejuamej nennemiyaj ixpan toTEKO Dios ipan on tepetl Sinaí, toTEKO onechijlij: 'Xkinsentlali nochimej on israelitas para kakiskej notlajtoltsin niman ijkon ueliskej nechtlakaitaskej ipan nochi tonaltin de innemilis. Niman ma kinmachtikan iminkoneuan para no ijki ma kichiuakan.'

¹¹Nemejuamej onenmotelketskej tlatsintlan de on tepetl, kampa kisaya tlitl, yejuan tlejkouaya sanoyej tlakpak, niman nochiuaya sen moxtli tilauak yejuan tlijijki. ¹²Kemaj toTEKO omechnots ijtik on tlitl. Nemejuamej onenkakkej itlajtoltsin, pero xitlaj* onenkitakej itlachalis. ¹³Niman toTEKO omechixpantilij ipacto* yejuan kipiya majtlaktli tlanauatiltin, yejuan okijkuiloj ipan ome tepatlachtli. Niman omechnauatij xtlakamatikan tlinon tlanauatia. ¹⁴Nejua onechnauatij ma nemechititi on leyes niman on tlanauatiltin yejuan noneki nenkichiuaskej ipan on tlajli yejuan nenkiseliskej para nemoyaxka* yes.

Tlanauatijli para maka kintlakaitaskej on ídolos

¹⁵Ipan on tonajli ijkuak toTEKO omechnots ipan on tepetl Sinaí desde ipan on tlitl, nemejuamej xitlaj* onenkitakej itlachalis. Yejua ika tej, xpiyakan miyek cuidado, ¹⁶para maka nenkichiuaskej on tlen sanoyej xkuajli. Maka nenkichijchiuaskej sen tlaixkopinajli yejuan nesis ken sen tlakatl noso ken sen situatl, ¹⁷nion sen tlaixkopinajli de itlaj yolki, nion itlaj tototl yejuan patlani, ¹⁸nion yolkej yejuan noteuilanaj ipan tlajli noso michimej. ¹⁹Niman ijkuak nemajkotlachaskej ipan cielo, niman nenkintaskej on sitlalimej, tonaltsintli, metstli, niman nochi on tlajtlamach* yejuan onkaj tlakpak, maka nenkinekiskej nenkinmauistiliskej, pampa nemoTEKO Dios okichijchiu nochi on tlajtlamach* para nochimej tlakamej ipan in tlaltikpaktli. ²⁰Pero nemejuamej, toTEKO omechkixtij de on tlajli Egipto

kampa sanoyej nentlajyouiyayaj. Omechkixtij para omechtlalij nenteyaxkauan* san yejua itech, ken aman nennemij. ²¹Niman toTEKO okualan nouan nemopampa, niman onotlajtolmakak ika itokatsin ika nejua xnipanós ipan on río Jordán, nion xnikalakis ipan on kuajli tlajli yejuan nenkiseliskej. ²²Ijkon tej, maski nejua nimikis ipan in tlajli niman xnipanós on río Jordán, nemejuamej kemaj, nempanoskej niman nemoyaxkatiskej on kuajli tlajli. ²³Pero xpiyakan miyek cuidado para maka nenkelkauaskej on pacto* yejuan nemoTEKO Dios okichiu nemouan. Maka nenkichijchiuaskej itlaj ídolo, nion laixkopinajli yejuan nemoTEKO Dios yomechijlij maka xchijchiuakan ²⁴pampa nemoTEKO Dios, yejua sen Dios yejuan xkixikos kitas nenkinmauistiliaj oksekimej dioses. ¡Yejua ken sen tlitl yejuan nochi kitlatia!

²⁵Ijkuak nemejuamej nenkimpiyaskej nemokoneuan niman nemoxuiuan, niman yonenuueuentsintiakej ipan on kuajli tlajli, maka nenkimochijchiuiliskej nemoídolos noso laixkopinaltin de tlajtlamach*. Yejua ika, in nentlajtlakoskej ixpan toTEKO, niman yejua sanoyej kualanis nemouan. ²⁶Nejua aman niktestigojtlalia on cielo niman in tlaltikpaktli, ika nimantsin nempoliuiskej ipan on tlajli yejuan aman nenkimoyaxkatiskej, ijkuak nempanoskej on río Jordán. Pampa ipan on tlajli, xuejkauis nennemiskej, yej saniman nenmikiskej nemochimej*. ²⁷ToTEKO mechsesemanas nochiuiyan imanian naciones, niman sa nenkeskimej yeskej yejuan xnenmikiskej. ²⁸Ompa ipan on naciones nenkinmauistiliskej dioses yejuan kinchijchiuaj on tlakamej, dioses de kojtlí* niman de tetl yejuan xtlachaj nion xtlakakij, niman xtlakuaj, nion xnijyotiaj.

²⁹Pero tla ompa nenkitejtemouaj nemoTEKO Dios ika nochi nemoyojlo, niman ika nochi nemoalma, nenkinextiskej. ³⁰Ijkuak yopanok miyek tonaltin ika yonentlajyouijkej niman yonenkipixkej miyek ajmantli, tla nemejuamej nenkelnamikij nemoTEKO Dios niman tla nenkitlakamatij, ³¹yejua sen Dios yejuan sanoyej tetlajsojtla. Xmechtlauelkauas, nion xtlamis mehmiktis nemochimej*. Niman no xkelkauas on pacto* yejuan okintlajtolmakak ika itokatsin nemoachtotajuan.

³²Xkixtlalokan nochi tlen onochiu ijkuak xe nentlakatiyaj, desde ijkuak Dios okichijchiu on achtoj tlakatl ipan tlaltikpaktli. Xtejemokan desde ipeuyan on cielo hasta kampa ontlami. Xkitakan tla yonochijka itlaj kenin yejuan sanoyej tetlatlachaltij, noso tla kamanian yonenkimatkaj onochiu itlaj kenin. ³³¿Manin nemij oksekimej tlakamej yejuan okakkej itlajtoltsin Dios yejuan okinnots desde ipan sen tlitl ken nemejuamej onenkakkej omechnots niman xonenmikkej? Nemechijlia: Ika ka. ³⁴¿Manin

nemi sen dios yejuan okinmanauij tlakamej yejuan nemiyaj esclavos itech sen nación ika tetlatlatalistin para kitas tla kuajli iminyojlo, ika uejueyi tlamausoltin, ika uejueyi milagros, ika tlauijsokilistli niman ika iueyi poder ken nemoTEKO Dios okichiu ne Egipto, nemixpan niman nemopampa? Nemechijlia: Ika ka. ³⁵ToTEKO omechtitij nochi in tlajtlamach* para xmatikan ika yejua melauak Dios, niman xnemi okse ken yejua. ³⁶Yejua omechnots desde iluikak para omechmachtij, niman ipan tlaltikpaktli omechititij sen ueyi tlitl, niman ompa ipan on tlitl omechnots.

³⁷Yejua okintlajsojtlak* nemoachtojtajuan, niman okintlapejpenij inuejkakoneuan. Yejua ika, sa no yejua omechkixtij Egipto ikan iueyi poder. ³⁸Niman okinkixtij nemotech naciones yejuan más uejueyimej niman más kojtikey xken nemejuamej, pampa kinekiya mechmakas imintlal ijkon ken aman nochijtikaj.

³⁹Yejua ika, kuajli xkejeuakan ipan nemotlamachilis niman maka xkelkauakan ika nemoTEKO san yejua melauak Dios ipan in tlaltikpaktli niman ipan iluikak, niman ika xnemi okse más ken yejua. ⁴⁰Xtlakamatikan ileyas niman itlanauatiluan yejuan nejua nemechmaka ipan in tonajli. Ijkon kuajli nennemiskej, nemejuamej niman nemouejkakoneuan. Nennemiskej miyek xipan ipan on kuajli tlajli yejuan nemoTEKO Dios mechmakas para nochipa.”

On uejueyikalpanmej kampa uelis nomanauiskej

⁴¹Kemaj Moisés okitlapejpenij yeyi uejueyikalpanmej ipan ilado on río Jordán kampaka ikisayan tonaltsintli, ⁴²para tla sen tlakatl okimiktij yakaj yejuan xsan okiyokolij, uelis nomanauis ipan semej de on yeyi uejueyikalpanmej pampa ompa xakaj uelis kitlakuepiltis. ⁴³On uejueyikalpanmej ijkin intoka katka: Baser, yejuan onokau ipan on xalpatlajkan ipan imintlal itribu* Rubén para on rubenitas, Ramot de Galaad yejuan onokau ipan imintlal itribu* Gad para on gaditas, niman Golán de Basán yejuan onokau ipan imintlal itlajko tribu* Manasés para yejuamej.

ToTEKO okinmakak tlanauatiltin on israelitas

⁴⁴In yejua on leyes niman temachtiltin yejuan Moisés okinmakak on israelitas. ⁴⁵Ijkuak on israelitas okiskej ipan on tlajli Egipto, Moisés okinmakak in tlanauatiltin, leyes niman okseki tlajtlamach* tlanauatiltin. ⁴⁶Ijkon okichiu chika sanken* nemiyaj itech on río Jordán kampaka ikisayan tonaltsintli ipan on ixlauatl ixpan on kalpan Bet-peor itlal Sehón, rey de on amorreos yejuan chantiya ipan on ueyikalpan Hesbón. Ompa

Moisés iuan on israelitas okintlankej ijkuak oualejkej ipan on tlajli Egipto. ⁴⁷On israelitas okinoyaxkatijkej itlal niman no okinoyaxkatijkej itlal Og yejuan rey katka ne Basán. On omemej reyes katkaj de on amorreos yejuan chantiyaj kampaka ikisayan tonaltsintli de on río Jordán. ⁴⁸Iminueyitlalpan peytoya desde on kalpan Aroer itech on río Arnón niman ajsitoya hasta itech on tepetl Sirión, yejuan no kitokayotiayaj Hermón, ⁴⁹niman nochi iueyitlalpan Arabá itech on río Jordán kampaka ikisayan tonaltsintli hasta itech on Mar Muerto^b yejuan nokaua tlatsintlan de on tepetl itoka Pisga.

On majtlaktli tlanauatiltin

(Ex 20.1-17)

5 ¹Moisés okinsentlalij nochimej on israelitas niman okinmijlij:

—Xkakikan, israelitas, in leyes niman on tlajtlamach* tlanauatiltin yejuan aman nemechijlia. Xkimixmatikan kuajli niman xkintlakamatikan.

²ToTEKO Dios okichiu sen pacto* touan ipan on tepetl Sinaí.

³Yejua okichiu on pacto* xsan iuan touejkatajuan, yej no okichiu touan tejuamej yejuan aman tinemij nikan. ⁴ToTEKO ipan on tepetl niman ijtik on tilitl, ouajlaj otlajtoko nemouan.

⁵Ijkuakon nejua ninemiya tlajkotian de toTEKO niman nemejuamej, para nemechijliaya itlajtoltsin, pampa nemejuamej onenkimakaskej on tilitl niman xonentlejkokej ipan on tepetl. Niman ijkin okijtoj toTEKO:

⁶“Nejua ninemoTEKO Dios yejuan onemechkixtij ipan on tlajli Egipto kampa nenesclavos katkaj.

⁷Maka xkinmauistilikan oksekimej dioses, yej san xnechmauistilikan nejua.

⁸Maka xchijchiuakan itlaj ídolo yejuan kipiya itlachalis ken itlaj yejuan onkaj ipan cielo, nion itlaj yejuan onkaj ipan in tlaltikpaktli, nion itlaj yejuan onkaj ijtik atl. ⁹Maka xmotlakuantelketsakan imixpan on ídolos yejuan tlachijchijtin, nion maka xkinueyiteneuakan, pampa san nejua niDios ninemoTEKO niman xnikxikos nikitás nenkinmauistilij oksekimej dioses. Niman ijkuak nikincastigaros on tatajtin yejuan xkinekij nechtlakamatiskej, on castigo no kimajsis inkoneuan, niman hasta ika yexpa inmixuiuan. ¹⁰Pero on yejuan nechtlajsojtlaj* niman kichiuaj notlanauatiltin, nikinmiknelis niman nikintlasojtlas inkoneuan, niman inmixuiuan niman hasta miles iminuejkakoneuan.

b 4.49 In mar no itoka Ueyi Atl, noso Ueyi Atl de istatl, noso Ueyi Atl Arabá.

¹¹’Maka san nenkaj xkijto notokatsin nejua moTEKO Dios, pampa xkuajli. Nejua ika onkaj nicastigaros on yejuan san kamanalijtos notokatsin.

¹²’Maka xkelkaua timoseuis ipan on tonajli Sábado, yej xtekitilti para tinechmauistilis nejua moTEKO Dios ken nejua onitlanauatij. ¹³Xtekiti chikuasen tonajli niman xchiua nochi on motekiu yejuan noneki tikchiuas. ¹⁴Pero ipan on ika chikome tonajli, xmoseui niman xnechmauistili nejua moTEKO Dios. Ipan on tonajli xuelis titekitis, nion maka xkauili ma tekiti motelpoch, nion mochpoch, nion moesclavo, nion moyolkauan, nion on yejuan xchanej yejuan nemi ipan mochan. Para ijki moesclavo niman moesclava no noseiskej ken tejua. ¹⁵Xkelnamiki ika tejua no tinemiya esclavo ipan on país Egipto kampa nejua moTEKO Dios onimitskixtij ikan noueyipoder. Yejua ika, nejua nimitsnauatia xkejeua on tonajli sábado.

¹⁶’Xtlakaita motataj niman monanaj ijkon ken nejua moTEKO Dios yonimitsnauatij, para tinemis miyek xipan ipan on tlajli niman para nochi kuajli kisas mouan ipan on tlajli yejuan nimitsmakas nejua moTEKO Dios.

¹⁷’Maka xtemikti.

¹⁸’Maka iuan xmoteka yejuan xmosiuau noso xmoueuentsin.

¹⁹’Maka xtlachteki.

²⁰’Maka xtlajtolketsteuili yakaj.

²¹’Maka xkeleui ikal yakaj, nion isiuau, nion iesclavo, nion iesclava, nion iuakax, nion ipoloko*. Maka itlaj xkeleui on tlen teyaxka.”

On israelitas okimakaskej toTEKO

(Ex 20.18-26)

²²’In yejua tlanauatiltin yejuan toTEKO okijtoj chikauak ijtik on tlitl niman ijtik on moxtli tilauak ijkuak nochimej onemosentlalijkej tlatsintlan de on tepetl. Niman xokuitlaj más tlanauatiltin okijtoj. Kemaj okijkuiloj in tlajtoltilin ipan ome tepatlachtli, niman onechmakak. ²³Ijkuak onenkakkej itlajtoltsin yejuan kisaya ijtik on tlayouajlotl niman onenkitakej on tepetl tlatlaya, nemochimej* nemejuamej, niman on tlayekankej de cada tribu* niman on uejueyixtokej tlayekankej onenuajlajkej onentlajtokoj nouan. ²⁴Niman onennechijlijkej: “Melauak, aman toTEKO Dios yotechitij iueyilis niman ipoder, niman yotikakkej itlajtoltsin yejuan kisaya ijtik on tlitl. Aman yotikitakej ika Dios ueli tlajtoua iuan tlakamej niman yejuamej xmikij. ²⁵Pero tla oksejpa tikakiskej itlajtoltsin toTEKO Dios, on ueyi tlimilinajli uelis techmiktis. Yejua ika, más kuajli yeskia tla xok tikakiskej oksejpa technotsas ikan itlajtoltsin. ²⁶¿Akinon desde ijtik on ueyi

tlitl yokak itlajtoltsin on Dios yoltikaj niman sanken* nemi ijkon ken tejuamej yotikakkej niman xotimikej? ²⁷Más kuajli tejua xkaki nochi on tlen toTEKO Dios mitsijlis. Kemaj uelis titechijlis on tlen omitsijlij, niman tejuamej tikchuiaskej nochi on tlen technauatis.”

²⁸Chika nemejuamej nentlajtlajtojtikatkej nouan, toTEKO kaktikatka nochi on tlen nenkijtouayaj. Kemaj onechijlij: “Yonikak nochi on tlen okijtojkej on israelitas niman kuajli on tlen okijtojkej. ²⁹Sanoyej kuajli yeskia tla nochipa ijki tlanemiliskiaj, niman nechtlakaitaskiaj, niman kitlakamatiskiaj notlanauatiltin nochi tonaltin. Tla ijkon kichiuaskiaj, nochi kuajli kisaskia para yejuamej niman iminkoneuan. ³⁰Aman xuiya niman xkinmijliti para ma nokuepakan iminchan. ³¹Pero tejua xmokaua nikan nouan pampa nimitsijlis nochi on tlajtlamach* tlanauatiltin niman leyes yejuan noneki tikintitis para ma kichiuakan ipan on kuajli tlajli yejuan nikinmakas.

³²Yejuia ika tej, xchiuakan nochi on tlen toTEKO Dios yomechnauatij niman maka nenkelkauaskej nion achijtsin.

³³Xuiyan ipan on ojtli yejuan toTEKO Dios yomechtlalilij para nennemiskej miyek xipan ipan on tlajli yejuan mechmakas, niman nochi kuajli kisas nemouan.

On ueyi tlanauatijli

6 ¹In yejuia tlanauatiltin niman leyes yejuan nemoTEKO Dios yonechnauatij ma nemechmachi para nenkintlakamatiskej ipan on tlajli yejuan nenkiseliskej para nemoyaxka* yes. ²In tlanauatiltin niman in leyes nemechmaka para xmakajsikan niman xtlakaitakan nemoTEKO Dios, nemejuamej, nemokoneuan, niman nemoxuiuan, niman ijki nennemiskej miyek xipan ipan on tlajli yejuan nenkiseliskej. ³Aman tej israelitas, xchiuakan tlen nemechnauatia, niman nochi kuajli kisas para nemejuamej, niman nenkimpiyaskej miyekej nemokoneuan niman nemoxuiuan ipan on kuajli tlajli kampa sanoyej tlatlaci niman xitlaj* poliui, ijkon ken okimprometerouilij iminTEKO Dios nemoachtojtajan.

⁴Xkakikan israelitas: ToTEKO Dios san se nemi yejuan toTEKO.

⁵Xtlajsojtlakan nemoTEKO Dios ikan nochi nemoyojlo, ikan nochi nemoalma, niman ika nochi nemochikaualis.

⁶Xkejeuakan ipan nemotlamachilis nochi in tlanauatiltin yejuan yonemechijlij aman. ⁷Niman mojmostla xkinmachtikan nemokoneuan. Xkintlajtlajtouilikan on tlanauatiltin ijkuak nennemij nemochan, ijkuak nennejnemij ipan ojtli, ijkuak ye nenmotekaskej nenkochiskej niman ijkuak nemokuiteuaskej. ⁸In tlanauatiltin xtlajkuilolnextikan ipan kuetlaxtli, niman kemaj nenkitlaliskej ipan nemoma niman no nenkitlaliskej

nenmixkuatipan ken sen neskayotl. ⁹Niman no xkijkuilokan ipan on kojtin* yejuan ipan salijtikaj nemotsakuijlou niman ipan intsakuijlouan nemokaluau.

Moisés kinnauatia on israelitas ma kitlakamatikan toTEKO

¹⁰NemoTEKO Dios mechuikas ipan on kuajli tlajli yejuan okintlajtolmakak ika itokatsin nemoachtojtajuan Abraham, Isaac, niman Jacob para mechmakas. On sen tlajli yejuan kipiya uejueyikalpanmej yejuan kualtsitsimej, uejueyikalpanmej yejuan xnemejuamej onenkinchijchijkej. ¹¹Onyaskej kaltin tetentokej ikan miyek tlajtlamach* tlen sanoyej kuajli, yejuan xnemejuamej onenkitlalijkej. Onyaskej atlaltekontin yejuan xnemejuamej onenkimichkuakej, niman miyek uvasoy niman kojtin* de olivos yejuan xnemejuamej onenkitôkakej. Niman nentlakuaskej hasta nemixuikej. ¹²Ijkuak in nochias, maka nenkelkauaskej toTEKO yejuan omechkixtij ipan on tlajli Egipto kampa nenesclavos katkaj. ¹³Xmauistilikan nemoTEKO Dios niman san yejua xtekipanokan. Niman ijkuak nonekis nenkichiuaskej sen tlajtolmakalistli xchiuakan san yejua ika itokatsin. ¹⁴Maka xkinmauistilikan on dioses yejuan kinmauistiliaj on chanejkej ipan on kalpanmej yejuan nisiu onokej, ¹⁵pampa nemoTEKO Dios yejuan nemouan nemi, yejua sen Dios yejuan xkixikos kitas nenkinmauistiliaj oksejkimej dioses. Tla ijkon nenkichiuaskej, yejua kualanis nemouan niman mechmiktis para mechpopolos nemochimej* ipan in tlaltikpaktli.

¹⁶Maka xtlatlatakan nemoTEKO Dios ken onenkichijkej ne Masah. ¹⁷Xchiuakan nochi on tlanauatiltin yejuan toTEKO yomechmakak niman on leyes niman on tlamachtiltin yejuan yomechnauatij. ¹⁸Xchiuakan on tlen melajki, niman tlen kuajli ixpan toTEKO, para nochi kuajli kisas nemouan, niman nenkimoyaxkatiskej on kuajli tlajli yejuan toTEKO okintlajtolmakak ika itokatsin nemoachtojtajuan. ¹⁹Niman toTEKO kichiuas para chojcholoskej nochimej nemotlaueliknluan yejuan nemouan nouijsokij, ijkon ken yokijtoj kichiuas.

²⁰Ijkuak yejkos on tonajli, nemokoneuan mechtlajtoltsiskej: “¿Tlinon kijtosneki nochi in tlanauatiltin, leyes, niman tlamachtiltin yejuan technauatia toTEKO Dios?” ²¹Nemejuamej ijkín nenkinnankiliskej: “Tejuamej tiesclavos katkaj itech on rey ipan on tlajli Egipto, niman toTEKO otechkixtij de ompa ikan ueyi poder. ²²Tejuamej otikitakej on temojtij tlamausoltin niman milagros* yejuan toTEKO okichiu ne Egipto itech on rey niman itech on ichanejkauan. ²³Pero tejuamej otechkixtij de ompa para otechajuikak ipan in kuajli tlajli yejuan okintlajtolmakak ika itokatsin toachtojtajuan, niman tejuamej no otechmakak.

²⁴Sakin, toTEKO Dios otechnauatij ma tikchiuakan nochi in tlanauatiltin niman ma tiktlakaitakan para ijkon nochi kuajli kisas touan, niman yejua techcuidaros para uejkauis tinemiskej ijkon ken hasta aman. ²⁵Ijkon tej, tejuamej tiyolmelajkanemiskej tla tikintlakamatij in tlanauatiltin ixpan toTEKO Dios ijkon ken otechnauatij.”

Tlanauatiltin para sen nemilistli tlatiochijtli

(Ex 34.11-17)

7 ¹NemoTEKO Dios kichiuas para xkalakikan ipan on tlajli yejuan nenkimoyaxkatiskej, niman kinkixtis nemoyakapan on heteos, gergeseos, amorreos, cananeos, ferezeos, heveos niman jebuseos, maski sanoyej ueueyimej naciones niman más kojtikey xken nemejuamej. ²Ijkuak nemoTEKO Dios yomechinmaktij on tlakamej, niman nemejuamej yonenkintlankej, nochimej kuajli xkintlaxoxotonilikan, niman maka iminuan nemotlajtolmakaskej, nion maka xkinmiknelikan. ³Nion maka xmonamiktikan iminuan. Maka xkinnamiktikan nemotelochuan iuan iminichochuan, nion intelochuan iuan nemochochuan, ⁴pampa yejuamej kichiuaskej para nemokoneuan ma kitlalkauikan toTEKO, niman kinmauistiliskej oksekimej dioses. Kemaj itlauej toTEKO nemopan uajlas niman mehmiktis amanaman.

⁵In yejua noneki nenkichiuaskej: Xkinxoxotonilikan nochi intlaixpanuan*, xkintetlajtlapanakan on temej yejuan yejuamej kinmauistiliaj, niman xkintsojtsontekilikan on kojtin* yejuan yejuamej kitekitiltiaj para kimauistiliaj on dios Asera niman xkintlatikan nochi iminídolos yejuan kinmauistiliaj. ⁶Ijkon xchiuakan pampa nemejuamej israelitas toTEKO Dios omechtlapejpenij para onemochijkej iyaxkauan. ToTEKO omechtlapejpenij intech nochimej on tlakamej yejuan nemij ipan in tlaltikpaktli, para ijkin nemejuamej nentlakauiltin yeskej itech ken iyaxkauan.

⁷ToTEKO omechtlapejpenij nemejuamej xpampa tla nemonación más ueyi xken on oksekimej naciones, yej nemonación más pitentsin de nochimej yejuamej. ⁸ToTEKO omechkixtij ipan on país Egipto kampa nenesclavos katkaj, niman ikan ueyi poder omechkixtij ipan ima on rey de Egipto, pampa mechtlajsojtla niman okinek okichiu on tlen okintlajtolmakak ika itokatsin nemoachtajtajan.

⁹Kuajli xmatikan tej, ika nemoTEKO Dios san yejua melauak Dios. Yejua kichiuas ken kijtous ipan ipacto*, yejuan kichiu intech on tatajtin niman intech inkoneuan yejuan nentiuij. Niman kintlajsojtla yejuan no kitlajsojtlay yejua, niman kichiuaj

itlanauatiluan. ¹⁰ Pero kincastigaroua on yejuan kitlaelelitaj, niman xnouejkaua para kimpopoloua nochimej on yejuan kitlaelelitaj. ¹¹ Yejua ika, xtlakamatikan on tlanauatiltin, on leyes, niman on tlamachtiltin yejuan aman nemechnauatia xchiuakan.

Tlatiochiualistli para on yejuan kitlakamatis toTEKO

(Lv 26.3-13; Dt 28.1-14)

¹² Tla ijkuak yonenkakkej in tlanauatiltin, kuajli nenkichiuaaj ken mechnauatia, nemoTEKO Dios kichiuas on tlen okijtoj ipan ipacto*, niman on tlen okintlajtolmakak ika itokatsin nemoachtojtajuan. ¹³ Mechtlajsojtlas, mechtiochiuas, niman kichiuas para xmiyekiyakan. Kintiochiuas nemokoneuan niman nemotlatok, nemotriga, nemovino niman nemoaceite. Kintiochiuas nemouakaxuan niman nemoborregos para sanoyej ma miyekiyakan ipan on tlajli, yejuan okintlajtolmakak ika itokatsin nemoachtojtajuan ika mechmakas. ¹⁴ Nemejuamej más nentlatiochijtin yeskej xken nochimej on oksekimej tlakamej. Xnemis nemotsajlan nion sen siuatl niman nion sen tlakatl yejuan tetsakatl* yes. No ijki, intech nemoyolkauan, xnemis nion se okichyolki niman siuayolki yejuan tetsakatl* yes. ¹⁵ ToTEKO mechkixtilis nochi tlajtlamach* kokolistli. Niman xkauilis mechajsis on temojtikej kokolistin yejuan onenkitakej ipan on país Egipto. Yej kichiuas para nochimej on motlaelikniuan ma tlajyouikan ika nochi on temojtijkej kokolistin. ¹⁶ Nemejuamej noneki tlamis nenkinmiktiskej nochimej on tlakamej yejuan nemoTEKO Dios mechinmaktilis. Maka xkinmiknelikan nion maka xkinmaustilikan imindioses, pampa yejua ika on mechkajkayauaskej para xtlajtlakokan.

¹⁷ Manin ijkin nenkinemiliskej: “¿Kenijki uelis tikintlaniskej on tlakamej? Yejuamej más miyekej xken tejuamej.” ¹⁸ Pero maka xkinmakajsikan. Xkelnamikikan on tlen okichiuilij nemoTEKO Dios on rey niman nochimej on egipcios. ¹⁹ Xkelnamikikan on uejueyi tlamaisoltin yejuan toTEKO Dios okintitij, niman on uejueyi señales niman milagros* yejuan onenkitakej okichiu nemoTEKO Dios ika iueyi poder ijkuak omechkixtij ipan on país Egipto. Sa no ijki kichiuas toTEKO Dios iuan nochimej on tlakamej yejuan nemejuamej nenkinmakasij. ²⁰ No ijki, toTEKO Dios kintitlanis chilpamej intech on yejuan kinekiskej niyanaskej para nomanauiskej, niman kinkuajkuaskej hasta kinmiktiskej nochimej.

²¹ Ijkon tej, maka xmomojtikan imixpan pampa nemoTEKO Dios, on Dios sanoyej ueyi niman temojtij, nemi nemouan. ²² Ika yolik toTEKO kinkixtijtias on naciones. Nemejuamej xnenueliskej nenkinmiktiskej san setipan, pampa tla ijkon, nenkichiaskiaj

on tepeyolkej tekuanimej miyekiyaskej nemoyeualkan niman mechkuaskej. ²³ Pero nemoTEKO Dios ika yolik mechinmaktijltias in naciones. Niman Dios kichiuas ma mojkamikikan hasta kaman tlamis nenkinmiktiskej. ²⁴ Iminreyes mechinmaktilis niman nemejuamej nenkichiuaskej para maka sa yakaj ma kinmelnamiki. Nion semej yejuamej xueliskej mechixnamikiskej niman ijki nemejuamej nenkinmiktiskej nochimej.

²⁵ Nemejuamej nenkintlatiskej imindioses. Pero maka nenkinekiskej nenkuiskej on oro niman on plata yejuan okimalauilijkej on dioses, para maka mechkajkayauaskej, pampa tlamo nenkichiuaskej on tlen sanoyej xkuajli ixpan toTEKO Dios. ²⁶ Yejua ika, maka xkiktikan nemochan itlaj ídolo, pampa tla ijkon nenkichiuaskej, toTEKO mechpopolos ijkon ken yejuamej kimpopolos. Ijkin tej, nemejuamej xkinchichiitakan on ídolos pampa Dios kintlauelita.

Sen tlakatl xuelis nemis san ika tlakuajli

8 ¹ Xpiyakan cuidado para nenkintlakamatiskej nochi on tlanauatiltin yejuan aman yonemechnauatij. Ijkon uelis kuajli nennemiskej, niman nenmiyekiyaskej niman nenkalakiskej ipan on tlajli yejuan toTEKO okimprometerouilij nemoachtojtajuan. ² Xkelnamikikan ken nemoTEKO Dios omechyekekan ipan on xalpatlajkan 40 xipan. Yejua omechtlajyouiltij para omechyolyemanilij niman omechtlatlatak para okimat kenijki nemotlamachilis niman para okitak tla nenkichiuaskej itlanauatil noso ka. ³ Niman maski omechtlajyouiltij niman omechmayanaltij, sakin* omechkualtij maná, sen tlakuajli yejuan nemejuamej niman nemoachtojtajuan xnenkixmatiyaj. Ijkon omechititij ika xsan ikan tlakuajli uelis nemis sen tlakatl, yej noneki kineltokas nochi itlajtoltsin toTEKO. ⁴ Ipan on 40 xipan, xojsoliu nemotlaken, nion xonenixipojposajkej. ⁵ Xmatikan ipan nemoyojlo ika nemoTEKO Dios omechcastigaroj ken sen tajtli castigaroua ikoneu ijkuak kitlatsuiteki.

On israelitas okipixkej tlatlatalistin ipan on tlajli Canaán

⁶ Xchiuakan tej, nochi itlanauatiltin nemoTEKO Dios niman san yejua xtlakaitakan. Xchiuakan nochi tlen yejua yomechmachtij, ⁷ pampa toTEKO Dios mechuikas ipan sen kuajli tlajli, sen tlajli yejuan kipiya miyek ayajtoktsitsimej, akueponaltin, niman ameltin yejuan meyaj nochiuiyan ipan on ixtlauatl niman ipan tepemej. ⁸ On sen tlajli kampa onkaj nekutli, trigo, cebada, uvas, higueras, granadas niman miyek olivo kojtin* yejuan itech kixtiaj aceite. ⁹ Ipan on tlajli nemejuamej

xnenkontenmatstiaskej tlinon nenkikuaskej, pampa xitlaj* mechpolos. Ipan on temej yejuan ompa onkaj, nenkinextiskej on tepostli hierro, niman ipan tepemey nenkinextiskej on tepostli cobre. ¹⁰Pero sakin*, ijkuak yonentlakuajkej niman yonemixuikej, noneki nenkimakaskej tlaxtlauii nemoTEKO Dios, pampa omechmakak on kuajli tlajli.

Maka xkelkauakan toTEKO

¹¹Xpiyakan cuidado. Maka nenkelkauaskej nemoTEKO Dios. Maka nenkajkauaskej ika nenkichiuaskej nochi itlanauatilan, itemachtilan, niman ileyes yejuan yonemechnauatij aman. ¹²Ijkuak nentlakuaskej niman nemixuiskej, niman nenchantiskej ipan kuajli kaltin yejuan nenkinchijchiuaskej, ¹³niman nenkitaskej ika nemoyolkauan yomiyekiyakej, niman nemooro, niman nemoplata yomiyekiyak niman no nochi on okseki tlajtlamach* yejuan nenkipiyaj yomiyekiyak, ¹⁴maka nemoueyimatiskej, nion maka nenkelkauaskej nemoTEKO Dios yejuan omechkixtij ipan on país Egipto kampa nenesclavos katkaj. ¹⁵Yejua omechyekan ijkuak onenkistinenkej ipan on ueyi temojtij xalpatlajkan kampa nemij miyekej kouamej* pajyojkej, kolomej, niman kampa xonkatka atl. Pero toTEKO okichiu ma kisa atl ipan sen ueyi tetl niman onenkipixkej para onenmatlikej. ¹⁶Niman ipan on xalpatlajkan omechtlakualtij ikan maná, sen tlakuajli yejuan nemoachtotajuan xkixmatiyaj. Yejua omechtlajyouiltij para omechyolyemanilij niman omechtlatlatak para sakin* nochi kuajli nochius para nemejuamej.

¹⁷Maka kaman nenkinemiliskej ika nochi on ricojyotl yejuan nenkipiyaskej, onenkitlankej ika nemochikaualis. ¹⁸Xkelnamikikan nemoTEKO Dios, pampa yejua mechmaka chikaualistli, para nenkipiyaskej on ricojyotl. Ijkon yejua tlamis kichiuas on pacto* ken okintlajtolmakak ika itokatsin nemoachtotajuan.

¹⁹Pero tla nemejuamej nenkelkauaj nemoTEKO Dios, niman nenkintokaj oksekimej dioses, niman nekinmauistiliaj, nejua nemechmelajkaijlia aman ika nenpopoliuiskej nemochimej*. ²⁰Tla xnenkitlakamatij nemoTEKO Dios, no ijki nemopan nochius ken impan nochius on naciones yejuan toTEKO kimpopolojtias kampaka nempanotiaskej.

On israelitas tetlaniskej ika iueyi poder toTEKO

9 ¹Xkakikan israelitas. Aman nenkipanoskej on río Jordán niman nenkimoyaxtiskej intlal on naciones yejuan más uejueyimej niman más kojtikey xken nemejuamej, yejuan kipiayaj uejueyikalpanmej niman kuajli yeualtsakutokej ikan tepantli

sanoyej ueuejkapanmej. ²On tlakamej yejuan ompa nemij sanoyej kojtikey niman uejueyimej ken iuejkakoneuan Anac. Nemejuamej nenkixmatij on tlajtojli yejuan kijtousa: “¿Akinon ueli kinmixnamiki iuejkakoneuan on ueyi tlakatl Anac?”

³Aman tej, noneki nenkimatiskej ika nemoTEKO Dios yejua mechyekanas. Xmatikan ika yejua ken sen tlitl yejuan nochi kitlatia, niman nenkitaskej ken kinmiktis niman kintlajyouiltis on naciones. Nemejuamej nenkinkixtiskej niman nenkintlaniskej amanaman, ijkon ken toTEKO yomechijlij.

⁴Ijkuak nemoTEKO Dios yokinkixtij nemotech, maka nemojliskej: “Tejuamej techtokaroua tikseliskej in kuajli tlajli pampa tiyolmelajkej ixpan toTEKO. Yejua ika, techmaka.” ¡Ka! On xmelaauk. ToTEKO kintotokas on tlakamej nemoyekapan pampa sanoyej tlajtlakolejkej. ⁵Ka, xpampa nenkuajkualtin noso kuajli nenkichiuaj. Yejua kintotoka on tlakamej ipampa intlajtlakoluan niman no pampa toTEKO ika itokatsin kichiuas on tlen okintlajtolmakak nemoachtojtajuan Abraham, Isaac niman Jacob. ⁶Xmatikan ika toTEKO Dios xmechmaktilia on kuajli tlajli pampa nennemij melajki. On xmelaauk. Nemejuamej sanoyej nenyoltechikajkej.

Ijkuak on israelitas otlajtlakojkej

(Ex 31.18—32.25)

⁷Maka kaman nenkelkauaskej ika nemejuamej onenkualanijkej nemoTEKO Dios ipan on xalpatlajkan, desde on tonajli ijkuak onenkiskej ipan on país Egipto hasta ijkuak onemejkokej nikan, nochipa xipan onenkitakej.

⁸Ipan on tepetl Sinaí onenkualanijkej toTEKO, niman ika sanoyej okualan ne mouan hasta kinekiya mechpopolos. ⁹Nejua onitlejkok ipan on tepetl para onikinkuito on ome tepatlachtli yejuan kipiya ipacto* toTEKO yejuan okichiu nemouan. Niman ompa oninokau 40 tonajli niman 40 yejuajli. Xitlaj onikuaj, nion xitlaj* onikonik. ¹⁰⁻¹¹Ijkuak opanok 40 tonajli niman 40 yeuajli, toTEKO onechmakak on ome tepatlachtli kampa yejua okijkuiloj on tlanauatiltin yejuan omechijlijka ikuapan on tepetl ijtik on tlitl ipan on tonajli ijkuak tinochimej otitosentlalijkej. ¹²Kemaj onechijlij: “Xisiui, amanaman xtemo pampa on israelitas yejuan otikinkixtij Egipto yonixpolojkej. Amanaman okikajkej on kuajli ojtli yejuan onikin nauatij ma kitokakan. Okipatlakej oro niman yokinochijchiuilijkej sen idolo.”

¹³No ijki, toTEKO onechijlij: “Yonikitak ika on israelitas sanoyej tsontekonchikajkej*. ¹⁴Xmejkuani pampa nikinmiktis niman nikimpopolos imintoka ipan in tlaltikpaktli. Pero motechkopa nikchiuas sen nación yejuan más kipiya poder, niman más miyekej yeskej xken yejuamej.”

¹⁵ 'Ijkuak oniuajtemok de on tepetl yejuan tlikuitikatka, nikuajkiya ipan nomauan, on ome tepatlachtli yejuan kipiya on pacto*. ¹⁶ Pero onikitak ika nemejuamej yonentlajtlakojkej itech toTEKO, niman onenkipatlakej oro, niman onenkimochijchiuilijkej sen becerro. Ijkon onenkitlalkauijkej on kuajli ojtli yejuan toTEKO omechnauatij xtokakan. ¹⁷ On ome tepatlachtli yejuan nikuajkiya ipan nomauan, inka onitlamotlatiaj ipan tlajli, niman otetlajtlapankej nemixpan. ¹⁸ Sakin, oksejpa oninotlakuantelkets ixpan toTEKO ken yonikchijka achtoj 40 tonajli niman 40 yejuajli. Xitlaj onikuaj, nion xitlaj* onikonik. Ijkon onikchiu pampa sanoyej onentlajtlakojkej, niman sanoyej onenkualanijkej toTEKO. ¹⁹ Nejua onikmakas itlauel toTEKO nemopampa, pampa yejua kinekiya mehmiktis. Pero toTEKO oksejpa onechkak. ²⁰ ToTEKO no sanoyej kualantikatka iuan Aarón niman kinekiya kimiktis, pero nejua onikchiu oración ipampa, niman ikon onikmanauij. ²¹ Kemaj onikontilan on becerro yejuan nemejuamej onenkimochijchiuilijkej niman yejuan ika onentlajtlakojkej, niman onikontlajkal ipan tlitl. Kemaj, ijkuak kualtsin yonikuechtlij, onikonxinij ipan on ayajtok yejuan uajtemoua ipan on tepetl.

²² 'No ijki, onenkualanijkej toTEKO ijkuak nennemiyaj Tabera, niman Masah niman Kibrot-hataava. ²³ Niman ijkuak toTEKO omechnauatij xkisakan desde itech on tlajli Cades-barnea para xmoyaxkatitij on kuajli tlajli yejuan yomechmakak, xipan onenkitakej. Xonenkineltokakej toTEKO, nion xonenkitlakamatkej itlanauatil. ²⁴ Desde ijkuak nejua nemechixmati nemejuamej, nochipa xipan nenkitaj toTEKO. ²⁵ Nejua oninotlakuantelkets miyekpa ixpan toTEKO on 40 tonajli niman 40 yeuajli, pampa toTEKO yomechtlajtouilijka para mechpopolos.

²⁶ 'Niman ijkin onikyemankatlajtlanilij: "NoTEKO, maka xkimpopolo in israelitas yejuan tejua moyaxkauan*, yejuan tejua otikinmanauij ika moueyilis, niman otikinkixtij ipan on país Egipto ika moueyi poder. ²⁷ Xkimelnamiki motekitkauan Abraham, Isaac niman Jacob. Maka xkita inyoltechikaualis in israelitas, nion inxompayejeualis niman intlajtlakoluan. ²⁸ Para maka kijtoskej ipan on país kampa otitechkixtij: "InTEKO xouel okinuikak ipan on tlajli yejuan okimprometeroulij. Niman ika kintlauelita, okinkixtij de nikan san para kinmiktis ipan on xalpatlajkan. ²⁹ Pero yejuamej mokoneuan niman moyaxkauan*. Tejua otikinkixtij ipan on país Egipto ika moueyi poder."

Moisés oksejpa okiselij on pacto*

(Ex. 34:1-10)

10 ¹ Kemaj toTEKO onechijlij: "Xteki ome tepatlachtli yejuan no ijki ken on achtoj katkaj, niman no xchijchiua

sen yekcaja de kojtlí. Kemaj xuajtílejo ípan in tepetl. ²Nejúa níkiykuilos ípan on tepatlachtli on tlajtoltin yejúan yonikiykuilójka ípan on achtojmej tepatlachtin, yejúan tejúa otikintlajtlapan. Niman tikiñmeúas ípan on yekcaja.”

³Kemaj onikchiñchiu sen yekcaja de on kojtlí* itoka acacia, niman onikteke on ome tepatlachtli. Kemaj onikiktik on tepatlachtli iñkuak onitílekok ípan on tepetl. ⁴Niman toTEKO okiñkuilójka ípan on tepatlachtli on majtlaktli tlanauatiltin, iñkon ken okiñkuilójka on achtoj iñkuak otlajtojka nemouan desde iñtik on tlił ípan on tepetl iñkuak tinochimej otitosentlalíjkaj. Niman onechinmakak on tepatlachtli, ⁵niman nejúa oniuajtemok de on tepetl. Kemaj onikintlalíj on tepatlachtin ípan on yekcaja iñkon ken toTEKO onechnauatíj, niman aman sanken* ompa onokej.

⁶(On israelitas okiskej desde itech on ameltin de Beerot-bene-jaacán, niman oyajkej hasta Mosera. Ompa omik Aarón niman okitokakej. Kemaj Eleazar, itelpoch Aarón, yejúa onochiu ueyi tiopixki. ⁷De ompa okiskej niman oyajkej Gudgoda, niman de Gudgoda oyajkej Jotbata kampa onokej miyekej ríos. ⁸Kemaj ompa toTEKO okitlapejpeníj itribu* Leví para kiktiskej on yekcaja yejúan kipiya on pacto* yejúan toTEKO okichiú touan. No iñki, okintlapejpeníj para ma nemikan ixpan ken tiopixkej niman para ma tlatiochiuakan ika itokatsin toTEKO, iñkon ken kichiúaj hasta aman. ⁹Yejúa ika, on levitas xokiminmakakej iminherencia ken okiminmakakej on israelitas imikniuan, pampa toTEKO yejúa iminherencia, iñkon ken toTEKO okinmíjlij.)

¹⁰Nejúa oninokau ípan on tepetl 40 tonajli niman 40 yeuajli, ken achtoj onikchiñjka. Niman toTEKO oksejpa onechkak, niman yejúa ika, xok okinek omechpopolój.

¹¹Onechiñlij: “Xkinuika on israelitas niman xkinyekana ípan inojui para ma kalakikan niman ma kinoyaxkatitíj on kuajli tlajli yejúan onikintlajtolmakak ika notokatsin inuejkatajúan.”

On tlen toTEKO kineki xchiuakan

¹²Niman aman israelitas, ¿tlinon mechtíajtlanilia nemoTEKO Dios? NemoTEKO Dios, san kineki nemotlakaitalis niman nemotlakamatilis. Kineki xtlajsojtlakan niman xchiuakan itekiu ika nochi nemoyojlo niman ikan nochi nemoalma, ¹³niman xchiuakan nochi itlanauatíluan niman ileyes yejúan aman nemechnauatia, para nochi kuajli kisas para nemejuamej.

¹⁴Xmatikan ika nochi iyaxka* nemoTEKO Dios. Iyaxka on cielo yejúan ueli tikitaj niman on cielo yejúan más tlakpak kampa xok tikajxiliaj tikitaj, in tlatípkaktli, niman nochi yejúan ípan onkaj. ¹⁵Pero toTEKO okintlajsojtlak* nemoachtojtajúan, niman okintlapejpeníj san yejuamej, niman sakin*, nemejuamej

yejuan neniuejkakoneuan. Omechtlapejpenij de nochimej on tlaltikpaktlakamej ijkon ken aman nenkitaj.

¹⁶'Aman tej, xkixtikán on tlen xkuajli ipan nemoyojlo, niman maka sa xmoyoltechikauakan ixpan toTEKO. ¹⁷Ijkon xchiuakan pampa nemoTEKO Dios yejua Dios yejuan más ueyixtikaj xken on oksekimej yejuan kinkuitia dioses. Niman yejua toTEKO más ueyixtikaj xken on oksekimej yejuan kinkuitiaj tetekouan. Yejua más ueyixtikaj Dios, sanoyej temojtij niman nochi ueli kichiuá. Yejua xakaj kichikoita, nion kiselia tomin ken ichtakatlaxtlauijli. ¹⁸Yejua kinchiuilia tlen melajki yejuan iknomej niman siuakaualtsitsimej. Kintlajsojtla niman kinmaka tlakuajli niman tlakentin on xchanejkej yejuan chantij nemouan. ¹⁹Nemejuamej tej, xkintlajsojtlakan* on xchanejkej pampa nemejuamej no xnenchanejkej katkaj ipan on país Egipto.

²⁰'Xtlakaitakan nemoTEKO Dios, niman san yejua xmauistilikan. Xmotemakakan san yejua itech, niman ijkuak ika onkaj nenkichiuaskej sen tlajtolmakalislti ixpan, xchiuakan san ika itokatsin. ²¹Xkueyiteneuakan pampa yejua nemoTEKO Dios yejuan okichiu on uejueyi tlamauisoltin, niman on uejueyi tlajtlamach* temojtij yejuan yonenkitakej. ²²Ijkuak nemouejkatajuan oajsikej Egipto, katkaj san 70 tlakamej. Pero aman nemoTEKO Dios sanoyej yomechmiyekilij ken on sitlalimej yejuan onokej ipan cielo.

Iueyilis toTEKO

11 ¹'Aman tej, nochipa xtlajsojtlakan nemoTEKO Dios niman xtlakamatikan nochi itlanauatiluan, ileyas niman itlamachtilian. ²Xmatikan ika aman nemechnotsa nemejuamej tajtatin. Xnikinnotsa nemokoneuan yejuan xkaman okimatkej ken toTEKO Dios tecastigaroua, nion okitakej iueyilis niman nochi tlen ueli kichiuá ikan iueyi poder. ³Nemejuamej nenkelnamikij on neskayomej niman on uejueyi milagros* yejuan toTEKO okichiuilij on rey niman nochi on país de Egipto. ⁴Niman nenkelnamikij on tlen okinchiuilij on soldados de Egipto iuan incaballos, encarretas de guerra, niman kenijki okinamimiktij ipan on Mar Rojo ijkuak mechajtojtokayaj. ToTEKO otlán okimpopolój para yeyika. ⁵No nenkelnamikij kenijki toTEKO omechcuidarój ipan on xalpatlajkan hasta ijkuak onenmejkokej nikan, ⁶niman on tlen okinchiuilij Datán niman Abiram, ikoneuan Eliab, yejuan iuejkakoneuan Rubén. Otlapou on tlajli niman okintolój iuan nochimej iminfamilias niman iminkaluan iuan nochi on tlen kipiayaj. Nochi in onochiu imixpan nochimej on israelitas. ⁷Sano nemejuamej onenkitakej nochi on uejueyi tlajtlamach* yejuan okichiu toTEKO.

On israelitas kiseliskej tlatiochialistli ipan on kuajli tlajli

⁸Yejua ika, xtlakamatikan nochi on tlanauatiltin yejuan aman yonemechmakak para ijkon nenkojtikej yeskej niman uelis nemoyaxkatiskej on tlajli, ⁹niman para nenchantiskej miyek xipan ipan on kuajli tlajli yejuan toTEKO okimprometerouilij ika itokatsin nemoachtojtajuan para mechmakas nemejuamej yejuan neniuejkakoneuan. Mechmakas on tlajli kampa sanoyej tlatlaki niman xitlaj* poliui. ¹⁰On tlajli yejuan nenkimoyaxkatiskej, xijki ken on tlajli de Egipto kampa nemejuamej onenkiskej. Ompa nenkitôkayaj on xinachtli, niman nenkatekiayaj ken onenkichikej kampa nemohuertas katkaj. ¹¹Pero on tlajli kampa nemajsiskej para nemoyaxkatiskej, on sen tlajli kampa onkaj on tepemej niman ixtlauamej. Niman on tlajli patsiuis ikan kiautli. ¹²On sen tlajli yejuan toTEKO Dios cuidaroua desde ijkuak ipeuyan on xipan hasta itlamayan.

¹³Tla nemejuamej nenkintlakamatij in tlanauatiltin yejuan aman yonemechmakak, niman nenkitlajsojtlaj* nemoTEKO Dios, niman nenkipanouaj ika nochi nemoyojlo, niman ika nochi nemoalma, ¹⁴yejua kichiuas para kiauus ijkuak nonekis. Mechmakas on tlakiskatlaj kiautli niman on atliuetskatlaj*, para on tlajli mechmakas kuajli pixkalistli de trigo, de aceite niman de vino. ¹⁵No ijki, kichiuas ma noskalti miyek sakatl para nemoyolkauan, niman nemejuamej nenkipiyaskej miyek tlakuajli hasta kampa nemixuiskej. ¹⁶Pero xpiyakan cuidado para maka mechkajkayauaskej niman nenkitlalkauiskej toTEKO. Maka nenkinmauistiliskej oksekimej dioses, niman maka nemotlakuantelketsaskej imixpan, ¹⁷pampa tla ijkon nenkichiuaskej, toTEKO sanoyej kwalanis nemouan niman xmechajtitlanilis kiautli. Kemaj on tlajli xok mechmakas itlakyoy, niman saniman nenmikiskej ipan on kuajli tlajli yejuan toTEKO mechmakas.

Xkinmachtikan nemokoneuan

¹⁸Aman tej, xkejeuakan in tlanauatiltin ipan nemoyojlo niman ipan nemotlamachilis. Xsalokan ipan nemoma niman nenmixkuatipan on kuetlaxtli, yejuan kimpiya in tlanauatiltin. ¹⁹Xkinmachtikan nemokoneuan in tlanauatiltin. Xkintlajtlajtouilikan ipan nemochan, ipan ojtli ijkuak nennejnemij, ijkuak ye nenkochiskej, niman ijkuak nenmokuiteuaskej. ²⁰Xkijkuilokan ipan on kojtin* yejuan ipan salijtikaj nemotsakuijlou, niman ipan intsakuijlouan nemokaluan, ²¹para ijki nemejuamej niman nemokoneuan nenchantiskej sanoyej uejkauis ipan on kuajli tlajli yejuan toTEKO

okintlajtolmakak ika itokatsin nemoachtojtajan, ijkon ken youejkau onkaj cielo ipan in tlaltikpaktli.

²²Tla nenkintlakamatij nochi in tlanauatiltin yejuan aman nemechnauatia, niman tla nenkitlajsojtlaj* nemoTEKO Dios niman nenkitokaj iojui, ²³toTEKO kintotokas nemoyakapan nochimej on tlakamej. Niman nemejuamej nenkimoyaxkatiskej intlal on naciones yejuan más uejueyimej niman más kojtikey xken nemejuamej. ²⁴Nochi tlajli yejuan nenkicholoskej nemoyaxka* yes. Nemotlal uajpeuas desde ne xalpatlajkan kampaka sur, niman ajsis ipan on tlajli Líbano kampaka norte, niman desde on río Éufrates kampaka ikisayan tonaltsintli niman ajsis hasta on ueyi Mar Mediterraneo kampaka ikalakiyan tonaltsintli. ²⁵Xakaj uelis mechixnamikis, pampa toTEKO Dios kichiuas para ma nomojtikan, niman para ma mechmakajsikan nochimej on tlakamej nochuiuyan kampaka nempanoskej, ijkon ken yejua okiprometeroj.

²⁶Aman ipan in tonajli xtlapejpenikan tlinon nenkinekiskej, tlatiochiualistli noso tlauelijli. ²⁷Nenkiseliskej tlatiochiualistli tla nenkitlakamatiskej nochi itlanauatiltin nemoTEKO Dios yejuan aman yonemechnauatij. ²⁸Pero nenkiseliskej tlauelijli, tla nenkinmauistiliaj on dioses yejuan xnenkimixmatij, tla xnenkitlakamatij itlanauatiltin nemoTEKO Dios, niman tla nenkitlalkauiyaj on ojtli yejuan aman yonemechijlij.

²⁹Ijkuak nemoTEKO Dios yomechkalaktij ipan on tlajli yejuan nemoyaxkatiskej, on tlatiochiualistin nentekakistiliskej ipan on tepetl Gerizim niman on tlaueliltin nentekakistiliskej ipan on tepetl Ebal. ³⁰In tepemej onokej okse lado de on río Jordán kampaka ikalakiyan tonaltsintli, ipan imintlal on cananeos yejuan chantij ipan on ixtlauatl ixpan on kalpan Gilgal, yejuan nokaua itech on auakojoyoj kampa itoka More. ³¹Nemejuamej ye nису para nenkipanoskej on río Jordán niman nenkimoyaxkatiskej on kuajli tlajli yejuan nemoTEKO Dios mechmaktilis. Ijkuak yonenkalakkej niman ye ompa nenchantij, ³²xtlakamatikan nochi in leyes niman tlamachtiltin yejuan aman yonemechmakak.

On israelitas uelis kimauistiliskej toTEKO san ipan on tabernáculo

12 ¹In yejua tlanauatiltin niman leyes, yejuan nemejuamej ika onkaj nenkintlakamatiskej ipan nochi nemonemilis, ipan on tlajli yejuan inTEKO niman inDios nemoachtojtajan mechmakas para nemoyaxka* yes.

²Ijkuak nenkimoyaxkatiskej on tlajli, nochi tlami xkinxotonikan kampa on tlakamej kinmauistiliaj imindioses

ipan tepemej, ipan tepetsitsimej niman itsintlan uejueyi kojtin* majmajyuealtikej. ³Xkintsineuakan nochi intlaxpanuan*, xkintlajtlapanakan on temej yejuan kinmauistiliaj, niman xkintlatikan on kojtin* yejuan kinmauistiliaj, niman xkinoxotonikan nochi iminixneskayouan imindioses. Xkimpopolokan para maka sa kaman ma kimelnamikikan.

⁴Maka nenkimauistiliskej nemoTEKO Dios ijkon ken on tlakamej kinmauistiliaj imindioses. ⁵Yej toTEKO kitlapejpenis sen tlajli itech semej nemotribus kampa uelis nennemiskej ixpan, niman ompa uelis nenkonmauistiliskej. ⁶Ompa nenkinuikaskej yolkej yejuan nenkinmiktiskej niman nenkintlatiskej para nenkimakaskej tetlakaitalistli toTEKO. Niman no ompa nenkiktiliskej nemodiezmo*, on uentli yejuan nenkixtiaj impan nemoyojlo, on uentli yejuan nenkiprometerouiliskej toTEKO, on oksekij uentli yejuan san nenkinekiskej nenkimakaskej, niman on uentli de inyenkuuyokoneuan nemouakaxuan niman nemoborregos. ⁷Nentlakuaskej ompa ixpan nemoTEKO Dios. Niman iuan nemofamilias nempakiskej ipampa on tlakyotl yejuan kisas itech nemotekiu pampa on yejua ika yomechtiochiu nemoTEKO.

⁸Ompa xok ijki nenkichiuaskej ken aman tikchiuaj nikan kampa cada se kichiua tlen yejua kineki, ⁹pampa hasta aman nemejuamej sanken* xenemajsij kampa nemoseuiskej ipan on tlajli yejuan nemoTEKO Dios mechmakas. ¹⁰Pero ijkuak yonenkipanokej on río Jordán niman ye nenchantij ipan on tlajli yejuan toTEKO mechmaktilis, xok nenkipiyaskej nemotlauelikniuan yejuan mecheyjeuealotiaskej, niman xok nenmojkanemiskej. ¹¹Kemaj ne kampa nemoTEKO Dios kitlapejpenis kampa onyas itabernáculo kampa kitlakaitaskej itokatsin, nenkiuentlaliliskej nochi yejuan yonemechijlij: yolkej yejuan nenkinmiktiskej niman nenkintlatiskej para nenkimakaskej tetlakaitalistli toTEKO, nemodiezmo*, on uentli de tlaxtlauali, on uentli yejuan onenkiprometerouilijkej toTEKO yejuan ikatlakajtli. ¹²Niman ixpan nemoTEKO Dios neniluichiuaskej san sekan iuan nemokoneuan niman iuan nemotekitkauan, niman no iminuan on levitas yejuan chantij nemotech pampa yejuamej xokiminmakakej nion sen tlajli para inyaxka yes.

¹³Pero maka nenkinuentlaliskej yolkej yejuan nochi tlatlas para toTEKO san kanon nenkinekiskej. ¹⁴San uelis nenkichiuaskej kampa nemoTEKO Dios kitlapejpenis kampa onyas itabernáculo itech semej nemotribus. Ompa nenkichiuaskej nochi on tlen yonemechnauatij.

¹⁵Pero uelis nenkinmiktiskej oksekimej yolkej, niman nenkikuaskej iminnakayo ipan nemokalpanuan kaman

nenkinekiskej, san kech ika nemoTEKO Dios mechtiochluas. Uelis nenkikuaskej nemochimej* tla nenchipajkej noso xnenchipajkej ixpan toTEKO. On nakatl nenkikuaskej, ken nakatl yeskia de on yolki itoka gacela noso masatl. ¹⁶Pero on yestli maka nenkikuaskej, yej nenkitoyauaskej ipan tlajli ken atl yeskia.

¹⁷Xuelis nenkikuaskej ipan nemokalpan nemo diezmo* de trigo, de nemovino, noso de nemoaceite. Nion xuelis nenkikuaskej inyenkuiyokoneuan nemovacas, nion inyenkuiyokoneuan nemoborregas, nion on uentli yejuan onenkiprometerouilijkej yejuan ikatlakajtli para nenkimakaskej toTEKO, nion on uentli yejuan san nenkinekiskej nenkimakaskej. ¹⁸Nochi on uentli san uelis nenkikuaskej ixpan nemoTEKO Dios, ne ipan on tlajli kampa yejua kitlapejpenis. Ompa itech nemoTEKO Dios nenkikuaskej san sekan iuan nemokoneuan, nemotekitkauan niman on levitas yejuan chantiskej nemouan. Ijkon san sekan uelis nempakiskej ipampa on tlen nenkiseliskej ipan nemotekiu. ¹⁹Ijkuak nenchantiskej ipan on tlajli, maka kaman nenkelkauaskej nenkiminmakaskej tlen nenkipiyaj on levitas yejuan nemouan chantiskej.

²⁰Ijkuak nemoTEKO Dios yokueyikatilij nemotlal ijkon ken omechprometerouilij, tla nemejuamej nenkuasnekiskej nakatl, uelis nenkikuaskej san kamanon. ²¹Tla uejka nenchantij de on tlajli kampa toTEKO Dios okitlapejpeni kampa onyas itabernáculo, uelis nenkinmiktiskej nemouakaxuan, niman nemoborregos yejuan toTEKO yomechmakak, niman uelis nenkikuaskej nochi tlen nenkinekiskej ompa kampa nemejuamej nenchantiskej ijkon ken yonemechnauatij. ²²Xkuakan no ijki ken nenkikuaskiaj on nakatl de on yolki gacela noso masamej. Nemochimej nemejuamej uelis nenkikuaskej, tla nennemij chipajkej noso xchipajkej ixpan toTEKO. ²³Pero maka nenkikuaskej on yestli, pampa ipan on yestli onkaj nemilistli. Ijkon tej, xkuajli nenkikuaskej on nemilistli iuan on nakatl. ²⁴Maka nenkikuaskej on yestli, yej xtoyauakan ipan tlajli ken atl. ²⁵Maka xkuakan para kuajli nennemiskej nemejuamej niman nemokoneuan. Kuajli nennemiskej pampa nenkichiuaj on tlen melajki ixpan toTEKO. ²⁶On tlajtlamach* yejuan yonenkiyaxkatijkej toTEKO para uentli, niman nochi on uentli yejuan onenkiprometerojkej, nenkimakaskej ne ipan on tlajli kampa toTEKO kitlapejpenis. ²⁷Niman ompa ipan itlaixpan* nemoTEKO Dios nenkimakaskej on uentli yejuan nochi tlatla. Nenkimakaskej ome uentli, on nakatl niman iminyesyo on yolkej. Iminyesyo nenkitoyauaskej tlapani ipan itlaixpan* nemoTEKO Dios, pero on nakatl uelis nenkikuaskej.

²⁸Xkakikan niman xtlakamatikan nochi on tlen yonemechnauatij, para ijki nemejuamej niman nemokoneuan

kuajli nennemiskej nochipa, pampa nenkichiuaj on tlen kuajli, niman yejuan melajki ixpan nemoTEKO Dios.

Maka kaman xkinmauistilikan on ídolos

²⁹Ijkuak nemoTEKO Dios yotlan kinxoxotonia on naciones yejuan nemejuamej nenkiseliskej, niman ijkuak ompa ye nenchantij, ³⁰xpiyakan cuidado maka no ijki nenkichiuaskej ken yejuamej. Maka ijkín xtetlajtoltikan de imindioses: “¿Ken ijki kintekipanouayaj imindioses on naciones para nejua no ijki nikintekipanos?” ³¹Maka xmauistilikan nemoTEKO Dios ijkon ken yejuamej kinmauistiliaj imindioses pampa yejuamej kichiuaj miyek tlajtlamach* yejuan toTEKO sanoyej kitlauelmati. Yejuamej hasta kintlataj inkoneuan ken uentin para imindioses.

³²Xtlakamatikan nochipa in tlanauatiltin yejuan yonemechnauatij. Maka seki nenkixtiliskej, nion maka seki nenkitlaliliskej in tlanauatiltin.

Tlanauatijli para maka kimpiyaskej iminídolos

13 ¹Tla nemotsajlan nonextia yakaj yejuan noteneuas tiotlajtojketl noso yejuan kijtos ika okiselij sen temiktli itech Dios, niman kijtos ika okitak ipan temiktli itlaj nochiuas, ²niman tla saman melauak onochiu on tlen omechijli nochiuas, niman kemaj mechijlis: ‘Aman tiauij ma tikintokakan on dioses yejuan nemejuamej xnenkinmixmatij, niman ma tikinmauistilikan,’ ³tla ijkon, maka xkakikan on tlen mechijlia. Maka xkakikan pampa nemoTEKO Dios san mechtlatlata, para ijkon kimatis tla nenkitlajsojtlaj* yejua, ika nochi nemoyojlo niman ika nochi nemoalma. ⁴Xneltokakan niman xtlakaitakan san nemoTEKO Dios. Xtlakamatikan itlanauatilan. Xtlakamatikan on tlen mechijlia. San yejua xtekipanokan niman nochipa itech xmouikakan. ⁵Xmiktikan on tiotlajtojketl noso on temikketl yejuan mechijlia xkauakan nemoTEKO Dios yejuan omechmanauij kampa mechpiyayaj esclavos ipan on tlajli Egipto. Xmiktikan pampa kinekiya mechxelos itech on ojtli yejuan toTEKO omechnauatij xtokakan. Ijkon nenkixtiskej on tlen xkuajli nemotech.

⁶Tla sano mokniu, noso mochpoch, noso motelpoch, noso mosiuau yejuan tiktlajsojtla, noso sen motlajsojkaikniu mitsichtakajilia para xkinmauistili on oksekimej dioses yejuan tejua nion moachtotajuan xonenkimixmatkej, ⁷imindioses on tlakamej yejuan onokej nisiu, noso uejka, noso yejuan onokej ipan nochi tlaltikpaktli, ⁸maka kaman xmokauilikan ma mechkajkayauakan, nion maka xkakikan. Nion maka xkiknelikan on tlakatl, nion maka xmanauikan. ⁹Yej xmiktkan. Tejua

achtoj tiktemojmotlas, niman kemaj kej on oksekimej israelitas kitemojmotlaskej. ¹⁰Xtemojmotlakan hasta kaman miki, pampa kinekiya mechxelos itech nemoTEKO Dios yejuan omechkixtij ipan on tlajli Egipto kampa nenesclavos katkaj. ¹¹Ijki nochimej on israelitas kimatiskej niman nomojtiskej, niman xok yakaj kinekis kichiuas on tlen sanoyej xkuajli.

¹²Tla nenkakiskej ika ipan sen ueyikalpan yejuan nemoTEKO Dios yomechmakak para ompa nenchantiskej, ¹³yopeu nemij tlakamej yejuan xkitlakamatij Dios, niman kintlamachilispouaj on chanejkej de nemoueyikalpan para ma kinmauistilikan dioses yejuan xnenkimixmatij, ¹⁴tla ijkon, noneki kuajli xtetlaltoltikan de on tlen nochiua. Niman tla melauak nochiua on tlen kijtouaj, niman on tlakamej kichiuaj on tlen toTEKO sanoyej kualania, ¹⁵xkinmiktikan ikan espada nochimej on chanejkej de on ueyikalpan iuan nochi iminyolkauan, niman xkinxoxotonilikan nochi on tlen ompa onkaj. ¹⁶Nenkisentlaliskej nochi on tlajtlamach* yejuan patioj itlajkotian on plaza, niman nenkitlatiskej on ueyikalpan ken sen uentli yejuan tlatla para nemoTEKO Dios. Niman ijkon, on kalpan nokauas xoxotonki para yeyika niman xokaman kiyenkuiliskej.

¹⁷Maka nenkuiskej itlaj yejuan ye ika onkatka para tlatlas, niman toTEKO xkaman kualanis nemouan. Yej mechiknelis niman kichiuas para xmiyekiyakan ijkon ken okintlajtolmakaka ika itokatsin nemoachtojtajuan. ¹⁸Ijkon nochiuas tla nenkitlakamatij itlanauatiluan nemoTEKO Dios yejuan aman nemechmaka, niman tla nenkichiuaj on tlen melajki ixpan toTEKO.

14 ¹Nemejuamej nenikoneuan nemoTEKO Dios. Yejua ika, maka nemotetekiskej ipan nemotlalnakayo, nion maka xmokuatexikalokan ijkuak yakaj miki, ken oksekimej kichiuaj, ²pampa nemejuamej neninyaxkauan nemoTEKO Dios. Yejua omechtlapejpenij intsajlan nochimej on tlakamej ipan in tlaltikpaktli para nemochiuaskej sen nación yejuan san yejua iyaxka* yes.

On yolkej yejuan chipajkej niman yejuan xchipajkej ixpan toTEKO

(Lv 11.1-47)

³Maka nenkikuaskej nion sen yolki yejuan xchipauak ixpan toTEKO.

⁴In yejuamej yolkej yejuan uelis nenkinkuaskej: uakaxtin, borregos, chivos, ⁵masamej, gacelas, gamos, on tepechivos, niman on yolkej intoka antflopes.

⁶Uelis nenkinkuaskej nochi on yolkej yejuan kuechouaj imintlakual niman istimajxaltikej. ⁷Pero maka nenkinkuaskej

in ken in yolkej maski kuechouaj imintlakual, noso maski istimajxaltikej:

“Camellos, siutin niman pepejsojtin^c, pampa maski tlakuechouaj, xistimajxaltikej. Nochi in yolkej xchipajkej ixpan toTEKO.

⁸On pitsomej no xchipajkej ixpan toTEKO pampa maski istimajxaltikej, xtlakuechouaj. Innakayo in yolkej xnenkikuaskej, nion xnenkimatokaskej yejuan yomikkej.

⁹De nochimej yolkej yejuan nemij ijtik atl, san uelis nenkikuaskej yejuan kipiayaj imastlakapaltsitsian niman intojtominyo. ¹⁰Pero xuelis nenkikuaskej yejuan xkipiyaj imatstlakapaltsitsian niman intojtominyo, yej xkintakan ken xchipajkej ixpan toTEKO.

¹¹Uelis nenkinkuaskej nochi on totomej yejuan chipajkej. ¹²Pero nemij sekimej yejuan xuelis nenkikuaskej: on kuaktli, on quebrantahuesos, on tototl itoka azor, ¹³on tototl itoka gallinazo, on milano, nion se de on halcones, ¹⁴nion se de nochi kech kakalotl nemi, ¹⁵on avestruz, on pajpaktekolotl, on tototl yejuan itoka gaviota, nion se de on gavilanes, ¹⁶on tekolotl, on garza kuitlanextik, on cisne yejuan kuaporontik, ¹⁷on pelícano, on buitire, on kakalotl de mar, ¹⁸nion on cigüña, on garza, on tototl itoka abubilla, niman on tsinakan.

¹⁹“Nochi yolkatsitsimej yejuan patlanij xuelis nenkinkuaskej pampa xchipajkej. ²⁰Pero on totomej yejuan chipajkej, kemaj uelis nenkinkuaskej.

²¹“Maka xkuakan sen yolki yejuan san ijki miki, pampa nemejuamej nentlatiochijtin itech nemoTEKO Dios. Pero, uelis nenkinmakaskej on xchanej yejuan chanti nemouan, noso uelis nenkinamakiltiskej on xchanej yejuan san panoua ipan nemotlal. Yejua kemaj uelis kikuas.

“Maka xkixxitikan sen chivito ikan ileche inanaj.

Ijkin kitemakaskej imindiezmo* on israelitas

²²“Cada xipan noneki nenkixeloskej on diezmo* de nochi kech kitlakitia nemotlatok. ²³On nemodiezmo* de trigo, de vino, de aceite de oliva, niman de inyenkuuiyouan nemouakaxuan niman nemoborregos, nenkikuaskej ixpan nemoTEKO Dios ne ipan on tlajli kampa yejua kitlapejpenis kampa onyas itabernáculo kampa kitlakaitaskej itokatsin. Ijkon nenueliskej nenkitlakaitaskej toTEKO para nochipa. ²⁴Tla toTEKO mehmaka miyek tlatiochialistli, niman nemejuamej noneki nennejnemiskej uejka para nenkiktiskej nemodiezmo* pampa nenchantij sanoyej uejka

c 14.7 Pepejsojtin kijtosneki: “tejones”.

ne kampa toTEKO okitlapejpenij kampa onyas itabernáculo, ²⁵tla ijkon, nemejuamej nenueliskej nenkinamakaskej on diezmo* de nochi on tlajtlamach* niman san on tomin nenkiktiskej kampa toTEKO yokitlapejpenij kampa onyas itabernáculo. ²⁶Ika on tomin, ompa nenueliskej nenkouaskej on tlen nenkinemiliskej más kuajli: uakaxtin, borregos, vino, noso san katlejua tlaonijli yejuan tloxokolijli, san katlejua nenkinekiskej. Niman ompa nenkikuaskej ikan pakilistli ixpan nemoTEKO Dios, san sekan iuan nemofamilias.

²⁷Maka kaman nenkinmelkauaskej on levitas yejuan nemij ipan nemokalpanuan, pampa yejuamej xkipiyaj imintlal ken nemejuamej.

²⁸'Cada yeyi xipan nenkixeloskej para nemodiezmo* de nochi kech tlakis ipan on xipan niman xkeuakan ipan nemokalpanuan. ²⁹Para ijkon ijkuak uajlaskej on levitas yejuan xkipiyaj imintlal, noso on yejuan xchanejkej yejuan chantij nemokalpan, noso yejuan iknotsitsimej noso siuakualtsitsimej, uelis tlakuaskej hasta kuajli ixuiskej. Niman tla ijkon nenkichiuaskej, nemoTEKO Dios mechtiochuias ipan nochi on tlajtlamach* tekintl yejuan nenkichiuaskej.

On xipan ijkuak notlapojpouiya nochi teuikilistli

(Lv 25.1-7)

15 ¹'Cada chikome xipan nenkitlapojpoluiskej nochi on tlen mechuikiliaj. ²Para nentetlapojpoluiskej, ijkin nenkichiuaskej: Nochi tlakatl yejuan okitlanejtij itlaj yakaj israelita, ika onkaj kitlapojpoluilis tlen otetlanejtijka. Maka sa kitlajtlanilis on tlen okitlanejtijka, pampa toTEKO otlanauatij ika ipan on chikome xipan, ika onkaj nochimej kitlapojpoluiliskej on tlen okitlanejtijka. ³On yejuan xchanej uelis nenkitlajtlaniskej ma mechkuepili on tlen mechuikilia. Pero on yejuan israelita ika onkaj nenkitlapojpoluiliskej on tlen mechuikilia. ⁴Ijki xnemiskej mayankej nemotsajlan pampa nemoTEKO Dios mechtiochuias ipan on tlajli yejuan yejua mechmakas ken herencia. ⁵ToTEKO ijkon kichiuas tla nenkitlakamatij nochi in tlanauatiltin yejuan aman nemechmaka. ⁶NemoTEKO Dios melauak mechtiochuias ijkon ken yokijtoj kichiuas. Niman nenkipiyaskej para nenkintlanejtiskej miyekej naciones, pero nemejuamej xkaman itlaj nemotlaneuiskej. Niman nenkinmandaroskej miyekej naciones pero yejuamej xmechmandaroskej nemejuamej. ⁷Tla nemi sen mayanki intech nemochanejkauan ipan on kalpantin de on país yejuan nemoTEKO Dios mechmakas, maka nenmoyoltechikauaskej, nion maka nenkitlajsojttiliskej nemotlapaleuilis on nemochanejkau

yejuan mayanki. ⁸Yej xpaleuikan niman ikan pakilistli xtlanejtikan nochi on tlen kipolos. ⁹Maka nenkipiyaskej xkuajli nemoyojlo niman xnenkinekiskej nentetlanejtiskej itlaj pampa ye nису on chikome xipan ijkuak notlapojpoluis nochi teuikilistli, niman yejua ika, xnenkinekiskej nenkitlanejtiskej itlaj on nemochanejkau yejuan mayanki. Xpiyakan cuidado pampa yejua uelis kinotsas nemoTEKO niman kijlis on tlen nenkichiuaj. Tla ijkon nochiuas, toTEKO kijtos ika nenkipiyaj tlajtlakojli. ¹⁰Nochipa nentepaleuiskej, niman nenkichiuaskej ikan pakilistli. Niman tla nenkitlakamatiskej on tlanauatijli, nemoTEKO Dios mechtiochiuas ipan nochi on tlajtlamach* yejuan nenkichiuaskej. ¹¹Nochipa nemiskej mayankej ipan on tlajli. Yejua ika, nejua nemechnauatia, xpiyakan kuajli nemoyojlo iminuan on nemochanejkauan yejuan mayankej niman yejuan tlajyouiyaj ipan nemopafs.

On xipan ijkuak kinmakauaj on esclavos

(Ex 21.1-11)

¹²Tla sen Hebreo tlakatl noso suatl, nonamaka motech para esclavo yes, san mitstekipanos chikuasen xipan. Niman kampa ika chikome xipan ika onkaj tikmakauas para xok moesclavo yes. ¹³Niman ijkuak tikmakauas, maka san mapijpilkatias, ¹⁴yej tikmakas yolkej niman miyek trigo niman vino. Tikmakas ken moTEKO Dios yomitstiochiuilij. ¹⁵Maka xkelkaua ika tejuua no mitspiyayaj esclavo ipan on tlajli Egipto, niman moTEKO Dios omitsmanauij. Yejua ika, aman nimitsmaka in tlanauatijli.

¹⁶Pero tla moesclavo kijtous xkineki mitskauas pampa mitstlajsojtla niman kitlajsojtla* mofamilia niman pampa tejuua no tiktlajsojtla, ¹⁷tla ijkon, tikuis sen tepostli itoka punzón, niman xpepecho ipan itsakuijlou mokal niman xkoyonili inakas. Ijkon nochipa moesclavo yes. Ijkin tikchiuilis moesclavo noso moesclava. ¹⁸Maka ma mitsajmana tla noneki tikmakauas moesclavo, pampa yejua yomitstekipanoj chikuasen xipan. Kijtosneki tlajkotipan de on kech tiktlaxtlauliliskia sen tlakeuajli. Niman ijkon moTEKO Dios mitstiochiuas ika nochi on tlajtlamach* yejuan tikchiuas.

ToTEKO yejua iyaxkauan* nochi on okichyolkej yejuan yenkuiyomej

¹⁹Nochi inyenkuiyokoneuan nemovacas niman nemoborregas yejuan okichtin, nenkinmaxkatiskej toTEKO Dios.

¹⁹Maka tiktekitiltis on becerrito yejuan iyenkuiyou movaca, nion maka tikximas on borreguito yejuan iyenkuiyokoneu moborrega. ²⁰Cada xipan tikinkuas iuan mofamilia ixpan nemoTEKO Dios ne

kampa yejua kitlapejpenis para onyas itabernáculo. ²¹ Pero tla kipiya itlaj xkuajli ipan itlakayo, noso koxo, noso xtlacha, noso kanaj tlakokojli* ipan itlakayo xuelis tikmakas toTEKO para sen uentli. ²² Kenon yolki, uelis tikuas iuan mofamilia ipan on ueyikalpan kampa tichanti. Niman nochimej uelis kikuaskej on yolki tla nemij chipajkej noso xchipajkej ipan iminyojlo ixpan toTEKO. On nakatl nenkuaskej ken yeskia de de yolki gacela noso masatl. ²³ Pero maka nenkikuaskej iyesyo. Yej xtoyauakan ipan tlajli ken atl yeskia.

On iluimej ipan cada xipan

(Ex 23.14-17; 34.18-24)

16 ¹ Ijkuak ajsis on metstli Abib, xchiuakan on iluitl Pascua para tetlakaitalistli itech nemoTEKO Dios, pampa onochiu ipan sen tlayoua de on metstli ijkuak nemoTEKO Dios omechkixtij ipan on tlajli Egipto.

On iluitl itoka Pascua

² Ipan on iluitl Pascua, nenkiuentlaliliskej nemoTEKO Dios uakaxtin niman borregos, ne kampa yejua kitlapejpenis para onyas itabernáculo para kitlakaitaskej itokatsin. ³ On yolki tlauentlalijli nenkikuaskej ipan pan yejuan xkipiya tlaxokolilistli*. Chikome tonajli nenkikuaskej pan yejuan xkipiya tlaxokolilistli*. (Yejua on pan itoka 'Pan de Tlajyouilistli', pampa xonenmajxilijkej para nenkichijchiuaskej pan iuan tlaxokolilistli* ijkuak onenkiskej amanaman ne Egipto.) Ijkon ipan nochi nemonemilis nenkelnamikiskej on tonajli ijkuak onenkiskej Egipto. ⁴ Nochi on chikome tonajli maka yakaj nenkualiskej kipiya tlaxokolilistli* ipan nochi nemoueyitlalpan. Niman on nakatl yejuan nenkiuentlaliskej ipan on tlapoyajkan de on achtoj tonajli, maka itlaj nokauas para uajmostla kualkan.

⁵ Maka nenkiuentlaliskej on uentli de Pascua san kanon ipan san katlejua kalpan yejuan nemoTEKO Dios mechmakas. ⁶ Yej san uelis nenkichiuaskej ne ipan on tlajli kampa yejua kitlapejpenis para onyas itabernáculo kampa kitlakaitaskej itokatsin. Niman nentlauentlaliskej tlapoyajkan ijkuak ye kalaktikaj tonaltsintli, pampa ipan on hora onenkiskej ipan on tlajli Egipto. ⁷ Inakayo on yolki yejuan nenkiuentlaliliskej nemoTEKO noneki nenkixitiskej niman nenkuaskej kampa nemoTEKO Dios kitlapejpenis para onyas itabernáculo. Niman kemaj uajmostla kualkan nenmokuapaskej nemochan. ⁸ Niman nochi on chikuasen tonajli de on iluitl nenkikuaskej pan yejuan xkipiya tlaxokolilistli*. Niman kampa ika chikome tonajli, nemochimej* nemosentlaliskej para nenkimauistiliskej nemoTEKO Dios. Niman ipan on tonajli nenenkichiuaskej nion se tekitl.

On iluitl itoka Pixkalistli

⁹Ijkuak yopanok chikome semana desde ijkuak peuas nenkipixkaskej on trigo, ¹⁰nenkichiuaskej on iluitl itoka Pixkalistli para nenkimauistiliskej nemoTEKO Dios. Niman nenkimakaskej uentli yejuan ipan nemoyojlo nenkixtiaj, niman nenkimakaskej ijkon kech yejua yomechtiochiuilij. ¹¹Niman neniluichiuaskej ikan ueyi pakilistli ixpan nemoTEKO Dios ne kampa yejua kitlapejpenis para ompa onyas itabernáculo para kitlakaitaskej itokatsin. Nemejuamej nenkichiuaskej san sekan iuan nemokoneuan, nemoesclavos, on levitas, on xchanejkej, on iknotsitsimej, niman on kaualtsitsimej yejuan nemij ipan nemokalpan. ¹²Xkelnamikikan ika nenesclavos katkaj ipan on tlajli Egipto. Yejua ika, xtlakamatikan nochi in leyes.

On iluitl de Kalmatsitsimej

¹³Ijkuak yonentlankej nenkipixkaj nemotriego, niman yotlan nenkipatskaj nemouvas, nenkichiuaskej chikome tonajli on iluitl yejuan nenkitokayotiskej Iluitl de Kalmatsitsimej. ¹⁴Xpakikan san sekan iuan nemokoneuan, nemoesclavos, inuan on levitas, on xchanejkej, on iknotsitsimej, niman on kaualtsitsimej yejuan nemij nemokalpan.

¹⁵In iluitl nenkichiuaskej para nenkimauistiliskej nemoTEKO Dios chikome tonajli, ne ipan on tlajli kampa yejua kitlapejpenis. Nenchiuaskej pampa nemoTEKO Dios mechtiochiuilis nochi nemotlatok niman nochi nemotekiu yejuan nenkichiuaskej. Niman nemejuamej sanoyej nempakiskej.

¹⁶Nochimej on yejuan tlakamej noneki yaskej ixpan toTEKO Dios yexpa ipan se xipan, ne kampa yejua kitlapejpenis. Yaskej ipan on iluitl Pascua, ipan on iluitl de Semanas niman ipan on iluitl de Kalmatsitsimej. Xakaj san ma pijpillkatias ijkuak yaskej ixpan toTEKO, ¹⁷yej noneki cada se kiktis iuen kech ika toTEKO Dios yokitiochiuilij.

¹⁸Xkintlalikan jueces niman tlajkuilojkej para nochi on uejueyikalpanmej ipan cada tribu* yejuan nemoTEKO Dios mechmakas. Ijkon xkintlalikan para yejuamej tekiauajtiskej intech on tlakamej ika kuajli inyojlo niman ken kitokaroua. ¹⁹Maka kichiuaskej on tlen xmelajki, nion maka techikoitaskej. Maka kiseliskej tomin ken ichtakatlaxtlauijli pampa on kimixkuepa on tlamatkej* niman kinchiualtia para kichiuaj on tlen xmelajki.

²⁰Ika nochi nemoyojlo xchiuakan on tlen melajki. San yejua on tlen melajki xchiuakan. Melauak san yejua xchiuakan para uelis nemoyaxkatiskej on tlajli yejuan nemoTEKO Dios mechmakas.

²¹Maka nenkitokaskej sen kojtlit* para nenkimauistiliskej on diosa itoka Asera nisiu itlaixpan* nemoTEKO Dios. ²²Nion

xkaman nenkintelketsaskej temej para nenkinmauistiliskej, pampa yejua in nemoTEKO Dios sanoyej kualania.

Xtemakakan uentli yejuan chipauak ixpan toTEKO

17 ¹Maka xmakakan nemoTEKO Dios sen uakax, noso sen borrego yejuan tlakokojli* ipan itlakayo noso kipiya itlaj xkuajli, pampa toTEKO Dios sanoyej kualania sen uentli kenon.

²Tla saman, ipan semej on kalpanmej yejuan nemoTEKO Dios mechmaka, nenkimatij ika sen tlakatl noso sen suatl kichiua tlen toTEKO xkuelita, niman xipan kita ipacto* Dios, ³ika kinmauistilia oksekimej dioses niman notlakuantelketsa imixpan kenon tonaltsintli, noso on metstli noso on sitlalimej yejuan nemoTEKO xmechnauatia para xkinmauistilikan, tla ijkon, xipan kita ipacto* Dios. ⁴Niman ijkuak nenkimatiskej ika ijkon kichiua yakaj, noneki xtetlajtlajoltikan kuajli nochiuiyan de on tlajtlamach*. Niman tla onenkimatkej ika melauak onochiu intech on israelitas on tlen toTEKO sanoyej kualania, ⁵nenkuikaskej on tlakatl noso on suatl yejuan okichiu on tlen xkuajli hasta ne ikalakiyan on kalpan, kampa nemij on tekiauajkej. Niman ompa ne ikiauak on kalakiyan, xtemojmotlakan hasta kaman miki.

⁶Ika onkaj nemis ome noso yeji tlakatl yejuan testigojksaskej ika okitakej ijkuak okichiu on tlen xkuajli, para ijkon sen juez uelis kijtos ma kimiktikan. Xakaj uelis kimiktiskej tla san se testigo nemi. ⁷On testigos achtoj yejuamej kitemojmotlaskej on tlakatl. Kemaj nochimej on chanejkej ipan on kalpan no kitemojmotlaskej. Ijki tlamis nenkixtiskej on tlen xkuajli yejuan onkaj ipan on kalpan.

⁸Tla noneki nenkichiuaskej sen tekiauajyotl yejuan más ouijtikaj* yejuan on juez xuelis kichiuas, kenon temiktilistli, noso nouijsokilistli, noso tlakokojli* yakaj ipan itlalnakayo noso sen ueyi tlauejli ipan nemoueyikalpan, tla ijkon, xuiyan ne kampa nemoTEKO Dios kitlapejpenis para onyas itabernáculo. ⁹Niman ompa nenkinnotsaskej on levitas tiopixkej niman on juez yejuan kichiuas itekiu ipan on tonajli. Yejuamej kijtoskej on castigo yejuan noneki ipampa on tlen onochiu. ¹⁰Kemaj nemejuamej ika onkaj nenkichiuaskej nochi ken yejuamej mechnauatiskej kampa toTEKO kitlapejpenia. ¹¹Xchiuakan nochi ken yejuamej mechnauatiskej. Ma nochiua on castigo yejuan mechijlis. Maka nenkipatlaskej nion achijtsin. ¹²Tla yakaj noueyimati niman xkitlakamati on tlen okijtoj on juez noso on tiopixki yejuan ompa kitekipanoua toTEKO, ika onkaj nenkimiktiskej. Ijkon tlamis nenkixtiskej on tlen xkuajli onkaj intech on israelitas. ¹³Ijkuak nochimej on tlakamej kimatiskej on tlen onochiu nomojtiskej niman xok noueyimatiskej.

Tlanauatiltin para ken tlayekanas sen rey

¹⁴Tla ijkuak yonenkalakkej ipan on tlajli yejuan nemoTEKO Dios mechmakas, niman yonenkimoyaxkatijkej niman ye ompa nenchantij, nenkijtoskej: ‘Tiknekij tikpiyaskej sen rey yejuan techmandaros ken kipiayaj nochimej on naciones yejuan onokej nisiu tejuamej’, ¹⁵tla ijkon, noneki nenkitlaliskej sen nemochanejkau para rey ipan nemonación, sen tlakatl yejuan nemoTEKO Dios kitlapejpenis. Noneki nenkitlaliskej sen tlakatl israelita niman maka se yejuan xchanej. ¹⁶Xnauatikan on rey, maka kouas miyek caballos, nion kintitlanis tlakamej ne Egipto para kominaniliskej más caballos, pampa toTEKO omechijlij maka sa kaman oksejpa nyenaskej Egipto. ¹⁷No ijki, noneki xkimpiyas miyekej siuamej para ijkon xkitlalkauis iojui toTEKO, nion xkimpiyas miyek oro niman plata.

¹⁸Ijkuak on rey kiselis itekiu para tlamandaros, xnauati ma kixkopina on achtoj amatlajkuilojli de on tlanauatiltin yejuan on levitas tiopixkej kipiayaj. ¹⁹In amatlajkuilojli de on tlanauatiltin, noneki nochipa kipiayas nisiu, niman kinomachtis mojmmostla ipan nochi inemilis. Ijkon kimatis kenijki kitlakaitas iTEKO Dios niman kenijki kichiuas nochi on tlanauatiltin yejuan kijtous on tlamachtijli. ²⁰Ijkon xkaman noueyimatis intech on sekimej ichanejkauan ipan on país niman xkaman kitlalkauis in tlanauatiltin nion achijtsin. Niman ijki yejua niman iuejkakoneuan uejkauis tlamandaroskej ipan imintlal on israelitas.

On herencia yejuan kiseliskej on levitas tiopixkej

18 ¹Nochimej on levitas tiopixkej iuan nochimej yejuan kisaj itech itribu* leví, xkiseliskej tlajli ken on oksekimej israelitas. Yejuamej ika onkaj nopanoltiskej ika on uentli yejuan nochi tlatla niman on okseki uentli yejuan kimakaskej toTEKO. ²Xkiseliskej tlajli ken on oksekimej israelitas, pampa yejuamej yokiselijkej toTEKO ken iminherencia ijkon ken yokimprometerouilij.

³Ijkuak on Israelitas kiuentlaliskej sen uakax noso sen borrego, on tiopixkej kiminmakaskej imastlakapal, ikamachal, niman icuajo. ⁴Niman no kiseliskej on achtoj pixkalistli de trigo, vino niman aceite de olivo, niman on achtoj itsojmiyo nemoborregos ijkuak nenkinximaskej. ⁵Ijkon kiseliskej pampa nemoTEKO Dios okintlapejpenij on levitas niman inuejkakoneuan, intsajlan nochimej on tribus para nochipa ma kitekipanokan.

⁶Tla sen levita ikan nochi iyojlo kineki kisas ikalpan san kanon ipan on tlajli Israel, niman yas para tekitis ipan itabernáculo

toTEKO, 7yejua uelis yas niman ompa tekitis para toTEKO Dios ken on oksekimej ikniuian levitas yejuan ompa kitekipanouaj. 8Niman kiselis no ichkich tlakuajli ken on oksekimej kiselijaj aparte de on yejuan kiselis ken herencia de itataj.

Maka no ijki nenkichiuaskej ken on chanejkej ipan on oksekimej naciones

9Ijkuak nemejuamej yonenkalakkej ipan on tlajli yejuan nemoTEKO Dios mehmaktilis para nemoyaxka* yes, maka nenkichiuaskej on tlen sanoyej xkuajli ken kichiuaj on tlakamej yejuan ompa chantij. 10Maka kaman yakaj kiuentlalis ipan tlitl sen ikoneu, nion maka kejekos para tetlatejtemouilis, nion maka kinekis kiteijlis on tlen nochiuas sakin*, nion maka kejekos on nauajlotl. 11Maka yakaj kejekos xkuajli tlaixkajkayualistli, nion maka kintejetemos on tetlatejtemouilijkej niman on yejuan kiminnotsaj ajakamej, nion maka tlajtos iminuan mikatsitsimej. 12Maka yakaj ijki kichiuas pampa toTEKO sanoyej kikualaniaj on yejuan kichiuaj nochi in tlajtlamach*. Niman ijkuak nenkitaj nemoTEKO Dios kinkixtia on naciones, on pampa yejuamej kichiuaj nochi on tlajtlamach* tlen sanoyej xkuajli. 13Nemejuamej noneki nenkichiuaskej nochi tlen kuajli ixpan nemoTEKO Dios. 14On tlakamej yejuan chantij ipan on naciones yejuan nemejuamej nenkimoyaxkatiskej imintlaluan, nouikaj iminuan on yejuan kiteijlijaj tlen nochiuas sakin* niman iminuan on yejuan tetlatejtemouilijaj. Pero nemejuamej, nemoTEKO Dios xmechkaulia ijkon xchiuakan.

On tiotlajtojketl yejuan uajlas no ken Moisés

15NemoTEKO Dios kichiuas ma kisa nemotsajlan sen tiotlajtojketl ken nejua, niman noneki nenkitlakamatiskej. 16In yejua onenkitlajtlanilijkej nemoTEKO Dios ipan on tepetl Sinaí on tonajli ijkuak nemochimej* onemosentlilijkej ompa. Onenkijtojkej: “Xtiknekij oksejpa tikakiskej itlajtoltsin toTEKO Dios, nion tikitaskkej on ueyi temojtij tlitl, pampa xtiknekij timikiskej.”

17Kemaj toTEKO onechilij: “Kuajli on tlen okijtojkej. 18Nejua nikchiuas para ma kisa intsajlan sen tiotlajtojketl ken tejua. Yejua nikijlis tlinon noneki kijtos, niman kimijlis on israelitas nochi tlinon nejua niknauatis. 19Tla yakaj xkineki kakis notlajtoltsin ijkuak tlajtos on tiotlajtojketl niman xkitlakamatis, nejua nikyolkuitis. 20Pero tla on tiotlajtojketl noueyimatis niman kijtos tlajtojli yejuan nejua xonikmakak, noso tla on tiotlajtojketl kijtos ika okiselij sen tlajtojli de oksekimej dioses, ika onkaj mikis.” 21Niman tla nemejuamej nenmotlajtoltiaj kenijki uelis

nenkimatiskej ika on tlen kijtous, xejua itlajtoltsin toTEKO, ²² ijkin nenkimatiskej. Tla on tiotlajtojketl kijtos ika toTEKO okimakak sen tlajtojli, pero xonochiu on tlen okijtoj, tla ijkon, kijtosneki ika xtoTEKO okijlij para ma kijto, yej san okinemilij itlaj pampa onoueyimat. Yejua ika tej, maka ma kimakajsikan.

On uejueyikalpanmej kampa nomanauilos

(Nm 35.9-28; Jos 20.1-9)

19 ¹Ijkuak nemoTEKO Dios yotlan kinxoxotonia on naciones, niman yomechmakak nemejuamej on tlajli yejuan amantsin iminyaxka, niman nenkimoyaxkiskej on tlajli, niman nemejuamej ye nenchantij ipan iminueyeikalpanuan niman iminkaluan, ²⁻³nenkixeloskej yexkantipan on ueyitlalpan yejuan nemoTEKO Dios mechmakas para nemoyaxka* yes. Itlajkotian cada ueyitlalpan, nenkitlaliskej sen ueyikalpan, niman nenkitlaliskej sen ojtli para ajsis ipan cada ueyikalpan. Niman ompa uelis nomanauis sen tlakatl yejuan kimiktis yakaj.

⁴On tlakatl yejuan temiktis uelis ompa nomanauis, tla kiteititis ika xsan okiyokolij okimiktij niman xiuan notlauelitayaj on tlakatl yejuan okimiktij. ⁵Ma tikonijtokan, tla omemej tlakamej yauij onkuajkuauij. Niman ijkuak on se tlatsontekiya, ouajtekopin ihacha niman okimato okse tlakatl niman miki. Tla ijkon, on yejuan otemiktij uelis oniyanas ipan semej de on yeyi kalpanmej niman ijki nomanauis. ⁶Tla sanoyej uejka onkaj on ueyikalpan kampa uelis nomanauis, se yejuan ken kita on tlakatl yejuan yomik, uelis kitojtokas ikan itlauei on yejuan otemiktij, niman uelis konajsis niman kimiktis para kuepiltis on tlen okichiu maski xkipiyaya tline* kimiktis, pampa xnotlauelitayaj. ⁷Yejua ika, nemechnauatia xkauakan yeyi kalpanmej tlakauiltin kampa nomanauilos.

⁸Ijkuak nemoTEKO Dios más kueyilis nemotlal ken okintlajtolmakak ika itokatsin nemoachtajtajan, ⁹nonekis nenkitlaliskej okse yeyi kalpanmej kampa uelis nomanauiskej on tlakamej. Ijkon uajnochiuas chikuasen ueyikalpanmej de nomanauiloyan. Mechmakas nochi on tlajli yejuan okintlajtolmakak nemoachtajtajan tla nenkitlakamatij nochi in tlanauatiltin yejuan aman nemechmaka, niman tla nenkitlajsojtaj* nemoTEKO Dios niman nochipa nenkitokaj iojui. ¹⁰Ijkon tej, xnenkimiktiskej yakaj tlakatl yejuan xkipiya tlajtlakojli ipan on tlajli yejuan nemoTEKO Dios mechmakas, nion uetsis nemopan nemejuamej sen tlajtlakojli de temiktilistli.

¹¹'Pero tla sen tlakatl kitlauelita yakaj, niman kompijpiya kampa yau para kimiktia, niman sakin*, yau ipan semej de on uejueyikalpanmej para nomanauis, ¹²kemaj on uejueyixtokej

tlayekankej ipan ikalpan on temiktijketl tlanauatiskej para ma kajsikan. Niman kemaj kitemakaskej itech on yejuan ken kitaya on mikatsintli para ma kimikti. ¹³Maka nenkikneliskej on yejuan ijkon temiktia. Niman ijkon on israelitas xok kipyaskej tlajtlakojli tla kimiktiaj sen tlakatl yejuan okimiktij yakaj yejuan xokipix tlajtlakojli. Kemaj nochi on tlajtlamach* kuajli kisas nemouan.

¹⁴Ipan on tlajli yejuan nemoTEKO Dios mechmakas, ika onkaj nenkitlakaitaskej on kampa nemotlalnamikij iuan nemonisiuchanejkau. Maka xkejkuanikan on neskayotl yejuan kiteititia kampa nemotlalnamikij iuan nemonisiuchanejkau. Nochipa ijki onyas ken okitlalijkej nemoachtajtajan.

Ley para on xkuajkualtin testigos

¹⁵Maka kaman nenkitlajtlakolmakaskej sen tlakatl ika on tlen xkuajli okichiu tla san se testigo nemi. Nochipa noneki nemis ome noso yeyi testigo yejuan san se tlajtojli kipyaskej.

¹⁶Tla sen tlakatl ika xkuajli iyojlo kinekis notestigotlalis para ipan istlakatis yakaj, niman kiteixpanuis ika okichiu itlaj xkuajli, ¹⁷in omemej tlakamej noneki yaskej ixpan toTEKO niman imixpan on tiopixkej niman on jueces yejuan kipyaskej tekiuajyotl ipan on tonajli. ¹⁸On jueces kixtlaloskej kuajli on tlen onochiu. Niman tla okinextijkej ika on testigo kijtous tlen xmelaauak, ¹⁹tla ijkon, in tlakatl yejua kiselis on castigo yejuan kinekiya ma kiseli on tlakatl yejuan ipan oistlakat. Niman ijkon nenkipopuloskej on tlen xkuajli onkaj nemotech.

²⁰Niman ijkuak on oksekimej kimatiskej on tlen onochiu, nomojtiskej niman xok kaman kinekiskej kichiuaskej on tlen sanoyej xkuajli. ²¹Ipan on kenon tlajtlakojli, maka xteiknelikan. Tla yakaj temiktia, no xmiktikan. Tla yakaj teixtepatsaua, no xkixtepatsauakan. Tla yakaj tetlanteyopeua no xtlanteyopeuakan. Tla yakaj temateposteki, no xmatepostekikan. Noso tla yakaj teixxiteposteki no xkixxitepostekikan.

Leyes para on guerra

20 ¹Ijkuak nenkisaskej para nenkonminuijsokiskej nemotlauelikniuan, niman nenkintaj ika yejuamej kimpiyaj miyek caballos, carretas de guerra, niman más sanoyej miyekej soldados xken nemejuamej, maka xkinmakajsikan, pampa nemejuamej nemouan yau nemoTEKO Dios yejuan omechkixtij ipan on tlajli Egipto. ²Ijkuak ye kisaskej on soldados para onteuijsokiskej, on tiopixki yas onotelketsas imixpan, ³niman ijkin kimijlis: “Xkakikan israelitas, aman nemouijsokiskej iuan nemotlauelikniuan. Maka xmoyolyemanilikan, nion maka xmomojtikan, nion maka xmojkamikikan, nion maka

xmojkakuekuevlakakan imixpan ⁴pampa nemoTEKO Dios nemi nemouan. Yejua kinuijsokis nemotlauelikniuan niman kichiuas para xkintlanikan.”

⁵Kemaj kej tlajtoskej intlayekankauan on soldados niman ijkin kimijliskej: “Tla semej de nemejuamej okichijchiu sen kajli niman xe peua kitekitiltia, ma uiya ma chantiti ipan on ikal. Ijkin kichiuas, pampa uelis mikis ipan on guerra niman yej okse tlakatl chantis ipan on yenkuik kajli. ⁶Niman tla semej de nemejuamej okitôkak sen uvasyoj niman xe kikua on achtoj itlakyo, ma uiya ichan, pampa uelis mikis ipan on guerra niman yej okse tlakatl kikuas on uvas. ⁷Niman tla semej nemejuamej yokijltan sen ichpochtli niman xe kinonamiktia, ma uiya ichan para nonamiktis niman chantis iuan isuau. Ijkon kichiuas pampa uelis mikis ipan on guerra niman yej okse iuan nonamiktis on ichpochtli.”

⁸Sakin, on tlayekankej oksejpa kinmijliskej on soldados: “Tla yakaj nomojtia niman xyolchikauak, ma uiya ichan pampa ika on inemojtil uelis kinmauas on sekimej soldados.”

⁹Niman ijkuak on tlayekankej yotlankej tlajtouaj, on soldadotlayekankej notlaliskej inyakanpan on soldados.

¹⁰Ijkuak nemejuamej nenkinisiuiskej sen ueyikalpan para nenkuijsokiskej, achtopa xkintlajoltikan on chanejkej tla kinekij noyoltlaliskej nemouan. ¹¹Tla on chanejkej ipan on ueyikalpan kiseliaj on tlajtojli niman mechkauiliaj nenkalakiskej, tla ijkon, nochimej on chanejkej nochiuaskej nemoesclavos niman kichiuaskej para nemejuamej, tekittl yejuan chikauak. ¹²Pero tla xokinekkej onoyoltlalijskej nemouan niman yej peuas mechuijsokiskej, tla ijkon, nemejuamej nenkiyejyeualoskej on ueyikalpan niman nenkinuijsokiskej on chanejkej. ¹³NemoTEKO Dios mechinmaktilis, niman nemejuamej nenkinmiktiskej ikan espada nochimej on tlakamej yejuan ompa chantij. ¹⁴Pero on siuamej, kokonej, yolkej niman nochi on tlen onkaj ipan on ueyikalpan, uelis nenkinmoyaxkatiskej nemejuamej. Niman no uelis nenkintekitiltiskej nochi on tlajtlamach* yejuan nemoTEKO Dios mechmakas on tlen inyaxka katka nemotlauelikniuan. ¹⁵No ijkin, nenkinchiuiliskej nochimej on uejueyikalpanmej yejuan uejka onokej, yejuan xteuan nopouaj ipan in naciones yejuan nису onokej. ¹⁶Pero ipan inueyikalpauan on naciones de Canaán yejuan nemoTEKO Dios mechyxakatia, xakaj nenkauaskej voltikaj. ¹⁷Yej tlami xkinmiktikan nochimej. Xkinmiktikan nochimej on heteos, amorreos, cananeos, ferezeos, heveos, niman on jebuseos ijkon ken toTEKO Dios yomechnauatij.

¹⁸Xchiuakan ijkon para ijki xmechititiskej on tlen sanoyej xkuajli yejuan kichiuaj ijkuak kinmauistiliaj imindioses, niman ijkon mechchiualtiskej xtlajtlakokan ixpan nemoTEKO Dios.

¹⁹Tla para nenkimoyaxkatiskej sen ueyikalpan nonekis miyek tonajli para nenkuijsokiskej, maka xkintsontekikan on kojtlakijlomej pampa itlakyo on kojtin* noneki para nenkikuaskej. Xnenkintsontekiskej pampa yejuamej san kojtin. Yejuamej xtlakamej yejuan uelis mechuijsokiskej. ²⁰Pero on kojtin* yejuan xtlakij, kemaj uelis nenkintsontekiskej para ika nemopaleuiskej ijkuak nenkinuijsokiskej on nemotlauelikniuan hasta kaman uetsij nemomak.

Tlinon kichiuas yejuan kinextia sen mikatsintli

21 ¹Tla ipan on país yejuan nemoTEKO Dios mechmakas para nemoyaxka* yes, kinextiaj sen mikatsintli yejuan yakaj okimiktij ipan campo niman xakaj kimati akinon okimiktij, ²on uejueyixtokej tlayekankej niman on jueces kixtlaloskej kech ika uejka kampa tlajkaltok on mikatsintli hasta kampa onokej on uejueyikalpanmej yejuan onokej más nisiu. ³Kemaj on uejueyixtokej tlayekankej yejuan nemij ipan on ueyikalpan yejuan más nisiu, konanaskej sen becerra yejuan xe kaman kitekitiltiaj para tlaxoponia*, ⁴niman kuikaskej ipan sen ixtlauatl yejuan xkaman kixoponiaj niman kipiya ayajtok yejuan nochipa kipiya atl. Niman ompa kechtsontekiskej on becerra.

⁵Kemaj nonisiuiskej on tiopixkej levitas pampa toTEKO okintlapejpenij para kichiuaskej intekiu ipan on tabernáculo* niman para tlatiochiuaskej ikan itokatsin toTEKO. Niman kampa onkaj tlauejli noso kampa itlaj kinokuiliaj, yejuamej kijtoskej kenijki kuajli nokuektlalis. ⁶Kemaj nochimej on uejueyixtokej tlayekankej de on ueyikalpan nomajtekiskej ipan on becerra yejuan okimiktijkej, ⁷niman kijtoskej in tlajtojlij: “Tejuamej xotikmiktijkej in tlakatl, nion xotikitakej akinon okimiktij. ⁸ToTEKO, xkintlajopolui mokoneuan israelitas, yejuan teju otikinmanauj ne Egipto. Niman maka xkintlajtlakolti de iyeyo in tlakatl yejuan xkipiya itlaj tlajtlakojli.” Tla ijkon, nenkichiuaskej, xmechtlajtlakolmakas toTEKO ipampa imikilis on tlakatl. ⁹Ijkon tej, nemejuamej nenkichiuaskej on tlen melajki ixpan toTEKO, niman nenkimokixtiliskej on tlajtlakojli ipampa imikilis on tlakatl.

Ley para on siuamej yejuan kimajsij ipan guerra

¹⁰Ijkuak nemouijsokiskej iuan nemotlauelikniuan, niman nemoTEKO Dios kichiuas para nenkintlaniskej niman nenkinmajsiskej sekimej on motlauelikniuan, ¹¹tla nensemej nenkitaj intsajlan yejuamej sen suatl yejuan kualtetsin, niman kuelita para kinosiuatis, ¹²uelis kuikas ichan. Niman kichiualtis ma nokuatexikalo, niman ma nostitejteki. ¹³Ma kixti on itlaken

yejuan kitlalijtiaya ijkuak okajsikej, niman ma kitlali tlakentli* yejuan yenkuik. Niman ma nokaua ichan on tlakatl, niman ma kinchokili itajuan se metstli. Sakin, on tlakatl uelis iuan nemis niman nochiuas iueuentsin* on suatl niman yejua nochiuas isiuau. ¹⁴Pero tla sakin* xok okuelitak, uelis kauilis ma uiya san kanon yejua kinekis. Pero xuelis kinamakas nion kipiya ken sen esclava pampa yejua yokipijpinajtij ika onotekak iuan.

On tlen kitokaroua kiselis sen yenkuiyotl

¹⁵“San ma tikonijtokan ika sen tlakatl kipiya ome isiuau. Se isiuau kineki niman on okse xkineki. Pero on omemej kitlaskaltililiaj, niman on suatl yejuan yejua xkineki yejua kitlakatilia on yenkuiyotl. ¹⁶Ijkuak ajsis on tonajli ijkuak on tlakatl kinxelouilis ikoneuan nochi on tlen kipiya, xuelis kitas ken iyenkuioy ikoneu on suatl yejuan yejua kineki. Pampa tla ijkon kichiuas, kichiuilis tlen xkuajli ikoneu on suatl yejuan xkineki yejuan melauak iyenkuioy. ¹⁷Ika onkaj, in iachtojkoneu yejua kimakas okpa ichkich ijkon ken kitokaroua sen tekoneu yenkuiyotl. Ika onkaj ijkon kichiuas pampa yejua achtoj otlakat, niman yejua kitokaroua okpa ichkich kiselis pampa yenkuiyotl.

Castigo para on tekoneuan yejuan xipan teitaj

¹⁸“Tla yakaj kipiya sen ikoneu yejuan xipan teita niman xompayejeuea, yejuan xkintlakamati itajuan maski ijkuak castigarouaj xkintlakamati, ¹⁹itajuan ika onkaj kuikaskej imixpan on uejueyixtokej tlayekankej de on ueyikalpan. ²⁰Niman ijkin kiteijliskej: “In tokoneu xitlaj* ika techtlakamati, niman xipan techita. Yejua sen tlakuatetl niman sen tlaunanketl.” ²¹Kemaj nochimej on tlakamej de on ueyikalpan kitemojmotlaskej hasta kaman miki. Ijkon nenkixtiskej on tlen xkuajli nemotsajlan, niman ijkuak kimatiskej on israelitas nomojtiskej.

Tlajtlamach tlanauatiltin

²²“Tla sen tlakatl kichiuas sen ueyi tlajtlakojli niman kajkopiloskej ipan sen kojtlitli* para ma miki, ²³xkuajli para itlalnakayo nokauas ajkopilkas nochi yeuajli ipan sen kojtlitli. Yej ika onka nenkitokaskej itlalnakayo sano ipan on tonajli pampa on yejuan kajkopilouaj ipan sen kojtlitli* Dios kitlaulia. Yejua ika, nenkitokaskej itlalnakayo ipan on tonajli para maka kijtlakos on tlajli yejuan nemoTEKO Dios mechmaka.

22 ¹Tla yakaj kita yopolio sen uakax noso sen borrego yejuan iyaxka* ichanejkau, maka nochiuas ken xkita, yej noneki kuikilis on iteko. ²Pero tla iteko on yolki xinisiuchanejkau, noso xkimati akinon iyaxka, tla ijkon, on yolki

kuikas ichan. Ompa kipiwas hasta kaman kitlajtlanis iteko, niman kemaj ika onkaj yejua kimakas. ³No ijki, nenkichiuaskej ika sen poloko, noso sen tlakentli*, noso san tlinon yejuan yakaj kipolos niman semej nemejuamej kinextis. Maka yej kikuis.

⁴Tla yakaj kita tlajkaltok ipan ojtli ipoloko* noso iuakax ichanejkau, maka san ompa kauas, yej ma kipaleui ma nokuiteua.

⁵Xkuajli para sen suatl kitlalis itlaken sen tlakatl. No xkuajli para sen tlakatl kitlalis itlaken sen suatl, pampa yejuan ijkon kichiua toTEKO Dios sanoyej kualania.

⁶Tla yakaj ipan iojui kinextia sen tototl tlapachoua ipan tlajli, noso ipan kojtlí, niman on nantli kimpachojtikaj iteuan noso ikoneuan, maka kuikas on nantli iuan on ikoneuan. ⁷Yej san uelis kinuikas ikoneuan, pero on nantli kauilis ma uiya. Ijkon nochi kuajli kisas iuan, niman kipiwas ueyi nemilistli.

⁸Ijkuak yakaj kichijchiuas sen kajli yenkuik, noneki kitlalilis tlapani sen tepantsintli iyeualkan, para ijkon xakaj uajuetsis, niman ichanejkauan xkintlajtlakoltiskej tla yakaj miki.

⁹Maka xtôkakan itsajtsajlan nemouvasyoj itlaj okse xinachtli, pampa toTEKO xmechkauilis nenkuiskej itlakyo on uvasyoj nion itlakyo on okse tlatoktli.

¹⁰Maka nenkixoponiskej nemotlal ikan yunta yejuan tlasalojli sen uakax iuan sen poloko.

¹¹Maka xtlalikan tlakentli* yejuan tlachijchijtlí ikan lana* tlanelojli iuan lino.

¹²Xtlalilikan itenchayajyo ipan on nauí esquina nemotlakenpani yejuan nemokentiaj.

Leyes para kenijki nonamiktias

¹³Tla sen tlakatl iuan nonamiktia sen ichpochtli, niman sakín*, xok kuelitas, ¹⁴kemaj kiteneuilis ika achtoj yonotekaka iuan okse tlakatl, noso kijtos: “Neyua iuan oninonamiktij in suatl, pero ijkuak iuan oninotekak, onikmat ika achto yonotekaka iuan okse tlakatl.” ¹⁵Tla ijkon, itajuan on ichpochtli yaskej kampa nemij on uejueixtokej tlayekankej de on ueyikalpan niman kiktiskej on sávana yejuan yesyo kampa nestias ika yejua melauak xkaman onotekak iuan yakaj tlakatl ijkuak ononamikti iuan on tlakatl. ¹⁶Niman itataj on ichpochtli kimijlis on uejueixtokej tlayekankej: “In tlakatl onikmakak nochpoch para isiuau, pero aman xok kineki. ¹⁷Aman kiteixpanuiya ika onotekaka iuan yakaj okse tlakatl ijkuak xe nonamiktia iuan. Pero nikan onkaj in kampa nestikaj ika melauak xonotekaka iuan yakaj okse tlakatl.” Kemaj kipatlauas on sávana yejuan yesyoj imixpan on uejueixtokej tlayekankej. ¹⁸Kemaj on uejueixtokej tlayekankej kajsiskej on tlakatl niman castigaroskej. ¹⁹Kichiualtiskej ma kitlaxtlaua sen

multa de 100 tomin de plata, niman on tomin kimakaskej itataj on ichpochtli pampa okipijpinajtij sen ichpochtli israelita. Niman on ichpochtli sanken* isiuau yes on tlakatl niman xkaman uelis iuan noxotonis ipan nochi inemilis.

²⁰ Pero tla on teixpanuulistli kisas yej melauak ika yejua yonotekaka iuan yakaj okse tlakatl, ²¹ tla ijkon, kuikaskej on ichpochtli hasta ikiauatempan ichan itataj, niman on tlakamej de on ueyikalpan kitemojmotlaskej hasta kaman miki pampa okichiu sen ueyi tlajtlakojli intech on israelitas niman okipijpinajtij itataj. Ijkon nenkixtiskej on tlajtlakojli nemotsajlan nemejuamej.

²² Tla sen tlakatl nenkinextiaj iuan onok sen suatl yejuan kipiya iueuentsin, ika onkaj nenkinmiktiskej on omemej. Ijkon nenkixtiskej on tlajtlakojli intech on israelitas.

²³ Tla sen ichpochtli yokijtlankej niman okse tlakatl kinamiki kanaj ipan on ueyikalpan niman noteka iuan, ²⁴ noneki nenkinuikaskej nochimej on omemej kampa tetlakanonotsaj on uejueyixtokej tlayakankej niman nenkintemojmotlaskej hasta kaman mikij. On ichpochtli mikis pampa xokitsajtsilij yakaj ma kimanau ipan on ueyikalpan. Niman on tlakatl mikis pampa okipijpinajtij sen ichpochtli yejuan yokijtlankaj. Ijkon nenkixtiskej tlajtlakojli nemotsajlan nemejuamej.

²⁵ Pero tla sen tlakatl kinextia ipan campo sen ichpochtli yejuan yokijtlan okse tlakatl, niman kichiualtia iuan ma noteka, tla ijkon, san kimitiskej on tlakatl yejuan okichiualtij iuan ma noteka. ²⁶ On ichpochtli xitlaj* kichiuiliskej pampa yejua xokichiu tlajtlakojli yejuan noneki ika mikis. In tlen okichiu in tlakatl sano ijki ken ijkuak sen tlakatl kimiktia okse tlakatl, ²⁷ pampa yejua okinextij iselti neka campo on ichpochtli yejuan yokijtlankaj, niman maski on suatl tsajtsiskia, xakaj ueliskia kimanauiskia.

²⁸ Tla sen tlakatl kinextia sen ichpochtli yejuan xe yakaj kijtlani, niman kichiualtia iuan ma noteka, niman yakaj kiminnextia, ²⁹ tla ijkon, on tlakatl ika onkaj kimakas itataj on ichpochtli 50 tomin de plata. Niman pampa yokipijpinajtij, ika onkaj nonamiktis iuan on ichpochtli, niman xkaman uelis iuan noxotonis ipan nochi inemilis.

³⁰ Sen tlakatl xuelis notekas iuan isiuau itataj pampa on sanoyej pinaualistli para itataj.

On tlakamej yejuan xueliskej nopouaskej iminuan on israelitas

23 ¹ Tla sen eunuco*, noso tla on kampa tlapiasoua kipiya san tlajkotsin, xuelis teuan nopouas iuan ikoneuan toTEKO.

²'Sen paxtilkonetl* xuelis teuan nopouas iuan ikoneuan toTEKO, nion iuejkakoneuan hasta yejuan ika majtlaktlipa generaci3n.

³'Xkaman uelis nopouaskej nemouan on amonitas, niman on moabitas, hasta yejuan ika majtlaktlipa generaci3n, ⁴pampa ijkuak onenualejkej ipan on tlajli Egipto, yejuamej xomechpaleuijkej ikan atl, nion tlakuajli. Niman no, yej okitlaxtlauilijkej Balaam, ikoneu Beor, yejuan ualeua iueyikalpan Petor ipan on tlajli Mesopotamia, para ma mechtlaueli. ⁵Pero nemoTEKO Dios xokinek okak Balaam. Yej okipatlak on tlauelijli ikan sen tlatichiualistli para nemejuamej, pampa yejua mechtlajsojtla. ⁶Aman tej, xkaman nenkimpaleuskej on tlakamej, nion xnemouikaskej kuajli iminuan ipan nochi nemonemilis.

⁷'Maka nenkintlauelitaskej on edomitas pampa yejuamej ken nenkintaj. No ijki, maka nenkintlauelitaskej on egipcios pampa nemejuamej nennemiyaj ipan imintlal ken xchanejkej. ⁸On edomitas niman on egipcios yejuan okiskej nemouan niman chantij nemouan yejuan ika yexpa generaci3n, uelis teuan nopouaskej iuan ikoneuan toTEKO. Xkinselikan ken israelitas.

Leyes para onyas chipaualistli ipan on campamento

⁹'Ijkuak nennemiskej ipan on campamento ipan on tonaltin de guerra inuan nemotlaluelikniuan, maka nenkichiuaskej on tlen xchipauak ixpan toTEKO. ¹⁰Tla semej de nemejuamej xchipauak nemi ixpan toTEKO pampa tlayoua okis ixinachyo^d kampa tlapiasoua, ika onkaj kisas ipan on campamento niman xuelis kalakis ipan nochi on tonajli. ¹¹Pero ijkuak ye tiotlak naltis, niman ijkuak kalakis tonaltsintli uelis oksejpa kalakis ipan on campamento.

¹²'On kampa nemoxixaskej, noneki onyas uejkatsin de on campamento. ¹³Iuan nochi on tlajtlamach* yejuan nenkiktitinemij, no nenkiktiskej sen kojyakapitstli para ika nentlachkuaskej achijtsin kampa nemoxixaskej niman kemaj nenkitlapachoskej on xixalistli. ¹⁴Xpiyakan nemocampamento chipauak pampa nemoTEKO Dios ompa nemi nemouan para mechmanauiya niman kichiuu xkintlanikan nemotlauelikniuan. Yejua xkineki kitas itlaj yejuan xchipauak nemotech para maka mechtlalkauis.

Tlajtlamach tlanauatiltin

¹⁵'Tla sen esclavo uajkisteua ichan iteko niman mechtlajtlanilia nokauas nemochan, xselikan niman maka nenkontemakaskej

d 23.10 Ixinachyo kijtosneki: "su semen".

itech iteko. ¹⁶Xkauilikan ma nokaua nemouan kampa yejua kitlapejpenis sen ueyikalpan yejuan kuelitas. Niman maka yakaj ma kipajsolo.

¹⁷Xakaj tlakatl nion yakaj suatl israelita uelis notemakas para auilnemis teuan ixpan itlaj dios para kimauistilis. ¹⁸Ipan itabernáculo nemoTEKO Dios, xakaj uelis kimakas tomin yejuan kitlani kampa auilnemi, para kitlaxtlauas sen yektlajtolmakalistli yejuan okichiu ixpan toTEKO. Xuelis ijkon kichiuas pampa on tomin oualeu ipan sen auilnemilistli yejuan toTEKO sanoyej kitlajyelita.

¹⁹Ijkuak sen nemokniu israelita nenkitlanejtiskej tomin, noso tlakuajli, noso san tlinon, maka xtlajtlanilikan ma mechtlaxtlauii itlanka. ²⁰Tla nenkitlanejtiskej yakaj yejuan xchanej, kemaj uelis nenkitlajtlaniliskej ma mechtlaxtaluili itlanka, pero sen israelita maka ijkon nenkichiuiliskej. Ijkon nemoTEKO Dios mechtiochiuas ipan nochi on tlajtlamach* yejuan nenkichiugaskej ipan on tlajli yejuan nemoyaxkatiskej.

²¹Ijkuak nenkichiuiliskej nemoTEKO Dios sen promesa, maka nenkuejkauitiskej ika nenkichiugaskej, pampa kuajli xmatikan ika nemoTEKO Dios mechyolkuitis, niman tla xnenkichiuj nenkipiyaskej tlajtlakojli ika on tlen onenkiprometerouilijakj Dios. ²²Tla xitlaj* promesa nenkichiuj itech Dios, xitlaj* tlajtlakojli nenkipiyaskej. ²³Pero, tla ika nemoyojlo nenkichiuiiaj nemoTEKO Dios sen promesa, tla ijkon, ika onkaj nenkichiugaskej kuajli niman xuejkajtika.

²⁴Ijkuak nenkalakiskej ipan iuvasyoj yakaj, uelis nenkikuaskej on uvas nochi kech nenkinekiskej, pero xuelis nenkiktiskej ipan nemochikiu nion sentetl. ²⁵Tla nennejnemij ipan se ojtli itech itlatok yakaj, uelis nenkitekiskej ika nemoma itlakyo on trigo, pero xuelis nenkitekiskej ika nemomachete.

Leyes para kenijki noxotonis sen tlakatl iuan isiuau

24 ¹Tla sen tlakatl nonamiktia iuan sen suatl, pero sakin*, xok kuelita pampa kinextilia itlaj yejuan xkuajli, yejua uelis kimakas sen amatlajkuilojli kampa kijtos ika iuan noxotonia*, niman kixtis de ichan. ²Ijkuak on suatl yokis ichan on tlakatl, uelis nonamiktis iuan okse. ³Pero tla on tlakatl yejuan ika okpa iueuentsin* no xok kinekis, niman no kimakas sen amatlajkuilojli kampa kijtos ika iuan noxotonia*, niman kuajkixtis ichan, noso tla yej mikis on tlakatl, ⁴tla ijkon, on tlakatl yejuan achtoj iuan ononamiktijka xuelis oksejpa iuan nemis pampa on suatl xok chipauak ixpan Dios. Yejua in sanoyej kualania toTEKO, niman nemejuamej noneki xnenkijtlakoskej on tlajli yejuan nemoTEKO Dios mehmaka para nemoyaxka*.

On tlajtlamach* leyes

⁵Ijkuak sen tlakatl kemach nonamiktia, maka kititlaniskej ipan guerra, nion maka kimakaskej itlaj okse tekittl ipan nochi se xipan, para ijki uelis nokauas ichan niman kipaktis isiuau.

⁶Tla yakaj nocuentajtia mouan, maka tiktlajtlanis imolino noso on tetl yejuan ika kuechouaj trigo pampa xok uelis kichijchius pan. On sa no ijki ken tla kuiliskiaj on tlen ika nopanoltis ipan inemilis.

⁷Tla nenkitaj ika sen israelita kichteki sen ichanejkau, para kipiayas ken esclavo noso para kinamakas, tla ijkon, on teichtekketl ika onkaj nenkimiktiskej para ijkon tlamis on tlen xkuajli nemotsajlan.

⁸Tla onkaj on kokolistli itoka lepra* nemotech, noneki kuajli nenkitlakamatiskej nochi on tlanauatiltin yejuan mechijliskej on tiopixkej levitas. Xchiuakan nochi ken nejua yonikinnauatij. ⁹Xkelnamikikan on tlen nemoTEKO Dios okichiuilij María ipan nemoojui, ijkuak onenkiskej Egipto.

¹⁰Tla yakaj nenkitlanejtiaj itlaj, maka nenkalakiskej ichan para nenkuiliskej itlaj yejuan nenkipiyaskej san chika mechtlaxtlaulilia. ¹¹Yej xmokauakan kiauatenko niman xchakan, para yejua ma kuajkixti on tlen mechmakas yejuan nenkipiyaskej san chika mechtlaxtlaulilia. ¹²Niman tla on tlakatl sen mayanki, niman mechkauilia itlaken, maka nenkiteltiskej on tlakentli* ipan on tlayoua. ¹³Ika onkaj nenkuepaskej on tlakentli* ijkuak xe tlapoyau para ijki uelis ika notlapachos ijkuak kochis. Niman yejua mechtlajsokamachilis pampa nenkitlajsojtaj*. Niman ijkon nemoTEKO Dios mechitas ika nenkichiuaj on tlen melajki ixpan.

¹⁴Maka ika xmauiltikan nemotlakeual yejuan mayanki. Maka xtlauxtlauilikan sa kenijki, nion maka xteltilikan itlaxtlauil san akinon, tla israelita noso tla xchanej yejuan nemi ipan semej nemoueyikalpan. ¹⁵Xtlauxtlauilikan mojmstla ijkuak xe kalaki tonaltsintli pampa yejua sen mayanki niman konmatstikaj itlaxtlauil. Tla xijki nenkichiuaskej, yejua uelis noueyikatsajtsilis itech toTEKO niman kijlis on tlen nenkichiuaj, niman toTEKO kitas ika nenkipiyaj tlajtlakojli.

¹⁶On tatajtin xuelis kinmiktiskej ipampa on tlen xkuajli okichijkej inkoneuan, nion on tekoneuan xuelis kinmiktiskej ipampa on tlen xkuajli okichijkej intajuan. Yej cada se mikis ipampa itlajtlakol.

¹⁷Maka xkinchiuilikan on tlen xkuajli on yejuan iknotsitsimej, nion on yejuan xchanejkej. Nion maka nenkiseliliskej on kaualtsintli itlaj itlaken chika nenkichaj para mechtlaxtlauilis. ¹⁸Maka xkelkauakan ika nemejuamej nenesclavos katkaj ipan on

tlajli Egipto, niman ika nemoTEKO Dios omechkixtij de ompa. Yejua ika, nemechnauatia xtlakamatikan nochi in tlajtlamach*.

¹⁹Ijkuak nenkipixkaskej nemotlatok niman tla seki onenkixkajkej, maka nemokuepaskej para nenkonkuiskej. Yej xkauakan para makuiti yakaj xchanej yejuan chanti nemouan, noso sen iknotsintli, noso sen siuakaualtsintli. Niman ijkon nemoTEKO Dios mechtiochias ipan nochi on tlen nenkichiuaskej.

²⁰No ijki, ijkuak nenkitekiskej on aceitunas ipan nemoolivoskojyoj, maka nenkokpauiskej para nenkitejtekiliskej ipan nochi imakojyotsitsuan. On aceitunas yejuan nokauas, xkinkauilikan para on xchanejkej, on iknotsitsimej niman on siuakaualtsitsimej.

²¹No ijki, ijkuak nenkitekiskej nemouvas, maka xkojokpauikan cada imatlakyo para nenkitekiskej yejuan onokau. Yej xkinkauilikan on yejuan xchanejkej, on iknotsitsimej niman on siuakaualtsitsimej. ²²Xkelnamikikan ika nemejuamej nenesclavos katkaj ipan on tlajli Egipto. Yejua ika, nemechnauatia xchiuakan nochi tlen melajki.

Okseki más tlanauatiltin

25 ¹Ijkuak omemej tlakamej itlaj ika nokualaniskej, noneki yaskej imixpan on jueces para yejuamej kichiuaskej on tlen melajki. Yejuamej kitoskej akinon xkiapiya tlajtlakojli niman akinon kipiya tlajtlakojli. ²On yejuan kipiya tlajtlakojli, noneki kitlatsuitekiskej. On juez tlanauatis ma kixakamanakan, niman kemaj ompa ixpan kitlatsuitekiskej on keskipa nonekis ipampa on tlen okichiu. ³Pero xkaman nenkitlatsuitekiskej hasta panos 40 tlatsuitekilistli, pampa uelis sanoyej nenkojkokoskej niman nenkipijpajtiskej.

⁴Maka xtentematlayotikan sen uakax ijkuak ipan chocholoua on trigo para kiteinia.

Sen konetl noneki kitokayotiskej ken itataj yejuan yomik

⁵Tla omemej iknijtin tlakamej san sekan chantij ipan itlal infamilia niman se de yejuamej miki niman xkajteua nion se ikoneu, tla ijkon, on siuakauajli* xuelis nonamiktis iuan okse tlakatl yejuan de okse familia. Yej, iuan nonamiktis icuñado niman ijki iuan tlaskaltis. ⁶On tlakakonetl yejuan achtoj kitlakatilis on suatl, kitokayotis ken itoka katka on iueuentsin* yejuan yomik. Ijkon itokayo xpopoliuis intech on israelitas. ⁷Pero tla on tlakatl xkineki nonamiktis iuan icuñada, on suatl noneki yas kampa nemij on uejueyixtokej tlayekankej de on ueyikalpan niman kimijlis: “Nocuñado xkineki nonamiktis nouan ken noneki

para ijkon xpopoliuis itoka ikniu ipan in tlajli Israel.” ⁸Kemaj on uejueyixtokej tlayekankej de on ueyikalpan kitekuitlaniskej ma uajla, niman iuan tlajtoskej on tlakatl. Niman tla yejua oksejpa kijtos ika xkineki nonamiktis iuan icuñada, ⁹tla ijkon, on suatl kinisiuis niman imixpan on uejueyixtokej tlayekankej, kixtilis se ikak on icuñado, niman kixchijchas. Niman kemaj ijkin kijtos: “¡Ijkin kichiuiiaj sen tlakatl yejuan xkineki kimakas ikniu iuejyakoneu!” ¹⁰Niman ifamilia on tlakatl ijkin kiteneuiliskej ipan on tlajli Israel: “Ifamilia on yejuan xkipiya ikak.”

Okseki leyes

¹¹Tla omemej tlakamej nouijsokij niman uajlas isiuau semej de on tlakamej para kimanauis iueuentsin, niman kimajxaktılanas on tlakatl yejuan teuisoki, ¹²tla ijkon, nemejuamej nentlanauatiskej para ma kitekilikan ima on suatl. Maka nenkikneliskej.

¹³⁻¹⁴Ijkuak nentlanamakassej noso nentlakouaskej, maka nenkitekitiltiskej tlatemachiualtin yejuan xajsitikaj* para nentlaixpachoskej. ¹⁵Yej, xpiyakan tlatemachiualtin yejuan kuajli ajsitokej para ijkin nennemiskej miyek xipan ipan on país yejuan nemoTEKO Dios mechmakas. ¹⁶Ijkon xchiuakan pampa toTEKO Dios sanoyej kikualaniaj nochimej on tlakamej yejuan tlakajkayauaj niman tlaixpachouaj.

Tlanauatijli para kinmiktiskej on amalecitas

¹⁷Xkelnamikikan on tlen omechchiuilij Amalec inuan on amalecitas ijkuak onenkiskej Egipto. ¹⁸Xkelnamikikan ika yejuamej nion xokimakassej Dios. Omechuijsokkej ipan ojtli ijkuak nemochimej* sanoyej nenuajsiautiayaj niman xok nenkojtikej katkaj. Niman okinkuitlapanuijkej para okinuijsokkej on israelitas yejuan yonokajkaj tlakuitlapan. ¹⁹Yejua ika, ijkuak nemoTEKO Dios yomechmanauij de nochimej nemotlauelikniuan yejuan nemij iyeualkan on tlajli yejuan nemoTEKO Dios mechmakas para nenkimoyaxkatiskej, ika onkaj nenkimpopoloskej ipan in tlaltikpaktli nochimej on amalecitas para xok kaman kinmelnamikiskej. ¡Maka nenkelkauaskej!

On uentli de on achtoj pixkalistli

26 ¹Moisés ijkin okinmijlij: “Ijkuak yonenkalakkej ipan on tlajli yejuan nemoTEKO Dios mechmakas para nemoherencia niman ye ompa nenchantiskej, ²nenkuiskej seki on achtoj tlakyotl yejuan nenpixkaskej ipan on tlajli, niman nenkiktiskej ipan sen chikiutli ne ipan on tlajli kampa nemoTEKO Dios kitlapejpenis para itabernáculo kampa kitlakaitaskej

itokatsin. ³Ompa nenyaskej itech on tiopixki yejuan on tonajli kichiuas itekiu ipan on tabernáculo, niman ijkin nenkijliskej: ‘Nejua nikpantlantia aman ixpan noTEKO Dios ika yonikalak ipan in país yejuan noTEKO onotlajtolmakak ika itokatsin itech toachtajtahuan ika techmakas.’ ⁴Kemaj On tiopixki kikuis on chikiutli yejuan nemejuamej nenkimakaskej, niman kitlalis ixpan itlaixpan* nemoTEKO Dios. ⁵Kemaj nenkijtoskej in tlajtojli ixpan nemoTEKO Dios:

“Noachtajtahuan katkaj arameos^e yejuan san kijkistinemiyaj. Ijkuak okalakkej ipan on tlajli Egipto, san keskimej katkaj inkoneuan, pero ompa onokajkej, niman sakin* onochijkej sen ueyi nación yejuan okipixkej miyek poder. ⁶Pero on egipcios techtekitiltiyaj ipan tekittl yejuan sanoyej ouijtikaj* niman sanoyej techtlajyouiltiyaj. ⁷Kemaj otiktalajlanilijkej iminTEKO Dios toachtajtahuan para ma techpaleui, niman yejua okak toyemankatlajlanilis. Yejua okitak kenijki techtlajyouiltiyaj, kenijki titekitiyaj ikan tekittl yejuan sanoyej ouijtikaj*, niman okitak nochi ken titajmanayaj. ⁸Yejua ika, toTEKO otechkixtij de Egipto ikan iueyi poder niman okichiu miyek tlamajuisoltin niman miyek milagros* yejuan okinmojtij on egipcios. ⁹Niman otechajuikak nikan niman otechmakak in tlajli kampa sanoyej tlatlaki niman xitlaj* poliui. ¹⁰Yejua ika, aman nikuajki in achtoj pixkalistli de in tlajli yejuan toTEKO onechmakak.”
⁷Kemaj nenkitlaliskej on chikiutli ixpan nemoTEKO Dios niman nemotlakuantelketsaskej ixpan niman nenkimauistiliskej. ¹¹Sakin, nenkichiuaskej sen iluittl ikan miyek pakilistli ipampa nochi on tlajtlamach* yejuan nemoTEKO Dios yomechmakak nemejuamej niman nemochanejkauan. No ijki, xkinnotsakan on levitas niman on xchanejkej yejuan nemouan nemij para pakiskej nemouan.

On diezmo* yejuan noneki cada yeyi xipan

¹²Ijkuak ajsis on ika yeyi xipan para nenkitemakaskej nemodiezmo* de nochi on tlen tlaki ipan nemotlal, nenkinmakaskej nemodiezmo* on levitas, on iknotsitsimej, on siuakaualtsitsimej, niman on yejuan xchanejkej para ma kuakan nochi tlen kinekiskej. ¹³Kemaj ijkin nenkijliskej nemoTEKO Dios:

“Yonikxeloj ne ipan nochan on diezmo* yejuan tlakauijli para tejua. Niman yonikinmakak on levitas, on iknotsitsimej, on siuakakaualtsitsimej niman on xchanejkej yejuan nemij ipan topaís. Yonikchiu nochi on tlen tejua otitlanauatij. Xitlaj onikelkau, nion xitlaj* onikixkau motlanauatil. ¹⁴Xitlaj onikuaj

e 26.5 Arameos katkaj on tlakamej yejuan nemiyaj ipan on país itoka Aram.

de on diezmo* ijkuak ninajmanaya ika onitetokak, noso ijkuak ninemiya xchipauak mixpan, nion xonikinuentlalilij on mikatsitsimej. NoTEKO Dios, nejua onimitstlakamat niman onikchiu nochi on tlen otinechnauatij. ¹⁵Xuajtlacha desde ne ipan moiluikak kampa yektli mochan niman xkintiochiua mokoneuan israelitas. Niman xtiochiua in tlajli yejuan yotitechmakak kampa sanoyej tlatlaki niman xitlaj* poliui, ijkon ken otikintlajtolmakak ika motokatsin toachtotajuan.”

On israelitas nemij tlatiochijtin ixpan toTEKO

¹⁶Kemaj Moisés ijkin okinmijlij: “Aman in tonajli nemoTEKO Dios mechnauatia xtlakamatikan nochi in tlanauatiltin niman in leyes. Xtlakamatikan ikan nochi nemoyojlo niman ikan nochi nemoalma. ¹⁷Aman nemejuamej yonenkijtojkej ika toTEKO, yejua nemoDios. Niman yonenkiprometerojkej ika nenkitokaskej iojui, niman ika nenkitlakamatiskej nochi itlamachtluan, ileyes niman itlanauatilan. ¹⁸No ijki, toTEKO aman yokijtoj ika nemejuamej israelitas nenitetlajsojkakoneuan yejuan sanoyej kintlajsojkaita, niman san yejua itech nenteyaxkauan* ken omechprometerouilij kichiuas. Niman yejua tlanauatia nenkichiuaskej nochi itlanauatilan. ¹⁹Yejua kichiuas de nemejuamej sen ueyi nación para on tlakamej mechueyiteneuaskej, niman nochiuiyan mechixmatiskej niman mechtlakaitaskej xken on oksekimej naciones yejuan toTEKO okintlalij. Nemejuamej nemochiuaskej tlatiochitin para toTEKO Dios ken yejua okijtoj.”

On tlanauatiltin kijkuilouaj ipan on temej yejuan onkaj ipan on tepetl Ebal

27 ¹Moisés, niman on uejueixtokej intech on israelitas okinmakakej on israelitas in tlanauatiltin. Ijkin okinmijlijkej:

“Xchiuakan nochi on tlen aman nemechnauatia. ²Ijkuak nenkipanoskej on río Jordán niman nenkalakiskej ipan on tlajli yejuan nemoTEKO Dios mechmakas, xkintelketsakan temej patlachtikej yejuan uejueyimej, niman xkinmalauilikan tenextli. ³Niman ipan on temej nenkijkuiloskej nochi on tlajtoltin de on tlanauatiltin yejuan yomechnauatij nenkichiuaskej. Ijkon xchiuakan ijkuak nenkalakiskej ipan on tlajli kampa sanoyej tlatlaki niman xitlaj* poliui yejuan nemoTEKO Dios mechmaktilis ijkon ken okimprometerouilij nemoachtotajuan. ⁴Ijkon tej, ijkuak yonenkipanokej on río Jordán, noneki nenkintelketsaskej ipan on tepetl Ebal on temej yejuan yonemechnauatij, niman nenkinistaliskej ikan tenextli. ⁵No ijki, noneki nenkichijchiuaskej sen tlaixpan* ikan temej para nemoTEKO Dios, niman maka

nenkinximaskej on temej ikan tepostli. ⁶Xtekitiltikan temej yejuan xtlapankej niman xtlaxintin para nenkichijchiaskej on tlaixpan*. Niman ompa ipan on tlaixpan* nenkimakaskej nemoTEKO Dios uentli yejuan nochi tlatlas, ⁷niman on uentli de yoltlalilistli. Niman ompa ixpan nemoTEKO Dios neniluichiaskej ikan ueyi paktli niman nentlakuaskej. ⁸Ipan on temej yejuan kipiya tenextli noneki nenkijkuiloskej niman kuajli nestias on tlajtojli de nochi on tlanauatiltin yejuan yonemechmakak.”

⁹Sakin, Moisés okinuikak on tiopixkej levitas, niman okinmijlij on israelitas:

“Maka xnauatikan israelitas, yej xkakikan. Aman nemejuamej yonemochijkej ikoneuan nemoTEKO Dios. ¹⁰Yejua ika, tej xtlakamatikan nemoTEKO Dios niman xchiuakan itlanauatiltin niman ileyes yejuan nejua nemechnauatia aman.”

On tlaueliltin para on yejuan xkitlakamatij ileyes toTEKO

¹¹Sano ipan on tonajli Moisés okinmijlij on israelitas in tlanauatijli:

¹²“Ijkuak nemejuamej yonenkipanokej on río Jordán, on tribus de Simeón, Leví, Judá, Isacar, José niman Benjamín notelketsaskej ipan on tepetl Gerizim niman kitoskej on tlatiochialistin yejuan kiseliskej on israelitas tla kitlakamatij ileyes toTEKO. ¹³Niman on tribus de Rubén, Gad, Aser, Zabulón, Dan niman Neftalí notelketsaskej ipan on tepetl Ebal niman kinteneuaskej on tlaueliltin yejuan on israelitas kinseliskej tla xkintlakamatij ileyes toTEKO. ¹⁴On levitas kinnotsaskej nochimej on israelitas, niman chikauak ijkin kijtoskej in tlajtojli:

¹⁵“Ma kajsí tlauelijli on yejuan kimachijchias sen ídolo de kojtlí, de tetl noso de tepostli, niman kichtakapiyas kampa xakaj kimatis ika kimaustilia. Kajsí tlauelijli pampa yejua on sanoyej kualania toTEKO.” Niman nochimej on israelitas kijtoskej: “¡Ma ijki nochiua!”

¹⁶“Ma kajsí tlauelijli on yejuan xkitlakaita itataj noso inanaj. Niman nochimej on israelitas kijtoskej: “¡Ma ijki nochiua!”

¹⁷“Ma kajsí tlauelijli yejuan kejkuanis on neskayotl yejuan kiteititia kampa notlalnamiki iuan inisiu chanejkau para kikuilis seki itlal.” Niman nochimej on israelitas kijtoskej: “¡Ma ijki nochiua!”

¹⁸“Ma kajsí tlauelijli yejuan okse lado kontitlanis on yejuan xtlacha.” Niman nochimej on israelitas kijtoskej “¡Ma ijki nochiua!”

¹⁹“Ma kajsí tlauelijli yejuan kichiuilis itlaj xkuajli yakaj yejuan xchanej, noso kaualtsintli noso iknotsintli.” Niman nochimej on israelitas kijtoskej: “¡Ma ijki nochiua!”

20 “Ma kajsi tlauelijli yejuan iuan notekas isiuau itataj pampa ijkon xkitlakaita itataj.” Niman nochimej on israelitas kijtoskej: “¡Ma ijki nochiua!”

21 “Ma kajsi tlauelijli yejuan notekas iuan sen yolki.” Niman nochimej on israelitas kijtoskej: “¡Ma ijki nochiua!”

22 “Ma kajsi tlauelijli yejuan iuan notekas ikniu yejuan siuatl yejuan okse itataj noso okse inanaj.” Niman nochimej on israelitas kijtoskej: “¡Ma ijki nochiua!”

23 “Ma kajsi tlauelijli on yejuan iuan notekas imonan.” Niman nochimej on israelitas kijtoskej: “¡Ma ijki nochiua!”

24 “Ma kajsi tlauelijli yejuan kimiktis yakaj san ichtaka.” Niman nochimej on israelitas kijtoskej: “¡Ma ijki nochiua!”

25 “Ma kajsi tlauelijli yejuan kiselis tomin para kimiktis yakaj tlakatl yejuan xitlaj* kipiya tlajtlakojli.” Niman nochimej on israelitas kijtoskej: “¡Ma ijki nochiua!”

26 “Ma kajsi tlauelijli yejuan xkichiuas niman xkitlakamatis nochi in tlanauatiltin.” Niman nochimej on israelitas kijtoskej: “¡Ma ijki nochiua!”

Tlatiochialistli para yejuan kitlakamatij ileyes toTEKO

(Lv 26.3-13; Dt 7.12-24)

28 ¹Niman kemaj Moisés okinmijlij on israelitas: “Tla melauak nenkitlakamatiskej nemoTEKO Dios niman nenkichiuaskej nochi itlanauatiltin yejuan aman nemechnauatia, tla ijkon, toTEKO kichiuas para más nenuuejueyixtiaskej xken nochimej on oksekimej naciones ipan in tlatikpaktli. ²Niman no nemopan uajlas niman nokauas nochi in tlatiochialistin, pampa nenkitlakamatij nemoTEKO Dios.

³Nentlatiochijtin yeskej ipan on ueyikalpan niman ipan on campo.

⁴Nentlatiochijtin yeskej ikan miyekej nemokoneuan, ikan miyek nemotlatok, inkoneuan nemouakaxuan, inkoneuan nemoborregos niman inkoneuan nochimej on sekimej nemoyolkauan.

⁵Nentlatiochijtin yeskej ika miyek tlakuajli yejuan onyas ipan nemochikiu niman ipan nemokuejxon.

⁶Niman nemejuamej nentlatiochijtin yeskej ipan nochi on tlen nenkichiuaskej nemochan, ipan campo, niman nochuiyan.

⁷ToTEKO mechinmaktilis nemotlaeliknivan ijkuak mechuijsokiskej. Yejuamej kuajli uajtekpantiaskej ijkuak uajlaskej nemotech, pero nochajchayauaskej niman ontlatlaksaskej sa kanika.

⁸ToTEKO kitiochiuas nochi on tlajtlamach* yejuan nenkichiuaskej, niman kuajli kintemitis nemokueskonuan.

Niman kintiochias nemotlalan yejuan mecmakas para ompa nennemiskej ikan miyek pakilistli.

⁹Tla nenkichiaskej itlanauatiluan niman nenkitokaskej iojui, nemoTEKO Dios mechpiyas ken ikoneuan nentlakaultin itech, ijkon ken omechtlajtolmakak. ¹⁰Kemaj nochimej on tlaltikpaktlakamej ipan in tlatikpaktli kitaskej ika nemejuamej nemochiuaj ikoneuan toTEKO Dios, niman nochimej mecmakajsiskej niman mechtlakaitaskej. ¹¹ToTEKO mechititis ika mechtlajsojtla yejua ika mechinmakas miyekej nemokoneuan, niman nemoyolkauan kimpiyaskej miyekej inkoneuan. Niman kichias para nenkipiyaskej miyek tlakyotl ipan on tlajli yejuan okintlajtolmakak ika itokatsin nemoachtojtajuan ika mecmakas. ¹²ToTEKO kitlapos on cielo kampa kejeua on kiautli para kuajtitanis on kiautli ijkuak on nemotlal kinekis. Niman mechtiochias ipan nochi tekittl yejuan nenkichiaskej. Uelis nenkintlanejtiskej tlakuajli oksekimej naciones, pero nemejuamej xnonekis yakaj nenkitlaneuiliskej itlaj. ¹³ToTEKO nochipa mechtlalis ken tlayekankej intech on oksekimej naciones, niman yejuamej xkaman mechyekanaskej. Nochipa nenricos yeskej niman nenkojtijkej yeskej, niman xkaman nennemiskej mayankej niman xnenkojtikej. ToTEKO ijkon kichias tla nenkitlakamatiskej niman nenkichiaskej itlanauatiluan yejuan aman mechnauatia. ¹⁴Maka kaman nenkinkauaskej in tlanauatiltin para yej nenkinneltokaskej oksekimej dioses, nenkinmauistiliskej niman nenkintekipanoskej.

Tlaelijli para on yejuan xkitlakamatis toTEKO

(Lv 26.14-46)

¹⁵Kemaj Moisés okinmijlij: ‘Pero tla xnenktlakamatij nemoTEKO Dios, nion xnenkichiuaj nochi itlanauatiluan niman ileyas on yejuan aman yomechnauatij, uajlas nemopan nochi in tlaeliltin:

¹⁶Nentlaeliltin yeskej ipan ueyikalpan, niman ipan campo.

¹⁷Tlaelijli yes on tlakuajli yejuan onyas ipan nemochikiu niman ipan nemokuejxon.

¹⁸Nentlaeliltin yeskej yejua ika xuelis nenkimpiyaskej miyekej nemokoneuan, nion itlakyo nemotlatok, nion inkoneuan nemouakaxuan, nion inkoneuan nemoborregos nion nochimej nemoyolkauan.

¹⁹Niman nentlaeliltin yeskej ipan nochi on tekittl yejuan nenkichiaskej.

²⁰ToTEKO mechajtitlanilis tlaelijli niman popolouilistli niman ajmantli ipan on tlen nenkichiaskej, niman amanaman mechpopolos pampa onenkichijkej on tlen sanoyej xkuajli

niman onenkitlalkauijkej toTEKO. ²¹ToTEKO mechajtitlanilis miyek kokolistli yejuan mechmiktis ne ipan on tlajli kampa nenchantiskej. ²²No ijki, mechajtitlanilis kokolistin yejuan temiktia, uakatlatlajxistli, tatapachiuilistli yejan temojtij, totonalistli* yejuan teijjomiktia, tlauiatsalistli, niman miyek chauistli ipan nemotlatok. Nochi in tlajtlamach* kokolistli mechajsis hasta kaman mechixpoloua. ²³Xkiauis niman nemotlal chikauak yes ken tepostli. ²⁴Yej ken kiautli, toTEKO kuajtitlanis ajakaxajli niman ajakatlalteutli hasta kaman nenmijmikij.

On israelitas xtetlaniskej tla tlajtlakouaj

²⁵ToTEKO mechemaktis para ma mechtlanikan nemotlaueliknivan. Ijkuak nenyaskej ipan guerra kualtsin nentekpantiaskej, pero ijkuak mechixnamikiskej, sa kanika nemontlatlaksaskej. Niman nochimej on tlakamej ipan in tlaltikpaktli nomojtiskej ika on tlen nochiuas nemotech. ²⁶On totomej niman on tepeyolkej tekuanimej mechkuaskej ijkuak yonenmikkej, niman xakaj nemis ompa para kinmomojtis.

²⁷ToTEKO mechtlayyouiltis ikan tlaxuistin yejuan najayochpilouaj ijkon ken okinchiuilij on egipcios. No ijki, kichiuas para ma mechajsi sauatl, niman on kokolistli yejuan sanoyej kekexkik, niman xuelis nempajtiskej. ²⁸No ijki, toTEKO kichiuas xajakayouakan, xixpajpayatikan, niman xtlamachilispoliukan. ²⁹Ijkuak tlakualispan nenmajmayautinemiskej ken se yejuan xtlacha. Nochi tlen nenkichiuaskej xitlaj* kuajli kisas. Mojmotla mechtlayyouiltiskej niman mechtlachtekiliskej, niman xakaj mechpaleuis.

³⁰Nenkijtlaniskej sen suatl para nenkimonamiktiskej, pero okse tlakatl iuan notekas. Nenkimochijchiuiliskej nemokal, pero xipan nenchantiskej. Nenkitoiskaskej uvas, pero xnenkimatiskej ken uelik itlakyo. ³¹Nemixpan kechkoyoniskej nemouakax, pero nemejuamej xnenkikuaskej inakayo. Mechkuuiliskej nemopoloko* niman xok mechkuepiliskej. Nemoborregos mechichtekiliskej nemotlaueliknivan, niman xakaj mechpaleuis para oksejpa mechinkuepiliskej. ³²Nemokoneuan tlakamej niman siuamej kinuikaskej ipan oksekimej naciones.

Maski sanoyej nenkintejetemoskej, xuelis nenkinnextiskej. ³³Tlakamej yejuan xnenkinmixmatij kikuaskej itlakyo nemotlatok, niman on tlen nenkitlaniskej ipan nemotekiu nochi para yejuamej yes. Niman nochipa nentlayyouiskej, niman mojmotla nemokanauiltiskej. ³⁴Ijkuak nenkitaskej nochi in tlajtlamach*, nentlamachilispoliuiskej. ³⁵ToTEKO mechtlayyouiltis ikan nayochpiloualistli ipan nemoteteponuan niman ipan nemometskojyouan. Niman mechnokentis ipan nochi

nemotlalnakayo desde nemokxipalko hasta nemokuanepantlaj, niman xuelis nenpajtiskej.

³⁶ToTEKO kichiuas para nemejuamej niman nemorey ma mechuikakan ipan sen nación yejuan nemejuamej niman nemoachtojtajuan xonenkixmatkej. Niman ompa nenkinmauistiliskej on dioses yejuan tlachijchijtin de kojtlit* niman de tetl. ³⁷On tlakamej sanoyej nomojtiskej ijkuak mechtaskej ken nentlajyouiyaj. Niman yejuamej mechuejuetskiliskej, niman nemoka sanoyej kamanaloskej ipan nochi on kalpantin kampa mechuikas toTEKO.

³⁸Nenkitôkaskej miyek xinachtli pero nenkipixkaskej san achijtsin, pampa kikuaskej on chapolimej. ³⁹Nenkitôkaskej uvas niman kuajli nenkuidaroskej, pero xnenkitekiskej itlakyo, nion xnenkoniskej vino pampa nochi on uvas kikuaskej okuilimej. ⁴⁰Nenkimpiyaskej olivo kojtin* nochiuiyan ipan nemotlal, pero xuelis nemochauaskej ikan iminaceite, pampa itlakyo selikaxinis. ⁴¹Nenkipiyaskej nemotelpochuan niman nemochpochuan, pero xuelis nemiskej nemouan pampa kinmajajsiskej niman kinuikaskej ipan oksekimej países. ⁴²On chapolimej kitlamiskej nochi on kojtin* niman nochi nemotlatok. ⁴³On xchanejkej yejuan chantij ipan nemotlal más miyekixtiaskej niman más kipyaskej poder, niman nemejuamej yej nenachijtsintitiaskej niman nenkipolojtiaskej nemopoder. ⁴⁴Yejuamej uelis mechtlanejtiskej, pero nemejuamej xitlaj* nenkipiyaskej para nentetlanejtiskej. Yejuamej tlayekanaskej, pero nemejuamej nentlatokatiaskej.

⁴⁵Nochi in tlaueililitin nemopan uetsis niman mechtokatinemis hasta kaman mechpopoloua, pampa xonenkinekkej onenkitlakamatkej nemoTEKO Dios nion xonenkichijkej itlanauatiluan niman ileyas yejuan otlanauatij yejua. ⁴⁶Nochi in tlajtlamach* tlaueililitin, yejua yes sen señal ika toTEKO mechcastigaros nemejuamej niman nemouejkakoneuan para nochipa. ⁴⁷Pampa xonenkitekipanoj nemoTEKO Dios ikan pakilistli ijkuak miyek tlajtlamach* omechmakak, ⁴⁸nenkintekipanoskej nemotlaueelikniuan yejuan toTEKO kintitlanis nemotech. Nenkipanoskej mayantli, amiktli, xnenkipiyaskej nemotlaken niman sanoyej tlamach mechpolos. ToTEKO kichiuas para nemochiuaskej esclavos de on nemotlaueelikniuan hasta kaman mechpopolouaj. ⁴⁹ToTEKO kuajtitanis nemotech sen nación yejuan sanoyej uejka ualeuas ken sen kuaktli ijkuak amanaman uajnopolojtikisa para kajsí on yolki yejuan kikua. Sen nación yejuan xnenkintlajtolkakiskej. ⁵⁰On tlakamej yeskej sanoyej xkuajkualtin, niman xkintlakaitaskej on ueuentsitsimej, nion xkinmikneliskej yejuan kokonej. ⁵¹Yejuamej kinkuaskej inkoneuan nemouakxuan

niman on tlen tlakis ipan nemotlal, hasta kaman nochi mechtlamiliskej. Yejuamej xmechkauiliskej trigo, nion vino, nion aceite de olivo, nion ikoneuan nemouakaxuan, nion ikoneuan nemoborregos. Ijkon nenmikiskej ikan apistli. ⁵²Kinyejeualoskej nemoueyikalpanuan yejuan kipiay tepanchinantin, niman kinuijsokiskej hasta kaman xixinij on tepanchinantin yejuan ueuejkapanmej niman sanoyej kojtikey yejuan nemejuamej nenkuiyaiyaj inka nemomanauiskiaj. Kemaj, melauak kinyejeualoskej nochimej on oksekimej uejueyikalpanmej niman kinuijsokiskej imanian on nemopaís on yejuan toTEKO omechmakak. ⁵³Chika nemotlaelikniuan ipan nemiskej kixoxotoniskej nemoueyikalpanuan, sanoyej nenkipiyaskej ueyi mayantli hasta nemokoneuan nenkinkuaskej. Nenkinkuaskej nemokoneuan tlakamej, niman nemokoneuan siamej yejuan nemoTEKO Dios omechinmakak. ⁵⁴Hasta sen tlakatl yejuan más teikneliani, noso más nomaluiya niman yolyemanki*, xkiknelis ikniu nion isiuau maski sanoyej kitlajsojtla, nion ikoneuan yejuan sanken* nemij. ⁵⁵Nion xitlaj* kinmakas innakayo ikoneuan yejuan kikuas pampa yejua no xkajxilis tlen kikuas. Ijkon yes on ajmantli yejuan nenkipiyaskej ijkuak nemotlaelikniuan mechyejeualoskej ijtik nemouejueyikalpanuan. ⁵⁶Hasta sen situatl yejuan más yolyemanki* niman teikneliani, hasta xkuelita kicholos tlajli, nokuepas xompatik. Maski kitlajsojtlaya* iueuentsin, xok kiknelis, nion ikoneuan tlakamej niman siamej. ⁵⁷Yejua, ijkuak kinemitis ikonetsin, niyanas para kikuas on konetsintli, sanken* iuan iikal. Xkimakas iueuentsin* nion ikoneuan pampa xok onyas itlaj okse para kikuas ijkuak nemotlaelikniuan kinyejeualoskej nemouejueyikalpanuan.

⁵⁸Tla xnenkichuaskej nochi in tlanauatiltin yejuan tlajkuilolnestikaj ipan in amamoxtli*, nion xnenkitlakaitaj itokatsin toTEKO Dios yejuan sanoyej ueyixtikaj, ⁵⁹yejua mechajtitlanilis nemejuamej niman nemouejkakoneuan uejueyi niman temojti kokolistin yejuan xonkaj tlinon ika pajtiskej. ⁶⁰ToTEKO kuajtitlanis on temojtij kokolistin yejuan okinmajsika on Egipcios, yejuan sanoyej onenkimakaskej. Niman on kokolistin nochipa mechtlajyouiltis. ⁶¹No ijki, mechajtitlanilis ok seki kokolistin niman chauistin yejuan xtlajkuilolnestikaj ipan in amamoxtli* de tlamachtijli. Niman nentlajyouiskej hasta kaman nenmikiskej. ⁶²Maski nemejuamej israelitas sanoyej nenmiyekej katkaj ken sitlalimej ipan cielo, nemokauaskej sa nenkeskimej pampa xonenkitlakamatkej nemoTEKO Dios.

⁶³Ijkon ken toTEKO opak para omechchiuilij tlen kuajli niman omechmiyekilij, no ijki pakis para mechtlaxoxotonilis, niman mechmiktis. Sano yejua mechkixtis ipan on tlajli yejuan aman

nenkiselijaj ken nemoyaxka*. ⁶⁴ToTEKO mechsesemanas imanian naciones desde ipeuyan in tlaltikpaktli hasta itlamiyan. Niman ompa nenkinmauistiliskej dioses, dioses yejuan tlachijchijtin ikan kojtlit* niman ikan tetl yejuan nemejuamej nion nemoachtojtajuan xonenkimixmatkej. ⁶⁵Niman chika nennemiskej ipan on naciones, xnempakiskej, nion xnenkinextiskej sen tlajli kampa uelis nemoseuiskej, pampa toTEKO kichiuas para xnemikan ikan nemojtijli. Yejua kichiuas para xajmankanemikan ika on nemoajmankaixtololojuan, niman nesis ika ipan nemoyojlo sanoyej nenmajmanaj. ⁶⁶Nochipa itlaj nemopan nochiuasnekis para mehmiktisnekis. Ipan tonajli niman ipan yeuajli nemojkanemiskej niman xkaman nemoyolika nennemiskej ⁶⁷ipampa on tlen temojtij nenkitaskej. Sanoyej nemomojtiskej hasta nenkijtoskej ijkuak kualkan ‘¡Niknekiskia ma tlayouatitetsi!’ Niman ijkuak tlayoua nenkijtoskej: ‘¡Niknekiskia ma tlanestetsi!’ ⁶⁸Niman maski toTEKO omechijlij ika xokaman oksejpa nenmokuemaskej ipan on ojtli de Egipto, yejua mechuikas oksejpa ipan barcos. Niman ompa nemotetejtekiuiltiskej para ma mechkouakan ken esclavos intech nemotlaueliknuijan, pero xakaj kinakis mechkouas.”

Ipacto* toTEKO iuan Israel ipan on tlajli Moab

29 ¹In yejua pacto* yejuan toTEKO okinauatij Moisés kichiuas iminuan on israelitas ipan on tlajli Moab, aparte de on achtoj pacto* yejuan yokichijka iminuan ipan on tepetl Siná. ²Moisés okinsentlalij nochimej on israelitas niman okinmijlij:

“Sa no nemejuamej onenkitakej nochi on tlen toTEKO okichiuilij on rey Egipto niman nochimej itekitkauan niman nochi ipaís. ³Sa no ika nemixtololojuan onenkitakej nochi on uejueyi milagros, tlamajuisoltin niman chauistin yejuan toTEKO okichiu para okiteititij iueyipoder. ⁴Pero hasta aman toTEKO xe mehmaka kajsikamatilistli para nenkimatiskej on tlen kijtosneki nochi on tlajtlamach* yejuan onenkitakej ika nemixtololojuan niman onenkakej ika nemonakasuan. ⁵Nejua onemechyekan 40 xipan ipan on xalpatlajkan, niman ipan nochi on xiutin xojsoliu nemotlaken, nion nemokakuan. ⁶Xonenkipixkej pan para nentlakuaskej, nion vino, noso itlaj okse tlaonijli yejuan tlaxokoliji para nenkoniskej, para ijki nenkimatiskej ika toTEKO yejua nemoDios.

⁷Ijkuak otejkokej ipan in tlajli, Sehón on rey de Hesbón, niman Og on rey de Basán, okiskej para otechuijsokikoj, pero otikintlankej. ⁸Niman otitoyaxkatijkej iminueyitlalpan niman otikinmakakej itribu* Rubén, niman itribu* Gad niman on

itlajkotribu* Manasés. ⁹Yejua ika tej, xchiuakan nochi in tlanauatiltin de in pacto* para ijki nochi tlen nenkichiuaskej kuajli kias.

¹⁰Aman nemochimej* nikan nennemij ixpan nemoTEKO Dios: on tlayekankej ipan cada tribu, on uejueyixtokej tlakamej, on uejueyitekiuajkej, nochimej on oksekimej tlakamej israelitas, ¹¹nemokoneuan, nemosiuauan, on xchanejkej yejuan nemij nenmouan yejuan mechajkuiliaj kojtlí* para tlajtla niman on yejuan mechajkuiliaj atl. ¹²Nochimej nennemij nikan ixpan toTEKO Dios para nenkiseliskej sen pacto* yejuan nemoTEKO Dios aman kichiua nemouan ika sen tlajtolmakalistli ika itokatsin. ¹³Aman ika on pacto* yejua mechteneua melauak ken nenikoneuan, niman ika yejua nemoTEKO Dios ken okintlajtolmak ika itokatsin nemoachtojtajuan Abraham, Isaac niman Jacob ika ijkon kichiuas. ¹⁴Pero toTEKO xsan nemouan nemejuamej kichiua in pacto* niman in tlajtolmakalistli ika itokatsin, ¹⁵yej no kichiua iminuan nochimej on yejuan aman xe tlakatiy nemouejkakoneuan.

¹⁶Nemejuamej kuajli nenkimatij kenijki tinemiyaj Egipto niman kenijki otipanokej ipan sekimej naciones yejuan tikinnexitiayaj ipan toojui. ¹⁷Otikintakej on xkuajkualtin ídolos yejuan tetlajyelojkej tlachijchijtin ikan kojtlí, tetl, plata niman oro yejuan on tlakamej kinmauistiliaj. ¹⁸Kuajli xkitakan para maka nion sen tlakatl, nion sen suatl, nion sen familia, nion sen tribu* kinekis kejkuanis iyojlo itech toTEKO Dios, niman peuas kinmauistilis imindioses on oksekimej naciones. Maka semej nemejuamej yes ken sen kojtlakijlotl yejuan chichik ineluyo niman tepajmiktia.

¹⁹Tla ijkuak yotlan nenkakij in tlajtolmakalístin ika itokatsin, semej nemejuamej kijtos ika yejua sanoyej kuajli tlakatl, niman xkaman ipan uetsis on tlaueiltin maski nouikas ipan xkuajli on ojtlí, tla ijkon, san ipampa nochimej kiseliskej tlajyouilístli. ²⁰ToTEKO xkitlapojpoluis yejuan ijkon kichiuas. Yej sanoyej kualanis itechkopa on tlakatl, niman nochi on tlaueiltin yejuan tlajkuilolnestikaj ipan in amamoxtlí* ipan uetsis. Niman toTEKO kimpopolos nochimej iuejkakoneuan ipan in tlaltikpaktli. ²¹ToTEKO kejkuanis on tlakatl intech nochimej itribus on israelitas niman kichiuas ipan ma uetsi nochi on tlaueiltin de on pacto* yejuan tlajkuilolnestikaj ipan in amamoxtlí* de in tlanauatiltin.

²²Nochimej nemouejkakoneuan yejuan tlakatitiaskej sakín*, niman on xchanejkej yejuan ualeuaj ipan oksekimej paises, kitaskej nochi on chauistin niman on kokolistin yejuan toTEKO kuajtítlanis ipan in tlajli. ²³Kitaskej ika nochi in tlajli san kipiya

azufre, istatl niman tlajli yejuan tlatlak. Xitla uelis kitôkaskej ipan on tlajli pampa on tlajli xuelis kiyolitis nion sen xojtli. No ijki, onyas ken onochiu yeuejkau ijkuaq toTEKO okintlatij on uejueyimej kalpanmej Sodoma, Gomorra, Adma niman Zeboim.

²⁴'Kemaj nochimej naciones tetlajtoltiskej: '¿Tline ijkin okichiuilij Dios on tlajli? ¿Tline hasta ijkin okualan iminTEKO?'

²⁵'Niman ijkin kiminankiliskej: 'Pampa okitlalkauijkej on pacto* yejuan iminTEKO Dios okichiu iuan inachtojtajuan ijkuaq okinkixtij ne Egipto. ²⁶Niman yej okinmauistilikej niman onotlakuantelketskej imixpan oksekimej dioses yejuan xkinmixmatiyaj, nion yejuan iminTEKO xokinmakak para kinmauistiliskej. ²⁷Yejua ika, toTEKO okualan impampa in chanejkej ipan in tlajli, niman okichiu ma uetsi impan nochi tlaueliltin yejuan tlajkuilolnestikaj ipan in amamoxtli*.

²⁸Niman Dios okinkixtij de in tlajli ikan miyek tlauejli niman okinchajchayau ipan oksekimej naciones ken aman nochijtikaj.'

²⁹'Onkaj tlajtlajmach yejuan toTEKO xkineki ma tikmatikan, yej san yejua kimati. Pero on ileyas niman itlanauatiluan yejuan otechimpanextilij tejuamej niman touejkakoneuan, yejua kineki para nochipa ma tikintlakamatikan.

Kenijki on israelitas oksejpa kiseliskej tlatiochialistli

30 ¹Ijkuaq nemopan uajlas nochi in tlatiochialistin niman in tlaueliltin yejuan nemechtlalilia aman, niman nenkinemiliskej tlinon kijtosneki on tlatiochialistin niman on tlaueliltin ipan on naciones kampa nemoTEKO Dios mechchajchayauas, ²tla nemejuamej niman nemokoneuan nemokuepaj itech toTEKO Dios niman nenkitlakamatij ikan nochi nemoyojlo niman nochi nemoalma ken nejua aman nemechnauatia, ³tla ijkon, nemoTEKO Dios oksejpa mechpaleuis, niman mechiknelis, niman mechkixtis intech nemotlauelikniuan. Yejua mechsentlalis oksejpa. Mechonanas nochiuiyan impan on naciones kampa omechsesemanka. ⁴Maski nennemiskej kampa más uejka ipan in tlaltikpaktli nemoTEKO Dios hasta nepa yas mechonnanas, niman oksejpa mechajuikas. ⁵ToTEKO mechuikas oksejpa ipan on tlajli yejuan nemoachtojtajuan okinoyaxkatijikaj*, niman nemejuamej oksejpa nemoyaxkatiskej. Niman kichiuas para kuajli ma kisa nemotekiu, niman más kinmiyekilis nemokoneuan xken inkoneuan nemoachtojtajuan. ⁶NemoTEKO Dios kichiuas para ika nochi nemomoyojlo niman iminyojlo nemouejkakoneuan uelis nenkinekiskej nenkintlakamatiskej itlanauatiluan on pacto*. Ijkon nenkitlajsojtlaskej ika nochi nemoyojlo niman ika nochi nemoalma, niman nochipa nennemiskej ipan nemotlal.

⁷NemoTEKO Dios kichiuas para ma uetsi nochi in tlaueilitin impan nemotlaueelikniuian yejuan mechtlaueletotokatinemij. ⁸Niman nemejuamej nenuajlaskej itech nemoTEKO Dios niman nenkitlakamatiskej niman nenkichiuaskej nochi in tlanauatiltin yejuan nejua nemechnauatia aman. ⁹Kemaj toTEKO kichiuas para ma kisa kuajli nochi tlen nenkichiuaskej ipan nemotekiu. Kichiuas para xpiyakan miyekej nemokoneuan, niman kichiuas para ma kipiayakan miyekej inkoneuan nemoyolkauan. Niman no kichiuas para sanoyej ma tlaki nemotlatok. Kemaj, nemoTEKO Dios oksejpa pakis ika on tlen kuajli mechchiuilis, ken achtoj pakiya ijkuak kinchiuiliaya tlen kuajli nemoachtojtajuan. ¹⁰Ijkon kichiuas tla nenkitlakamatiskej nemoTEKO Dios, niman nenkichiuaskej nochi itlanauatiltin niman ileyes yejuan tlajkuilolnestikaj ipan in amamoxtli* de in ley, niman tla nenmokuemaskej itech yejua ika nochi nemoyojlo niman ika nochi nemoalma. ¹¹In tlanauatijli yejuan aman nemechnauatia xsanoyej ouijtikaj* para nenkasikikamatiskej nion para nenkichiuaskej. ¹²In tlanauatiltin xonkaj ne ipan cielo para nenkijtoskej: ‘¿Akinon uelis tlejkos ne ipan cielo para techajkuilis itlanauatiltin toTEKO, niman techmachtis para uelis tikintlakamatiskej?’ ¹³No ijki, xonkaj ne ipan on okse lado de on mar para nenkijtoskej: ‘¿Akinon uelis kipanós on mar para techajkuilis itlanauatiltin toTEKO niman techmachtis para uelis tikintlakamatiskej?’ ¹⁴Yej on tlanauatijli onkaj sanoyej nisiu de nemejuamej. Onkaj ipan nemokamak niman ipan nemotlamachilis para uelis nenkintlakamatiskej.

¹⁵Xkitakan, aman niktllalia nemixpan on tlen kuajli niman on tlen xkuajli. Niktlalianemixpan nemilistli niman mikilistli. Aman tej, xtlapejpenikan katlejua nenkitokaskej. ¹⁶Tla nenkintlakamatij in tlanauatiltin yejuan aman nemechnauatia niman nenkitlajsojtaj* nemoTEKO Dios niman nenkitokaj iojui, niman nenkichiuaj itlanauatiltin niman ileyes niman itemachtiltin, tla ijkon, uelis nennemiskej niman nenkipiyaskej miyekej nemokoneuan. Ijkon nemoTEKO Dios mechtiochiuas ipan on tlajli kampa nenkalakiskej para nemoyaxkatiskej. ¹⁷Pero tla ipan nemoyojlo nenkitlalkauiskej toTEKO niman xnenkintlakamatiskej nochi in tlanauatiltin, niman yej oksekimej dioses mechixkajkayauaskej niman imixpan nemotlakuantelketsaskej para nenkinmauistiliskej, ¹⁸kuajli xmatikan, amantsin nemechijlia ika melauak nenmikiskej, niman ika xuejkauis nennemiskej ipan on tlajli yejuan nenkimoyaxkatiskej ijkuak yonenkapanokej on río Jordán.

¹⁹Ipan in tonajli nikintlalia ken testigos on yejuan chantij ne iluikak niman ipan in taltikpaktli, ika nemechmakatikaj tlinon

nenkitlapejpeniskej: tla nemilistli noso mikilistli, tlatiochiualistli noso tlauelijli. Aman tej, xtlapejpenikan nemilistli para xnemikan nemejuamej niman nemouejkakoneuan. ²⁰Xtlajsojtlakan nemoTEKO Dios. Xtlakamatikan niman nochipa yejua xtokakan pampa yejua mechmaka nemilistli, niman yejua kichiuas para nennemiskej miyek xipan ipan on país yejuan toTEKO okintlajtolmakak ika itokatsin ika kinmakas nemoachtojtajuan, Abraham, Isaac niman Jacob.”

Josué okiselij itekiu Moisés

(Nm 27.12-23)

31 ¹Moisés oksejpa okinminots nochimej on israelitas, niman ijkin okinmijlij:

²’Nejua ye nikpiya 120 xipan niman xok niuelis nemechyekanas. No ijki, toTEKO yonechijli ika xnikpanos on río Jordán. ³Pero nemoTEKO Dios mechyekanas ijkuak nenkipanoskej on río. Yejua tlamis kinmiktis nochimej on naciones kampa nempanotiaskej para nemoyaxkatiskej imintlal. Josué yes nemotlayekankau ijkon ken yokijtoj toTEKO. ⁴ToTEKO no ijki kinchiuilis on tlakamej ken okichiuilij Sehon niman Og reyes de on amorreos yejuan okinxoxotonilij nochi imimpases. ⁵Niman ijkuak toTEKO kichiuas para on naciones nenkintlaniskej, xkinchiuilikan nochi on tlen onemechnauatij nenkichiuaskej. ⁶Xmokojtilikan niman xmoyolchikauakan. Maka xmomojtikan, nion maka xmojkamikikan imixpan pampa nemoTEKO Dios yau nemouan, niman xmechkauas, nion xmechtlalkauis.”

⁷Kemaj Moisés okinots Josué niman okijlij imixpan nochimej on israelitas: “Xmokojtili niman xmoyolchikaua, pampa tejua tikinuikas in tlakamej ipan on kuajli tlajli yejuan toTEKO okintlajtolmakak ika itokatsin ika kinmakas nemouejkatajua. Niman tejua yes yejuan tikinxelouilis niman tikinmakas on tlajli ken iminherencia. ⁸ToTEKO, sano yejua mitsyekanas niman nemis mouan. Xmitskauas, nion xmitstlalkauis. Yejua ika, maka xmomojti, nion maka timoyolmajxalos.”

On ley para on xipan ijkuak kitlapojpoluiskej nochi teuikilistin

⁹Moisés okijkuiiloj in tlanauatiltin yejuan onkaj ipan in amamoxtli*, niman okinmakak on tiopixkej levitas yejuan kiktijay on yekcaja ika on pacto*, niman nochimej on uejueyixtokej tlayekankej intech on israelitas. ¹⁰Niman no okinmijlij in tlanauatijli: “Cada chikome xipan, noneki nenkimomachtiskej ixpan nochimej on israelitas in tlanauatiltin ijkuak ajsis on xipan para nochimej on israelitas

kintlapojpoluiskej on teuikilistin. Xchiuakan ipan on semana ijkuak nenkichiuaskej on iluitl ijkuak nochijchiuaj kalmatsitsimej. ¹¹Xchiuakan ijkuak nochimej nemosentlaliskej ixpan nemoTEKO Dios kampa yejua kitlapejpenis.

¹²Xkinsentlalikan nochimej on tlakamej, siuamej, kokonej niman xchanejkej yejuan chantij ipan nemokalpanuan para ma kakikan, niman ma kitlakaitakan nemoTEKO Dios, niman kintlakamatiskej nochi on tlanuatiltin. ¹³Ijkon tej, nemokoneuan yejuan xitlaj* kimatij de in tlanauatiltin, uelis kakiskej niman kejekoskej kitlakaitaskej nemoTEKO Dios ipan nochi innemilis ipan on tlajli yejuan nemejuamej nenkimoyaxkatiskej sakin* ijkuak yonenkipanokej on río Jordán.”

Isakintlanauatil toTEKO para Moisés

¹⁴Kemaj toTEKO okijlij Moisés:

“Xkaki, ye ajsitikaj* on tonajli ijkuak timikis. Aman tej, xnotsa Josué, niman xuiya ipan on tabernáculo* kampa ninemi para nikalaktis ipan itekiu ken tlayekanketl.”

Moisés niman Josué oyajkej ipan on tabernáculo* kampa nemi Dios, ¹⁵niman ompa ononextij toTEKO ipan sen moxtli mimiltik yejuan onotlalito kampa ikalakiyan on tabernáculo. ¹⁶Kemaj toTEKO okijlij Moisés:

“Ye nisiu para timikis. Niman in israelitas nechkauaskej niman xok kitlakamatiskej on pacto* yejuan yonikchiu iminuan. Ijkon ken se situatl kitlalkauiya iueuentsin* niman noteka iuan okse tlakatl, on israelitas nechtlalkauiskej niman kinmauistiliskej on yejuan xmelaauak dioses. ¹⁷Ijkuak ijkon kichiuaskej, nejua sanoyej nikualanis iminuan yejuamej. Nikintlalkauis niman niniyanas kampa xuelis nechnextiskej. Xok nikinkakis, niman on tlakamej tlamis kinmiktiskej. Sanoyej miyek tlajyouilistli impan uajlas hasta notlajtoltsiskej: ‘¿Manin xmelaauak nochi in tlajyouilistli topan uajlau ika toTEKO Dios xok touan nemi?’ ¹⁸Pero ijkuakon nejua niniyanas más de yejuamej ipampa nochi on tlen xkuajli kichiuaj niman pampa okinmauistilijkej oksekimej dioses.

¹⁹Aman tej, xkijkuilokan in kuikatl niman xkinmachtikan on israelitas para ma nokuikatikan niman nochiuas ken sen testigo inka yejuamej. ²⁰Xkijkuilokan in kuikatl pampa nejua yonikchiu ma kalakikan ipan on tlajli yejuan onikintlajtolmakak ika notokatsin iminuejkatajuan. Tlajli kampa sanoyej tlatlaci niman xitlaj* poliui. Niman ijkuak yotlakuajkej kuajli hasta kaman ixuiskej niman tomauiskej, kemaj yaskej intech on oksekimej dioses niman kinmauistiliskej. Nejua xok nechnekiskej niman xkitlakamatiskej on pacto* yejuan onikchiu iminuan.

²¹Pero ijkuak impan uajlas miyek tlajtlamach* tlajyouilistli,

nokuikatiskej in kuikatl. Niman in kuikatl nochiuas ken sen testigo yejuan kinmixkomakas, niman kinmachistis on tlen xkuajli kichiuaj. Niman ijki inuejkakoneuan kelnamikiskej in kuikatl niman nokuikatiskej. Maski xe nikinkalaktia ipan on tlajli yejuan onikintlajtolmakak ika notokatsin, nejua ye nikmatstikaj kuajli tlinon kinemiliaj kichiuaskej.”

²²On tonajli Moisés okijkuiloj in kuikatl niman okinmachtij nochimej on israelitas para ma uelikan ma nokuikatikan.

²³ToTEKO ijkin okinauatij Josué, ikoneu Nun:

“Xmokojtili niman xmoyolchikaua pampa tejua tikinuikas in israelitas ipan on tlajli yejuan yonikintlajtolmakak ika notokatsin niman nejua ninemis mouan.”

²⁴Ijkuak Moisés otlán kijkuiloua nochi in leyes ipan sen amamoxtli*, ²⁵okinnauatij on levitas yejuan kipiayaj on tekiti para kiktij on yekcaja ika on ipacto* toTEKO:

²⁶“Xkiktikan in amamoxtli* ika ileyas toTEKO, niman xtlalikan inakastlan on yekcaja yejuan kipiya ipacto* nemoTEKO Dios para ompa ma onya ken testigo nemoka nemejuamej israelitas.

²⁷Ijkon xchiua pampa nejua nikmatstikaj ika nemejuamej israelitas nentsotekonchikajkej niman nenyoltechikajkej. Niman tla aman ijkuak sanken* ninemi nemouan xipan nenkitaj toTEKO, ¿tlinon xnenkichiuaskej sakín* ijkuak yonimik?

²⁸Xkinuajuikakan nikan nochimej on uejueyixtokej tlayekankej niman intlayekankauan cada tribu* para nejua uelis nikinmijlis in tlajtlamach* niman nikintestigojtlalis on yejuan chantij iluikak niman ipan in tlaltikpaktli, inka yejuamej. ²⁹Ijkin nikchiuas pampa nejua melauak nikmatstikaj ika sakín* ijkuak yonimik nenkichiuaskej xkuajli niman nenkitlalkauskej on ojtli yejuan yonemechnauatij xtokakan. Niman no nikmatstikaj ika sakín* nemopan uajlas tlajyouilistli, pampa nenkichiuaskej on tlen sanoyej xkuajli ixpan toTEKO niman yejua sanoyej nenkualaniskej.”

On kuikatl yejuan okijkuiloj Moisés

³⁰In yejua kuikatl yejuan okixochijto Moisés desde ipeuayan hasta itlamiyan, imixpan nochimej on israelitas yejuan ompa nemiyaj:

32 ¹“Xkaki cielo*, niman xkaki on tlaltikpaktli on tlen nejua nikijtos.

²Notemachtli xinis ken kiautli.

Notlajtol yes ken ajuichtli,
ken tlapayautli ipan sakatl yejuan selik,
niman ken atsintli yejuan xini ipan on tlaselistli.

³Nejua nikueyiteneuas itokatsin toTEKO.

- ¡Xkixmatikan iueyilis toTEKO Dios!
⁴ Yejua sen ueyixtika temanauijketl.
 Nochi kuajli kisa itekiu.
 Melajki nochi on tlen kichiua.
 Yejua Dios yejuan nochipa kichiua on tlen kijtousa.
 Yejua xkaman kichiua itlaj yejuan xmelajki.
 Yejua kichiua on tlen melajki niman kuajli.
- ⁵ 'On israelitas okichiuilijkej Dios tlen xkuajli.
 Aman xok uelis noteneuaskej ikoneuan Dios
 pampa sanoyej xompayejeuamej.
- ⁶ ¿Ijkon nenkitlaxtlaulilia nemoTEKO,
 nemejuamej israelitas yejuan nion xnentlamachilisyejkej
 niman xnentlamatkej*?
 ¿Tlen xejua nemotataj yejuan omechtlakatali?
 ¡Yejua omechchijchiu niman omechmakak nemilistli!
- ⁷ 'Xkelnamikikan on tonaltin yeuejkauí kenijki okuajpanotiajkej
 nemoachtojtajuan.
 Xkintlajtolitikan nemotajuan niman on ueuentsitsimej
 tlayekankej ma mechtlajtlatouilikan nochi.
- ⁸ Se tonajli toTEKO yejuan Más Ueyixtikaj,
 okinxelox tlakamej ipan in tlaltikpaktli para onochijkej
 sesentlamantikej naciones,
 niman okintlalilij nochimej kanon notlalnamikiskej.
 Pero on israelitas okinxelox ikan matlaktli uan ome tribus
 sano ichkich ken ikoneuan Jacob.
- ⁹ Ijkon okichiu pampa yejuamej on israelitas okintlapejpenij
 para ikoneuan.
 Jacob niman iuejkakoneuan yejua iherencia.
- ¹⁰ ToTEKO okiminextij ipan on xalpatlajkan,
 ipan on tlajli uaki kampa on ajakatl tlauteki sanoyej
 chikauak.
 Okinmanauij, okinmachtij
 niman okincuidarox ikan miyek maluijli
 ken yakaj kinmaluiya ixtololouan.
- ¹¹ Omechcuidarox ijkon ken sen kuaktli kincuidaroua ikoneuan.
 Yejua kuiuixoua itepajsol para kinchiualtia ikoneuan ma
 patlanikan.
 Niman ijkuak kinta ikoneuan siauij,
 kimpatlousa imajtlapaluan para ompa ma uetsikan.
 Kemaj kinuika ipan itepajsol.
 No ijki, toTEKO okincuidarox on israelitas.
- ¹² 'ToTEKO iselti okinyekan niman xakaj más.
 Niman xakaj dios okipaleuij.
- ¹³ ToTEKO okinuikak ken tetlankej ikuapan on tepemej.

- Okintlakualtij ika on tlakyotl yejuan más kuajli onkaj ipan campo.
- Ipan sen teostotl okixtij nekutli, niman okinmakak ma konikan.
- No ijki, ipan on olivojkojtin yejuan noscaltiaj ipan on temej, okinkixtilij aceite de olivo.
- 14 Okinmakak mantequilla niman leche de iminyolkauan. Okuajkej innakayo on borreguitos yejuan más kuajkualtin. Okinkualtij borregos niman chivos yejuan más kuajli de on tlajli Basán.
- Okuajkej on trigo yejuan más kuajli, niman okonikej vino yejuan más kuajli.
- 15 'Pero on israelitas sanoyej otekitlakuajkej niman otojtomajkej, niman kemaj xipan oteitakej. Sanoyej tojtomajkej katkaj niman onoueyimatkej, niman okitlalkauijkej iminTEKO Dios yejuan okinchijchiu. Okajkej on imintemanauijkau niman imintemakixtijkau.
- 16 On israelitas okichijkej para toTEKO Dios sanoyej ma kualani, pampa yejua xokixikoj okitak ika okinmauistilijkej dioses yejuan tetlajyelojkej.
- 17 On israelitas okinmakakej uentli on xkuajkualtin espíritus, dioses yejuan xejua toDios, dioses yejuan xkinmixmatiyaj, dioses yejuan san kemach ononextijkej, dioses yejuan totajuan xkaman okinmauistilijkej.
- 18 'Nemejuamej israelitas, onenkelkajkej nemotataj yejuan nemotemanauijkau. Onenkelkajkej on Dios yejuan omechmakak nemilistli.
- 19 Ijkuak toTEKO okitak tlen okichijkej, xokinselij on ikoneuan tlakamej niman ikoneuan siuamej pampa okichiualtijkej ma kualani.
- 20 Niman toTEKO okijtoj: 'Najua niniyanas de yejuamej, niman nikitás hasta kanon ontlamiskej. Melauak sanoyej xompayeyjeuamej, niman tekoneuan yejuan xipan teitaj.
- 21 Onechchiualtijkej para sanoyej ma nikualani pampa xonixikoj nikitás ika okinmauistilijkej on dioses yejuan xnejli dioses. Onechtlauelkuitijkej ika on iminídolos. Aman nikchiuas para chauatiskej ijkuak kitaskej ika nikintlajsojtlas* on yejuan xisraelitas. Nejua nikinkualanis ika sen nación yejuan xkipiyaj tlamachilistli.
- 22 Notlauel yes ken itlaj tlitl,

- niman kauanis hasta ajsis kampa sanoyej uejkatlan.
 Tlami kitlatis nochi tlaltikpaktli niman on tlen tlakis.
 Niman no kitlatis hasta ineluayouan on tepemej.
- 23 Impan yejuamej niktitlanis nochi on tlajtlamach* tlen xkuajli,
 impan yejuamej nikintekitiltis nochi notlaminaluan.
- 24 Mikiskej ikan apistli niman ikan totonalistli*.
 Sen xkuajli kokolistli kintlami.
 Nikintitlanilis tepeyolkej yejuan tekuanimej
 niman kouamej* yejuan sanoyej pajyojkej.
- 25 Ipan inojui nemokalpanuan xixiniskej inkoneuan
 pampa kinmijmiktiskej ikan espada,
 niman inkalijtik onyas miyek nemojtijli.
 Telpokamej niman ichpokamej mikiskej.
 Ueuntsitsimej niman kokonej yejuan sanken* chichij* no
 mikiskej.
- 26 'Nejua yoniknemilijka nikinsesemanas niman nikimpolos ipan
 tlaltikpaktli
 niman xok yakaj kinmelnamikis.
- 27 Pero xoniknek para nokauetskaskej notlaelikniuan.
 Xnikneki yejuamej ma noueyimatikan, pampa yejuamej
 kijtoskiaj:
 Tejuamej yotikintlankej ikan topoder.
 Xmelauak Dios okinkastigaroj.'
- 28 'Pero in israelitas xkipiyaj tlamachilistli.
 Xuelij nonemiliaj,
 ¡Xitlaj kajsikamatij!
- 29 Tla tlamatkej* yeskiaj, kajsikamatiskiaj
 niman kimatiskiaj kanon ontlamiskej.
- 30 ¿Kenijki ouel san se nemotlaelikniou okintotokak se mil
 soldados israelitas?
 Noso, ¿kenijki san omemej nemotlaelikniuan okintotokak
 matlaktli mil soldados israelitas
 tla toTEKO, yejuan imintemanauijkau, xokintekauilij intech
 yejuamej?
- 31 'Totlaelikniuan kuajli kimatij ika imindios xkojtik ken
 tejuamej toDios.
- 32 Nemotlaelikniuan kipiayaj palanalistli ken Sodoma niman
 Gomorra.
 Yejuamej ken itlaj uvasyoj yejuan kitlakitiaj uvas pajyoj niman
 chichik.
- 33 Iminvino ken iminpajyoj kouamej* yejuan temiktiaj.
- 34 'Nochi in nejua nikejtikaj ipan notlamachilis.
 Nikejtikaj ken itlaj tesoro,
 35 para on tonajli ijkuak nitetlakuelpiltis*

- niman nikchiuas ma kiselikan on tlen kitokaroua kiseliskej.
 Kemaj uetsiskej
 pampa xok uejkajtika yes ika ajsis on tonajli ijkuak poliuiskej.
- 36 ⁷ToTEKO uajlas niman kinmanauis ikoneuan ijkuak kitas xok kojtikey.
 ToTEKO kinmiknelis itekitkauan, esclavos niman on yejuan tlamanauiltin
 ijkuak kitas ika nochimej yokintlalkauijkej.
- 37 Kemaj kimijlis on israelitas:
 ¿Kanon nemij nemodioses,
 on yejuan temanauiyaj yejuan intech nenmiyanayaj?
- 38 ¿Kanon nemij nemodioses yejuan kikuayaj ichajka nemouen,
 niman koniyaj on vino yejuan nenkinmakayaj ken uentli?
 Ma uajlakan para ma mechpaleuikij, niman ma mechmanauikij.
- 39 San nejua nikanochi Dios.
 Xnemij oksekimej dioses yejuan melauak, yej san nejua.
 Nejua niktemaka nemilistli niman niktexixtilia.
 Nejua nitekokoua niman nejua nitepajtia.
 ¡Xakaj nemi yejuan uelis nomanauis ipan nopoder!
- 40 Nikuiteua noma ne iluikak,
 niman ninotlajtolmaka ika notokatsin ika nejua ninemi para
 nochipa,
- 41 ika ijkuak niktentis nopetlankaespada
 niman nikchiuas tlen melajki ken kinamiki,
 nikintlakuepiltis notlauelikniuan.
 ¡Nikincastigaros ken kinnamiki on yejuan nechtlauelitaj!
- 42 Nochi notlaminaluan nikinyejjesyotis ika inyesyo
 notlauelikniuan.
 Niman noespada kintlamis nochimej yejuamej:
 iminyesyo on yejuan yomikkej,
 niman on yejuan okinmajsikey,
 niman on tlayekankej yejuan notlauelikniuan.
- 43 ⁷¡Xpakikan, nemochimej* tlakamej ipan tlaltikpaktli iuan
 ikoneuan Dios!
 Yejua tetlakuepiltis pampa okinmiktijkej itekitkauan.
 Melauak, kintlakuepiltis itlauelikniuan.
 Yejua kixtis nochi tlajtlakojli yejuan onkaj ipan ipaís,
 niman kintlapojpoluis ikoneuan.”

Isakin tlanauatliuan Moisés

44 Moisés, iuan Josué ikoneu Nun, oyajkej imixpan on israelitas. Kemaj Moisés okioxohijtoj nochi in kuikatl desde ipeuayan hasta itlamiyan para ma kakikan nochimej on israelitas. ⁴⁵Ijkuak Moisés otlán kijtoua nochi in kuikatl,

⁴⁶okinmijlij on israelitas:

“Kuajli xnemilikan nochi on tlajtlamach* yejuan aman yonemechijli. Niman xkinnauatikan nemokoneuan ma kichiuakan nochi on tlen kijtoug in tlanauatiltin, ⁴⁷pampa in xejua itlaj yejuan nemejuamej uelis san nenkauilmatiskej. In tlanauatiltin mechmakas nemilistli. Niman tla nenkintlakamatiskej uejkaui nennemiskej ipan on tlajli yejuan onkaj ne okse lado de on río Jordán yejuan nemoyaxkatiskej.”

Dios okauilij Moisés ma kita on kuajli tlajli itoka Canaán

⁴⁸Sano ipan in tonajli toTEKO okinots Moisés, niman okijlij:

⁴⁹“Xuiya impan on tepemej de Abarim niman xtlejko ipan on tepetl Nebo yejuan onkaj ipan imintlal on moabitas ixpan on ueyikalpan Jericó. Niman desde ompa xkonta on tlajli Canaán yejuan nikinmakas on israelitas. ⁵⁰Ipan on tepetl kampa titlejkos ompa timikis, ken mokniu Aarón yejuan omik ipan on tepetl Hor. ⁵¹Nemejuamej omemej xonenkichijkej on tlen kuajli notech imixpan on israelitas ijkuak nennemiyaj ipan on atlautli Meriba nisiu Cades ipan on xalpatlajkan Zin. Xonenkichijkej on tlen kuajli notech pampa xotiktlakaitakej noyektotatsin inmixpan. ⁵²Yejua ika aman, san uejka uelis tikontas on tlajli yejuan nikinmakas on israelitas, pero xuelis tikalakis ompa.”

Moisés kintiochiua itribus Israel

33 ¹Ijkuak poliuiya achijtsin para mikis Moisés, itekipanojkau toTEKO Dios, ijkin okintiochiu on israelitas ika in tlajtojli:

²“ToTEKO oualeu de on tepetl Sinaí.

Onokuiteu ken on tonaltsintli, desde on tepetl Seir niman desde on tepemej de Parán ouajpetlantiaj imimpan ikoneuan.

Ye yejkotikaj iminuan matlaktli mil ángeles, niman kuajki ipan iyekma on ley yejuan nesi ken sen tlimilinajli.

³ToTEKO kintlajsojtla on israelitas.

Kinmanauiya on yejuan iyekkoneuan.

Yejuamej notlajkalij mokxitlan, niman kiseliaj motlanauatilan.

⁴Moisés otechmakak on tlanauatiltin

ken herencia yejuan tiuejkekoneuan Jacob.

⁵ToTEKO yejua onochiu torey ne Jesurún ijkuak itribus on israelitas onosentlalijkej san sekan iminuan intlayekankauan.”

⁶Ijkin okijtoj Moisés itechkopa itribu* Rubén:

“¡Ma nemi itriubu Rubén niman maka kaman ma miki!
Niman sanoyej ma miyekiyakan iuejyakoneuan.”

⁷Ijkin okijtoj Moisés itechkopa itribu* Judá:

“ToTEKO, xkaki inueyikatsajtsilis iuejyakoneuan Judá.
Xchiua ma nokuupakan oksejpa intech on oksekimej tribus.
Xkinmanaui ika moueyipoder intech intlauelikniuan.”

⁸Ijkin okijtoj Moisés itechkopa itribu* Leví:

“Tejua, toTEKO, otikpanextij on tlen otiknek itech on Tumim
niman Urim
itechkopa on yolmelajkej levitas yejuan otikintlapejpenij para
tiopixkej.

Otikintlatalatak ne Masah niman itech on atl de Meriba.

⁹On levitas okijtokej de imintajuan: ‘xkaman temechitaj’,
niman de iminkniuan okijtokej: ‘xtemechixmatij’,
niman de iminkoneuan okijtokej: ‘xtikmatij nenakinomej’.
Pero yejuamej okitlakamatkej motlajtoltsin niman okejekej
mopacto*.

¹⁰On levitas kinmachtiaj motlanauatiluan iuejyakoneuan Jacob,
niman moleyes iuejyakoneuan Israel.
Mixpan kitlatiskej kopajli,
niman kinuentlaliskej yolkej yejuan tlatlaskej ipan
motlaixpan*.

¹¹ToTEKO, xtiochiua iminchikaualis,
niman xkinselili nochi imintekiu tlen kichiuaj ikan paktli.
Xkinnomiyopojposteki imintlauelikniuan, niman maka sa
kaman ma nokuiteuakan.”

¹²Ijkin okijtoj Moisés itechkopa itribu* Benjamín:

“On tlakamej yejuan kisaj itech itribu* Benjamín
yejuan toTEKO sanoyej kintlajsojtla
ma nemikan iminyolika,
pampa on yejuan “Más Ueyixtikaj” nochipa nemi iminuan.
Yejua nochipa kinmejeuas.”

¹³Ijkin okijtoj Moisés itechkopa itribu* José:

“ToTEKO ma kintiochiua imintlaluan

ika on kualtsin ajuichtli yejuan ualeua ipan cielo,
niman ika on atl yejuan kueponi,
yejuan ualeua kampa tlauejkatlan ijtik in tlaltikpaktli.

¹⁴ Niman ma kitiochiua ika on yejuan más kuajli tlakyotl de on
xipan

niman on yejuan más kuajli tlaki cada metstli.

¹⁵ Niman ma kitiochiua ikan on yejuan nochipa más kuajli tlaki
ipan on tepemej,

niman ipan on tlamimiltin yejuan nochipa onkaj.

¹⁶ Ma kiselikan on tlen sanoyej kuajli tlakyotl yejuan tlaki ipan
in tlajli.

Ma kiselikan itech toTEKO yejuan ikan itetlajsojtlalis*
onechnotitij ipan on tlakotepajsojli yejuan kauantikatka.

Nochi in tlatiochiualistli ma uajla ipan itribu* José,
pampa yejua sen tlayekanketl katka intech ikniuan.

¹⁷ Yejua kualtetsin ken iyenkuuiyokoneu sen toro ueyi.
¡Sanoyej kojtikey ikuakuauuan ken ikuakuauuan on yolki itoka
búfalo!

On kuakuautin kitosneki ikoneu Manasés iuan on miyekej
miles de iuejkakoneuan,

niman ikoneu Efraín iuan on matlaktli mil iuejkakoneuan.

Ikan ikuakuauuan, kinuijsokis nochimej naciones,
hasta kaman kinsentlalia san sekan kampa ontlami in
tlaltikpaktli.”

¹⁸ Ijkin okijtoj Moisés itechkopa itribu* Zabulón niman itribu* Isacar:

“Xpiyakan paktli neniuejkakoneuan Zabulón kampa
nenkistinemij ipan on mar,

niman xpiyakan paktli neniuekanoneuan Isacar kampa
nenkistinemij ne ipan on tlajli.

¹⁹ Yejuamej kinotsaskej miyek tlakatl^f para yaskej ipan tepetl,
niman ompa kinuentlaliskej on uentli yejuan noneki para toTEKO.
Nempakiskej ika on miyek riquezas yejuan onkaj ipan mar,
niman nempakiskej ika on tesoros yejuan iyantikaj ipan on
xajli itenko on mar.”

²⁰ Ijkin okijtoj Moisés itechkopa itribu* Gad:

“Ma kiyekteneuakan Dios pampa okueyikatilij iueyitlalpan
Gad,

f 33.19 “Miyek tlakatl” ueli kijtosneki israelitas de okse tribus, noso tlakamej de oksekimej naciones.

- yejuan nopechteka ken sen leona.
Niman ijkuak Gad kajsi sen yolki,
kitlankojkotona imauan niman itsontekon.
- 21 On tlakamej ipan itribu* Gad, okitlapejpenikej tlajli yejuan
más kuajli.
Okiselijkej miyek ken kitokaroua sen tlayekanki.
Ijkuak intlayekankauan on israelitas onosentlalijkej,
yejuamej okitlakamatkej nochi on tlen melajki yejuan toTEKO
tlanauatia.”
- 22 Ijkin okijtoj Moisés itechkopa itribu* Dan:
“Itribu* Dan ken sen leónkonetl
yejuan uajtsikuini desde ipan itlalpan Basán.”
- 23 Ijkin okijtoj Moisés itechkopa itribu* Neftalí:
“Iuejkakoneuan Neftalí, kuajli kiyolpaktiaj toTEKO,
niman kiseliaj sanoyej miyek itlatiochualis.
Yejua iyaxka* on tlajli itech on mar itoka Galilea hasta
ikalakiyan tonaltsintli.”
- 24 Ijkin okijtoj Moisés itechkopa itribu* Aser:
“Más ma kitiochijkateneuakan itribu* Aser xken oksekimej
itribus Israel.
Niman más ma kinekikan ikniuán.
Itribu* Aser no kipiayas miyek kojtin* de olivos ipan itlal.
- 25 Itsakuijlouan yeskej de tepostli niman de bronce,
niman nochipa kipiayas poder para nomanauis.
- 26 ^gXakaj okse dios ijki nemi ken iDios Jesurún^g,
yejuan kistinemi ipan moxtli ne tlakpak
ipan cielo ikan nochi ipoder
para ueli mechpaleuiya.
- 27 On Dios yejuan nochipa nemi, yejua mitsmanauiya,
niman yejua mitspiya ipan imauan.
Yejua mixpan okintotokak motlauelikniuán,
niman mitsijlia xkinmikti.
- 28 Aman tej, Dios nochipa kinmejeuas iuejkakoneuan Israel.
Iuejkakoneuan kuajlotika nemiskej.
Ipan imintlal onyas miyek trigo niman vino.

^g 33.26 “Jesurún” kitosneki “Israel”.

Nochipa kuajli kiauis.

- ²⁹ ¡Sanoyej nentlatiochijtin nemejuamej israelitas!
 Xakaj ijki ken nemejuamej yejuan omechmakixtij toTEKO.
 Yejua mechmanauiya niman mechpaleuiya.
 Yejua ken sen espada yejuan mechmanauiya.
 Nochimej nemotlauelikniuan notlakuantelketsaskej nemixpan,
 niman nenkichiuaskej para ma noknelikan.”

Omik Moisés niman okitokakej

34 ¹Moisés okis de on xalpatlajkan Moab niman otlejkok ipan on tepetl Nebo ne ikuapan kampa itoka Písga, yejuan onkaj ixpan on ueyikalpan Jericó. Desde ompa, toTEKO okititij nochi on iueyitlalpan Galaad hasta ipan iueyitlalpan Dan, ²niman nochi inueyitlalpanuan Neftalí, Efraín, Manasés niman nochi on tlajli de Judá hasta on Mar Mediterráneo. ³Niman no okititij itlalpan Néguev, niman nochi on ixtlauatl desde Zoar hasta Jericó, on kalpan kampa onkaj palmeras. ⁴Niman toTEKO okijlij:

“Xkonta on kuajli tlajli yejuan onikintlajtolmakak ika notokatsin Abraham, Isaac niman Jacob ika nikinmakas inuejkekoneuan. Oniknek para xkita ika mixtololojuan maski tejua xuelis tikalakis ipan on tlajli.” ⁵Niman kemaj Moisés, itekitkau Dios, omik ipan on tlajli Moab ijkon ken toTEKO okijlij. ⁶ToTEKO okitokak Moisés ipan sen ixtlauatl ne ipan itlalpan Moab, ixpan Bet-peor. Okitokak ne kampa hasta aman xakaj kimati kanon. ⁷Moisés kipiyya 120 xipan ijkuak omik, niman sanken* kuajli tlachaya niman sanken* chikajtikatka.

⁸On israelitas okichokilijkej Moisés 30 tonajli ipan ixalpatlajkan Moab ijkon ken nomatijay kichiuaj ijkuak yakaj miki.

⁹Josué, ikoneu Nun, okiselij miyek tlamatkilistli de Moisés, pampa Moisés okintlajij imauan ipan yejua. Ijki tej, on israelitas okitlakamatkej Josué niman okichijkej ken toTEKO otlanauatijka itechkopa Moisés.

¹⁰Desde ijkuakon, xokaman onen okse tiotlajtojketl intech on israelitas ken Moisés, yejuan toTEKO iuan notayaj ijkuak iuan tlajtouaya. ¹¹Xakaj okse tiotlajtojketl ouel okichiu on uejueyi tlatlachalistin niman milagros* yejuan toTEKO okinauatij Moisés ma kichiu ipan on tlajli Egipto ixpan on rey, imixpan itlapaleuijkauan niman imixpan nochimej on yejuan nemiyaj ipan ipaís. ¹²Xkaman yakaj okse ouel okichiu on uejueyi niman temojtij tlajtlamach* yejuan Moisés okichiu imixpan nochimej on israelitas.